

謝伯英遺稿 西笑山房詩鈔

鐵嶺于鍾岳別傳



紫江朱啟鈞著

黔南叢書別集

于鍾岳別傳



貴陽邢端署

張文襄公五忠詠

黔亂最久死忠者不可勝數此五人皆余知交貴州僻遠湮沒者眾矣

署貴西道巴圖魯于鍾岳伯英

漢軍子襄勤公成龍之裔孫殉難知縣崇璟之子

部曲從先子艱難矢石中論詩七子傑破陣萬夫

雄縞素孤兒淚

先以墨經從先大夫軍

丹青乃祖風猗牴遲悔

禍不奏貴西功

戰功最偉貴西悍賊略盡賊深恨之戰沒後僅得歸元

右南皮相國弔伯英詩見思舊錄於于之家世忠蹟

包舉無遺謹揭簡端用徵詩史癸未冬邢端敬書



于鍾岳別傳

貴陽邢端纂輯

序論

有清咸同之際東南糜沸黔處邊陲當局視同甌脫政
刑既失奸猾交煽苗民叢怨乘機肇釁自成豐四年楊
元保楊瀾變起翌年台拱苗變繼之自是涂令恒羅光
明穆玉朋姜映芳李文茂賈福保何得勝潘名杰諸寇
接踵而起標識有黃號白號之殊派別有緣匪教匪積
匪回匪粵匪之異循環代興此起彼仆擊東則竄西防

申則陷乙又益以官吏之橫征練勇之騷擾以潢池小
寇乃綿歷至數十載蹂躪至數十縣竭忠臣志士數十
百輩之力僅乃平之燎原之火一發而不可遏也如此
迄今讀平黔紀略及咸同軍事史諸書當羣盜如毛之
時乃有慷慨許國從容赴義諸賢大都以倚馬草檄之
才躬披堅執銳之任其著者若張太守諱鹿太守丕宗
劉太守書年韓中丞超江縣令炳琳周縣令夔戴州牧
鹿芝鍾岳于觀察鍾岳等莫不視民若子嫉寇如讐其循良
之治績與夫忠勇之節概設能一一詳考生平述其行

事匪惟彰歷史之榮名良足貽來哲之矩範惜黔地僻
左軍旅中載筆記述者稀若星鳳僅於私人著述中略
見一二即銳志纂述殊有著筆無從之感比年紫江桂
辛朱丈殫心述作丙丁以還感國勢之淪胥慮文獻之
凋喪遂乃博采窮蒐凡關於黔人黔事者咸網羅無遺
焉適有以故紙一束求售者謂爲于公遺物試啓視之
則塵封蠹蝕不可爬搔乃尅志研稽朝夕尋檢獲其公
牘遺文暨家屬函札凡若干篇舉以相示屬爲之顰其
端緒俾其遺烈不致泯沒會暑中嬰腹疾擱置累月茲

幸小瘥乃發篋搜其詩文公牘復徵之平黔紀略諸書
草爲此編在昔名人傳著或出其宦裔或發自友朋恒
多失實之詞不無過情之譽茲則援據手稿旁及官書
期傳信於方來匪沾直於俄頃夫黔亂兩紀膺難者不
啻數百萬人其從容死事舉家同殉者詎僅于氏一門
顧書闕有間文獻莫徵惟于公以一介書生從軍十載
妻孥不以動其心恩怨不以撓其志屢嬰寇難百折不
回而位不過監司年不逾中歲卒乃身殉荒邱血膏原
野先軫之元未歸趙孟之忠無後其軍中遺牘乃幸存

於孤嫠之手是固可哀抑亦獨幸者已今滄海橫流世
變之來大於黔亂者千百彼荷戈前驅之將士與仗節
守土之司牧苟有聞于公之風而奮然興起者則斯篇
之作其亦于公九京所心許者乎

傳略

于鍾岳字伯英漢軍鑲紅旗人襄勤公裔孫曾祖鰲圖
江蘇按察使祖卿保河南黃沁廳同知父崇璟道光十
七年部選貴州綏陽縣知縣鍾岳年八歲從父之官迭
隨任龍泉綏陽諸縣廿九年祖卿保誕日鍾岳赴衛輝

于鍾岳別傳

代父致祝翌年春返黔有紀行詩曰游梁小草咸豐四年父任普安縣知縣舉家同行八月蒞任十一月白號賊涂令恒破縣城璟朝服罵賊死岳母張妻司女弟鍾順鍾瑞鍾秀婢小梅皆同殉焉岳及弟鍾毓先出外乞援聞變即率援軍乞鄉團進勦三日而縣城復岳率軍追賊先後十二戰獲賊首劉阿閏等時興義府知府張謨嘉其功奏獎岳爲州同毓爲知縣未幾毓以積勞病卒六年岳以墨經從張謨及總兵巴揚阿軍轉戰貴定都勻間以解都勻圍功總督恒春奏獎以知州選用七

年服闋續娶楊氏八年以貴陽府知府劉書年之薦委署正安州知州五月蒞任下車卽飭團設防七月婺川匪竄州境遂會江炳琳勦螺螄賊解秦安慶軍圍十一月攻石笋獲賊首申三山收復婺川縣城螺螄石笋皆婺川轄境地奇險賊恃爲窟宅者也九年三月以越境剿賊功奏獎直隸州知州並賞戴花翎十月賊陷湄潭護貴西道竇奉家檄鍾岳馳防馬頭山十二月岳遣軍擊破老鴉山賊復會廖遇春諸軍尅期復湄潭留軍援龍泉已而賊攻龍泉急鍾岳由馬頭山馳進破賊燈籠

山三把車進復永興場十年正月卒合諸軍復涓潭縣城二月會川軍破青雲山鳳凰寨賊巢誅賊首賀世愚等秦安慶軍營水涯子爲涓賊攻陷鍾岳自永興場馳援營任家橋賊力攻之以秦軍援至始解八月綏陽旺里三甲教匪起鍾岳回勦督攻曾家山賊巢以功奏獎候補知府十一年五月解正安州職六月檄署遵義綏陽桐梓三縣督辦遵綏涓甕軍務題補都勻府已而開缺以道員用並賞武勇巴圖魯加按察使銜是時白號賊攻遵義甚亟鍾岳遣張師敬防蝦子場自率勇攻麻

家壩敗之旋所遣軍失利賊集攻岳營甚危岳力禦夜
出死士火賊營會所遣援胡先海至合擊之始解鍾岳
馳入禹門寺與賊相持同治元年壬戌正月鍾岳敗賊
於綠塘河遣吳元彪等攻大壩蘭牛坎蕭家壩賊營皆
下之四月賊不支退走隆平於是岳家壩唐寶石諸賊
皆走鍾岳與沈宏富剿賊於三岔河敗之於大錫廠復
敗之於馬家河後壩場閏七月粵匪以二十萬衆假石
達開旗幟圍遵義城鍾岳馳返郡城謀防守部署方定
賊麇至賴事先有備岳率衆力禦賊始退二年鍾岳以

公入省二月朔奉檄委署貴西道兼攝威甯州事適清
鎮被圍省城吃緊留辦城防局十九日聞其祖父卿保
於元年十一月病逝於河南輝縣請假成服時沈宏富
往援桐梓鍾岳在省遵義上溪場賊圖襲郡城岳部秦
安慶敗歿於懶板堯賊鋒遽及忠莊鋪距城十里勢張甚黔
撫張亮基至自遵義嚴斥鍾岳宏富摘去翎頂勒限剿
賊蓋初蒞新任不知鍾岳已呈報丁憂也沈宏富馳回
與鍾岳連戰皆捷遂復螺螄堰三月張撫入貴陽接巡
撫篆兼署提督

前撫韓超提督田
與恕因教案免

檄鍾岳馳赴正安查

辦匪徒打毀釐局事遵義軍務暫付張日崙迨鍾岳返
省呈請赴豫奔喪未允四月雲貴總督勞崇光至黔查
辦教案會張撫檄委鍾岳督辦省防南路軍務三年六
月黃么驪潘名杰諸賊踞貴定圖窺省城進至觀音山
距省僅三十里九月鍾岳率軍自谷脚進軍至賴岩關
擊潰之十月賊悉衆由烏乍鋪還攻岳營岳戒部曲包
圍等堅守勿動伺隙出擊已而賊來攻興等憤而應戰
咸各奔潰賊復圍攻岳營岳分部諸軍各自爲戰勿妄
動勿牽制自率軍分道突擊之賊悉走平伐攻青岩定

番踞之先是滇督勞崇光黔撫張亮基檄鍾岳乘虛直
擣貴定賊巢鍾岳復稱賊雖分竄而潘賊實未離巢且
賊衆我寡分剿則力薄合擊又慮分擾並慮孤軍深入
無接濟之糧秣無犄角之兵力勢必潰退請率所部赴
定番與鄧爾巽等分擊請遣軍駐賴岩關觀音山以資
彈壓等語十二月定番州城果爲賊陷進逼青岩距省
咫尺勢極危鍾岳自雞場馳回檄諸軍劄上馬橋赤土
因擊退定番賊賊走騎龍司四年乙丑二月鍾岳潘賊
率衆進逼鍾岳自雞場移軍龍里守縣南虎頭山參將

張樑率軍駐龍里縣城中，調潘賊大至，遽引軍退雞場。都司唐天佑亦退黃泥哨，賊環攻鍾岳營，圍數匝，力禦一晝夜，營陷被害同殉者官吏十餘人，練勇四百餘人。賊屢爲鍾岳所創，迭攻省垣，不得志，銜之至深，必欲得之。鍾岳殉後，賊支解其屍，且剖其臟腑去，可謂慘矣。旋黔撫張據其家屬呈報殉難，批謂于道以一旅之師禦方張之寇，力竭身殉，憫惜殊深，而其於各營奔潰之後，當糧盡援絕之餘，猶能慷慨誓師，死守孤營，絕無退縮之意，臨難不苟，大節凜然，殊爲可嘉，可敬。仰候專摺奏。

請優卹以慰忠魂而勵臣節云云旋奉上諭于鍾岳照
臬司陣亡例從優賜卹嗣經部議給卹銀六百兩而蔭
襲之案以黔撫未將履歷冊報遷延十餘年及光緒十
二年始追贈爲太常寺卿給予騎都尉世職襲次完時
以恩騎尉罔替並准於死事地方及省城建立專祠云

家世

鍾岳爲襄勤公成龍七世孫襄勤子永裕字桂實襲三
等輕車都尉孫宗漢字紫亭是爲鍾岳高祖乾隆甲戌
進士改官工部充則例館提調儲濟舊太倉通運西倉

監督擢御史病卒著有來鶴堂全集十四卷錢大昕王
鳴盛邵齊熊皆重之岳之曾祖鰲圖字滄來乾隆庚寅
舉人由知縣官江蘇歷宰長洲震澤金山諸縣任徐州
府擢淮揚道湖北江安糧道以防河功加按察使銜著
有習靜軒詩文制藝二十餘卷祖卿保字輔臣號邗山
以嘉慶十五年分發東河任黃沁廳同知歷任下北祥
河蘭儀等廳道光十四年以堵禦原武陽武支河險工
由河督栗毓美奏保加知府銜二十年以病乞休僑居
輝縣蘇門山兄弟五人好吟詠著有是吾齋詩集八卷

續集四卷父崇璟字埜漁卿保長子璟弟榮光東河候補縣丞慶頤河南歸德府甯陵縣主簿皆早世璟以道光十七年部選授貴州綏陽縣知縣十八年六月舉家到黔黔撫慮其年少未諳吏事留省學習是歲冬仁懷縣賊謝法直倡亂隨總督伊里布勦賊任糧台十九年檄委代理長寨同知八月調署龍泉縣廿二年始飭赴綏陽本任居綏三年勸民種桑育蠶民皆化之廿五年解運京鉛赴京便赴衛輝省父咸豐元年調署饒安縣四年飭赴普安縣任蒞事數月巴林賊涂令恒起陷普

安縣丞分駐之新城汎承平日久兵械俱闕城中兵僅
廿一名乃修城隍完倉廩令幕客孫藕船典史馬世臣
守城世臣稱赴鄉召募竟不返環令長子鍾岳如平彝
乞師鍾毓詣鄉召團練及十一月初賊陷安南縣環知
事不可爲賦絕命詩四章付幕客孫懷出與家人訣別
初七日昧爽賊至環朝服坐堂罵賊不屈遇害行年四
十有七妻張恭人女鍾順鍾瑞鍾秀鍾岳婦司氏婢小
梅皆投繯以殉城陷後三日鍾毓泣乞練勇爲助衆感
其義咸爲効死初十日復縣城始改殮遺骸鍾岳率練

團追勦竄匪先後十二戰擒匪首劉阿閏僞軍師劉九
倫鍾岳自是始從事於軍旅鍾毓以功獲保知縣翌年
以病卒璟所著有伴石軒詩鈔鍾岳輯其散佚爲一卷

刻之黔中璟父卿保聞璟殉難有詩哀之

見是吾
齋集

同治

元年十一月卒於河南輝縣時鍾岳方題補都勻府攝
遵義縣事入省委署貴西道兼攝威甯州知州未及赴
任二月聞訃丁承重憂請假赴豫奔喪未允張撫亮基
奏留充督辦省防南路軍務轉戰龍里貴定間四年三
月遂及於難無子繼室楊僅一女小字貴格名佩蘭其

從弟鍾吉官蜀岳沒後二年生一子名延忠楊撫以爲嗣光緒十四年始獲承襲二十年其女佩蘭歸翰林院學士許澤新翌年遽卒二十三年楊以延忠官鄂赴鄂就養且扶櫬歸葬以事留滯鄂垣二十六年延忠亦卒崇璟有女弟修儒字子靜工吟詠適張氏雲裳著有靜宜吟館詩鈔卿保是吾齋續集四卷刻於同治四年即修儒所輯也

戰績

鍾岳家世儒修未嫻軍旅自其父殉難後奮志復仇自

普安勦賊擒劉阿閏後遂從張春潭太守軍時苗亂初起勢甚張咸豐六年丙辰八月龍里貴定兩縣土賊潘名杰等起應苗賊巡撫蔣霽遠檄張春潭辦近省賊鍾岳從之十二月敗賊於龍里之張萌卡七年丁巳二月與雲南都司褚克昌分擊賊於四百戶六月從張軍會巴揚阿軍解都勻之圍十一月旋省八年戊午委署正安州知州五月蒞任即飭團布防七月層巒賊踞守石笋圍秦安慶軍於野貓阡賴鍾岳援至始解十月初一日桐梓軍攻克層巒賊趙火槍三遁江炳琳復破走刺

麻硎賊賊走唐猫水岩門鍾岳援擊走之十一月申水
煙三招致黃白號諸賊圍攻上都壩卒至青家灣距州
城僅十里鍾岳方攻石笋未下聞警馳回州城檄團嚴
守而自率軍逐賊出旦平上壩連戰皆勝練目姚汝勤
禽僧勝海等賊遂退隣境婺川縣城先於九月內爲濯
水賊陷縣令阮文藻陷賊中令姪博經懷印詣岳營乞
援時賊分黨出神溪側溪鍾岳部胡先科敗之禽賊首
申三山申先靖乘勝迅發直達婺川遂復縣城救阮令
出人心始定九年己未八月江炳琳攻鼻孔賊白大滿

等鍾岳攻石筍誘禽賊首曾喜斬之九月炳琳始擒賊首穆玉朋等蟠踞螺螄六年之賊悉平十月廿二日賊陷涓潭知縣廖遇春走三度關護貴西道竇奉家檄鍾岳馳防馬頭山十一月十三日賊亟攻遵義團溪江炳琳力戰自刎十二月鍾岳擊破余家山老鴉山賊將援龍泉會廖遇春自荷包場集諸軍圖復涓潭岳遣軍功王啓瑞等攻廟壩自出牛渡河尅期會師涓潭而永興高梁賊攻龍泉甚急鍾岳遂由馬頭山破賊燈籠山三把車進攻永興場十年庚申正月初一日鍾岳與廖遇

春秦安慶鄧爾巽諸軍擊破渭潭附城賊寨遂復縣城
二月初八日鍾岳與川軍孔廣順等克濯水連破青雲
山鳳凰寨獲賊首賀世愚等渭潭賊趨遵義東南秦安
慶率練團四千餘營水涯子賊陷之鍾岳由永興場馳
援不克退李村六月賊集攻岳營於任家橋秦安慶馳
援始解八月綏陽旺里三甲曾家山教匪起與龍泉賊
應寶奉家檄鍾岳回剿十月廿八日鍾岳督團擊走簸
箕岩賊賊奔曾家山固守岳屢攻之十一年辛酉五月
解正安任以功保知府六月提督護巡撫田興恕檄候

補知府鍾岳攝綏陽縣並督辦遼綏涓甕軍務旋兼攝正安州遼義縣事常駐郡城鍾岳敗賊蟒水連攻旺草火麗山巖運樹賊營破之綏境東南略清十一月涓賊掠遼東蝦子場新舟遼義知府李德莪及鍾岳遣張師敬等以千二百人防剿蝦子場別遣練目王大珩出綏陽繖水進攻以練目彭蔚周朱榮三等西出鄭場獅子山而自率三千人由鄭場進敗賊麻家壩會大珩敗北蔚周亦爲賊攻鍾岳遣胡先海往援賊旋集攻岳營相持甚力鍾岳力禦夜出死士火其營先海在獅子山聞

警馳援合擊斃賊三百餘圍始解十二月張師敬與向
宗漢鄺光斌等破賊菜子坡鍾岳馳至留宗漢守之令
光斌守蝦子場自率師敬及吳元彪等進敗賊於新舟
同治元年壬戌鍾岳與賊相持於禹門寺數月賊不支
四月敗潰竄隆平於是岳家埧唐寶石諸賊皆走時粵
賊自四川涪州敗退竄入正桐界松坎各團望風潰退
署正安知州陳鑄告急鍾岳疾馳還遵義西北遏防五
月粵賊退叙永遵義解嚴鍾岳與沈宏富自三岔河合
勦隆平賊敗之於大錫廠六月敗之於老溝場又追敗

之於馬家河七月鍾岳擊走西平之穿洞六水洞諸賊
進軍溪田溝與宏富合攻後塢場斃賊無算閏七月粵
賊假石達開名義以二十萬衆圍攻遵義城岳聞警馳
返籌防守檄張師敬等分扼大龍山紅花岡把總鄒德
全扼董公寺自扼玉屏山並約全祖凱自南鄉趨馬坎
關邀擊已而賊大至德全軍潰賊遂攻城知府李德莪
及護協李秉皋堅守內外城鍾岳督諸軍力禦之賊始
退九月猫猫壩被圍鍾岳馳援始解二年癸亥號匪多
走踞上遵義上溪場宏富鍾岳以秦安慶軍馳防懶板

癸二月初二日賊屬集安慶戰沒進至忠莊鋪宏富時
方奉檄勦桐梓賊岳適入省委署貴西道兼攝威寧州
知州并以清鎮被圍省防喫緊留辦城防兩局二月十
九日聞其祖父卿保卒於河南輝縣呈報丁承重憂新
任黔撫張亮基由川至自遵義以秦部陷沒嚴斥宏富
鍾岳摘去頂翎勒限勦賊宏富馳回督同于部進剿連
戰皆捷遂復螺螄堰三月正安賊毀釐局集城下張撫
檄鍾岳馳往查辦以軍務付張日崙事竣返省請赴豫
奔喪不允奏留充督辦省防南路軍務三年甲子六月

苗賊入定番州城已而復出掠廣順翁貴鍾岳遣知州
德慶及定廣協副將盧希恒入城九月鍾岳自谷腳進
軍賴岩關擊潰觀音山賊山距省僅三十里十月三日
苗賊黃么驪潘名杰復由烏乍鋪還攻岳營時岳營水
橋以包興營毛栗山以都司田吉聰龍登學參將祝友
林營東關坡戒固守勿出十六日賊分撲各營興先潰
登學吉聰皆陣沒友林潰退王官死亡頗衆越日力攻
岳營岳令賀朝岡李得貴顧世鰲周通等預定部伍分
道接戰不爲動已而賊卻分踞龍里城校場埧觀音山

岳部衆乘賊不備分道出擊賊潰走平伐十月廿一日
戰再入定番城官吏皆遁鍾岳由青岩馳至與賊戰城
下賊敗入城先是巡撫張亮基檄鍾岳乘賊四出徑擣
貴定老巢岳復稱賊衆我寡分剿則軍力單薄合擊則
道路紛歧如果直搗貴定則谷脚以至甕城橋一帶必
須剗有連營我軍過河營牟珠洞規取貴定以十餘營
環攻斷其樵汲若孤軍深入勢必糧盡潰退不可收拾
竊以爲定番羅斛諸屬乃省城儲糧之區今年三次被
擾不久又將復來擬請率所部赴定番與鄧道爾巽分

擊務使賊不入南路如無人之境請遣一軍駐賴岩關
或觀音山暫資彈壓等語岳所稱諸地皆省垣附近衝
要既以防賊兼顧根本也十二月十八日賊果復陷定
番城鍾岳與力戰賊屢攻之不得逞張撫納鍾岳議檄
都司張樑自鎮江屯移觀音山未幾賊逼青岩鍾岳自
雞場馳回擊退之賊走騎龍司去四年乙丑正月岳自
雞場移軍龍里扼縣南虎頭山張樑及都司唐天佑先
後至駐縣城苗酋潘名杰合衆進逼張樑誦知潘賊將
悉衆至遽退走雞場鍾岳檄天佑及李勝山來援天佑

亦退黃泥哨二月初三日賊大至環攻鍾岳營數匝力禦一晝夜營陷被害賊支解之剖其臟腑去從死者都司吳定邦以下官弁數十人練勇四百餘人蓋鍾岳從戎十載屢復州郡而正安遵義皆力保孤城使賊受挫其保障省垣之功尤不可沒故賊銜之甚深必欲得之而後已是役以援軍不力遂致蹉跌出師未捷長城遽壞良可痛也

文藝

鍾岳以清門世胄雅好讀書所至與賢士大夫交游往

往見之吟詠所著西笑山房詩鈔曰游梁小草兩卷凡古近體詩八十一首皆道光二十九年己酉省親時所作曰黔南集五卷凡古近體詩一百八十一首爲道光三十年庚戌迄咸豐七年丁巳之作曰正安集兩卷凡古近體詩一百三十二首爲咸豐八年戊午迄十年庚申之作皆刻於正安詩中如詠甲秀樓鐵柱百韻玉盃歌猛虎行縛狐行蠻王硯歌及雜詩放言諸詩或足備史乘或足覘所學惜庚申以後倥傯兵間無暇吟賞然據其叢殘中有曰隨筆疏記者所見良吏忠義一記其

姓名略歷其以爲良能者如鄧應台平翰姚柬之孫瀛
等凡八人其以爲忠義者如容保泰沈世良周夔等凡
四十餘人而手鈔唐書列傳自房杜而下百數十人所
見佚聞典故楹聯亦各分類紀錄不憚煩瑣又擬編著
文稿數十篇茲錄其成篇者如左

尹先生祠堂碑 鳳鳴書院碑 賀長齡別傳 記

貴州提督孝順都勻殉難事 記貴州遵義縣令江

公炳琳死難事狀 記烏蘭泰佚事 記向欣然軍

門佚事 記僧忠親王佚事 記大定府姚柬之佚

事 祭祖父文 先大夫事略 邗山公哀啓

其待撰而未成篇者如左

林少穆宮保 胡詠之中丞 松相國筠遺事 唐

子方先生

附史方
陶廷杰
相唐子
伯事

楊繼業家譜考 昭

通總兵普陀保事 稽峻生總戎克昌 田雪樵先

生溥 聶松島先生會通 張春岩先生問政 提

督佟攀梅字詩橋 蔣玉龍字雲奇 蔣濂生中丞

爵遠 韓南溪超 福韻濤連 徐梅橋川督記培

養川中元氣事 琦善記見州縣事 王雁汀慶雲

書吳蘭雪先生嵩梁事 書大錯和尚事

伏義附和論

書司樂齋先生爲善 記紅巖碑 書恒菊坡文義

僕 書貴定武生李鶴齡事 顧國如羅星臣合傳

記先大夫靈蹟 興義府知府張公傳

其擬具奏疏文稿而未成者如左

務本論

言舍治民而言治兵舍富民而言利舍內憂而捍患侮舍賞罰而言法令皆非也 自注

惟家教可貽子孫論 虛名必敗論 擬請與天下

賢能共利害轉危爲安奏疏 擬請督撫必須由知

兵州縣出身詞臣不可重用文武官員擇其才兼文

武者准加部銜互相節制提鎮准督撫咨調奏疏

擬大學士吏戶兵三部尙書軍機大臣均用軍務出身謀勇兼優之員奏疏 擬請州縣賢員仍照舊例

准行取御史給事中等官奏疏 擬鄉試考試分別

由巡撫道員專政不設督學主考以除積弊而省浮

糜奏疏 擬請嚴禁大吏苞苴苛派供應核計州縣

歲入大員減養廉五或苦缺州縣加養廉三倍以勵

官常而蘇民困杜弊端而裕國用奏疏 擬請犯罪

人免招解免朝審以省往返仍設各省監察御史隨

時察訪黜陟奏疏

此外尙擬著乙丙從戎紀略其目如左

守烏雞關紀略 平岡度紀略 破亡寨紀略 從

戎都勻紀略 記鄉團 記戰 記勇士 記賊情

記地勢 稟報存 書札存 附稟批 附覆信

又擬著羨言其目如左

平苗議 鄉團利害 兵情 練情 賊情 州縣

都守 賞罰 籌餉 用人 屯田 善後 總論

提鎮

鍾岳著述之可見者大略如此其志趣忠純抱負遠大
概可想見惜中道殞身未克一展其夙抱至爲可惜然
其家世儒修自高祖以次咸有著述流傳茲撮錄其目
如左

來鶴堂集

鍾岳全集刊於嘉慶丁巳計詩集六卷甲戌
進士全

餘二卷錢竹汀序稱賦鈔二卷情標格與韋左
藝一卷

司同王西莊稱其古澹閑遠不襲前人而
貌而得其神理邵齊熊稱其淳古澹泊盛

唐名家不是過皆當世名流與瑛同年者
也瑛女名潔字若素字宗室魁明年二十

一歲即守節有詩贈其兄
鰲圖晚晴簃詩匯錄之

習靜軒集

鍾岳曾祖熬圖著圖字滄來乾隆舉人官至江蘇按察使全圖計文集二卷凡四官

十餘首嘉慶丁卯崔鶴家爲之叙詩則南來集二卷乾隆五十年自京往蘇歷官震

澤金山長洲常熟引之作曰婁東詩草五卷則官太倉州入都見及歸婁東之作曰

彭城詩草四卷則官徐州太守之嘉慶八年錢竹汀爲之序曰袁浦詩草三卷則

嘉慶丙寅官淮陽道巡河之作曰兩至金閨詩草三卷則嘉慶道辰河之作曰兩至金

江吟草一卷曰金陵吟詩草三卷曰木蘭堂吟草二卷曰三卷則木蘭堂

慶十三年所刻有陳鴻壽劉台斗爲之跋又制藝一卷爲文十篇壽大抵治舉業時

所作

是吾齋初集八卷續集四卷

鍾岳祖卿保著卿保字邦山初集爲卿保自刊

蓋宦游防河時所著次女續集四卷則致仕後
隱居蘇門時所著次女脩儒於同治四年
爲之校刻大都咸豐季年府之皆有詩存崇
殉難普安孫鍾岳獲保知府皆有其詩存集
中

伴石軒詩鈔二卷

鍾岳父崇環著庚子詩在分貴州下綏陽

縣已多言卯貢之金北途稿初未刻詩以下卷止於

劉之始及殉節後鍾岳序有咸豐五年自劉吉

光井趙公琴鶴以携去則當妖氛熒火將

楚國以同殃幸而元晏序遲論衡竅秘一
則斑可窺之散金并重苟實錄也無緣
則廣陵之散金并重苟實錄也無緣

西笑山房集六卷

鍾岳著刻之黔南中曰游官黔小時蓋

作其集寫刻較精
莫庭芝有題詞

靜宜吟館詩鈔一卷

卿保次女脩儒著脩字子進
歸張雲裳爲室其父有詩送之

及同治己巳扶上世九棺歸葬以詩問業
於膠州柯太夫人李錡齋成詩壹百數十
首中有與嫂氏唱和之作其刻是吾齋續
集時以文姬自况亦可謂中郎有女矣

于氏五代著述如此然鍾岳生前欲求來鶴堂習靜軒
諸集而不得其殘稿中有乞人蒐求之語又其藏書目
中亦不獲見近讀蒙古恩詠春君八旗藝文編目始一
一蹤跡得之此亦鍾岳九原所忻許者也

政聲

鍾岳宰正安時羣盜如毛鄉里爲墟故下車後汲汲以勞來良民練團禦侮爲事及官遵義則築寨卻敵尤爲賢士大夫所稱道而勤惜民隱不憚慷慨直陳茲就其遺牘中撮錄一二其目如左

稟遵義府夾單 勸良民歸里示 開誠布公曉諭

告示 修築屯營禦匪事 畫界分團諭 團規

宣上功德勸化鄉民示 給王述甫等札 通稟辦

釐捐米無効請撤參治罪 貴陽城防條議稿 代

貴州巡撫咨提督軍門劄飭各鎮稿 辭總辦遵湄

綏防務稟 遵札進繳螺螄賊匪並籌辦攻擊各硃

稟 通稟各憲葵匪上竄並呈繳葵川縣印稟

鍾岳從政日少公牘無多然即就諸牘論其撫字心勞
催科政拙之情灼然可見其守遵義時用堅壁清野之
策築寨以抗強賊黔匪之平胥用此術當時黔之紳儒
如黎庶昌鄭珍諸人或著爲文章形之歌詠亦有見之
志乘公牘者茲摘錄如左

黎庶昌禹門築寨始末記

節錄紀于
伯英政績

是歲也

咸豐
十年

廣西賊僞翼王石達開自泗城竄入興

義貞豐破廣順走黔西大定窺四川而提督田興恕
爲欽差大臣剿賊檄總兵沈宏富統虎威軍進攻玉
華山相持年餘不克退還遵義初平越人吳元彪以
策干蔣公玉龍蔣公謂其有反相不用又走遵義說
當事當事者悅之命將二千人往屯高臺窰上元彪
爲人沉勇有急智數計窘賊賊恨之甚合黨絕其餉
道元彪乏食引還秦公安慶解湄潭任先鋒營亦散
遵義防弛十一年冬黃號賊乘勢趨渡上關安白兩
號賊趨三渡關五里坎大板角分道入寇從兄兆祺

縣人張師敬各率鄉勇禦賊於高洞子三渡關皆潰
於是張保山據七星坡楊和豐據驪龍壩連營百餘
里綏陽縣令于公鍾岳兼攝遵義湄潭正安三州縣
事親率所部駐禹門分遣把總吳元彪都司鄒開桂
屯金盆山馬鞍山沈宏富亦遣都司左近光屯宋家
壩吳元彪攻賊於皂角堰以除夕拔之報龍大勝于
公方移屯而宋家壩不守他鄉勇之往營牛心山者
亦不能軍僞秦王張保山逕由楊柳田上據禹門寺
同治元年正月十日也于公還軍綠塘河余兄庶燾

亦募勇出張飛壠約周開桂三面急攻賊遁仍復禹門寺吳元彪攻拔闌牛坎驢龍壩疾襲張保山走之遂營七星坡正安人胡先紹先科率團練來援破賊於麻家場遵義復無賊然險隘俱習賊時去時來不常其得失來則所在焚掠團練禦之亦退由是築寨之議興矣于公之任遵義也屢勸鄉人仿古堅壁清野法修築寨堡自衛示三出而衆莫應至是余兄庶蕃從兄兆祺及里人劉漢英首任斯舉相度形勢就禹門寺築寨鳩工積石閱五月而寨成爲門者四濠

牆樓堞皆具歸然一方重鎮矣同時興起者則有綠塘河白泡塘新舟場馬鞍山龍坑等以數十計而禹門爲最大東隅里則有東臯東勝東平等以數十計而東臯爲最大置守粗備秋閏八月石達開者再由四川入遵義稱號十萬逼郡城城無現糧大恐于公檄調禹門團練助濟軍食兆祺以三百人運糧往與賊黨遇於朱泥壩力戰一日夜卒護入城人心始定鄒開桂屯城外紅花岡賊張黃蓋登插旗山以瞰城城上發礮轟擊稍稍引卻又爭開桂壘開桂出戰殺

數人賊無意攻城數日釋圍西走所過鄉寨有施放鎗砲者輒搖手止之或僅索酒食復趨大定入雲南其餘迫近禹門兆祺禦之緞水敗還再發精卒要之賊已不宿而去

下略

鄭珍閩八紀事百韻

錄柴翁寫贈于伯英墨稿

嗚呼同治元我縣禍何劇周方百里地衆矢注一的
涓冠退東南粵賊進西北粵郤涓復來涓去粵仍逼
屈指廿四旬攻禦罕甯刻官能幾何勞民有幾何力
而粵賊此來吉凶叵測毛面十萬餘所至如蝗蝻

出入無定途宿頓無營壁夜行速如鬼猝至誰及敵
苞人毆牛馬踐處聽所躡更聞善穴城鉦鼓令人惑
壕邊作女樂地底行魑蜮全蜀兵賦雄僅能失其域
我縣彫翹餘何以能阻格吾弟唐鄂生奈何不善億
帶甲二萬人追奔出符隄意令走巴涪豈料禍鄉國
蜀軍及溫水賊犯播川驛兩道驅我縣大樓失險阨
維時閏初十已至龍厓側鬼妾擁牲離鬼馬載金帛
前水復後水羣羣來絡繹取道徑水西意於我乎惜
蝮虺所經過甯能免蜚螫嗟我婦與子聞聲各逃匿

或他里或城艇急更暇擇爭命泥雨中何方爲樂適

賊心浸狡變稍稍窺城洩羣情亦蒼黃官吏殊震競

槃槃于大夫西還不動色謂我士我民此斷不宜擊

我械無萬刀我儲無百石但無搖我城過我任旗獲

然彼甯有足豺獠不忘食但我兩城民披胸

年譜作表裏

一肝膈堅守待其動是爲根本策我師正東伐出遠

與涓寇扼馳調張

思敬鄒開桂

軍鄔隊

德全

亦來即

雷砮鞏安關風高紅花柵鼓角接湘山表裏耀旌戟

城人盡登陴一境十頭額豈無飢與寒心胆誓同感

北門李太守巡拊增感激南門李都司部旅聽指勅
吾弟黎叔吉饒餽赴圍圍微爾識體要軍食仍孔棘
劉際昇李品蘭三四君董勸極籌擘微爾日夜勤守
令誰羽翼我誠念我訓人和師必克賊乃侮我弱壓
豚詔牛瘠豈識中有人非虞公井伯十九臨我郭東
北滿旗幟翌更上碧雲衆峯如蟻織飛礮斷首足朱
蓋倚崖踣我師猛如虎手到即斬馘捉活必雙擒仇
頭亂拋擲明日更大合窺我西南隙我師益虓怒七
遇髮皆植呼聲山岳動殺氣天地黑賊窮失弓罵料

我當倦亟六道攻紅花鼠智亦難逆張鄒信能軍一
鼓褫羣魄逆渠石達開捩眼窺且嚇悔歎昧一來快
手棄堪惜自此伐賊謀我罔無敢陟前驅旣鱗鱗後
至仍戢戢畏我斷其後四郊故游奕撓我城守人保
固不遑轂豈知十全師不進寸退尺月終賊亦去此
難堪太息凡賊之過所空空曠阡陌掠我貨與賄不
知若干直虜我男與女不知幾千百盡室或驅去父
子不相覲舉家或屠殺身首不相識避洞死於薰入
溪死於溺五鄉何蕭條四隅尤慘極賊所棄蔬穀練

卒罄搜索賊所棄牲畜練卒罄鞬勒賊所餘屋舍土
寇繼燬折存者何以歸歸者何以殖昊天胡不仁生
理可哀惻慤懃于大夫結砦諭疇昔慮始自古難救
時實良畫若能共急作保衛其家嗇未必禁賊來扞
禦終有益不見紅髮臺賊攻一無得不見海龍壘賊
望先辟易桃坪及吳村更有戰勝績制賊與制練著
驗已明燼奈何一因循致受彌天厄既往不可咎來
者宜取則我無先人學足感黃巾賊衆人以師故一
家獨免役休戚父母邦豈曰非吾責朝暮上城頭粥

寒不暇喫今朝喜初靜稍可弄筆墨大事安可忘巨

刼心暗盡善後當若何邦君賴仁德

此據鄭君手稿後來刻入先生

集中補遺者字句微有異同

正安州志咸同軍事始末

錄自續正安州志師旅門

正安土庶沐朝廷教育人心渾厚風氣寬柔士樂詩

書民安耕織八千里外巖邑享昇平福二百餘年雖

唐虞不及此然治極亂生成豐四年十一月初四日

桐梓螺螄逆首梁三發財梁得泮梁敗鴻楊二將軍

王大批子王五閭亡涂三魁張麻貴張大不不余麻

鄉約曾喜等糾衆圍攻州城民不知兵驚惶竄匿州
牧胡祖寅把總李秉皋帥練丁二百餘名死守空城
十四日賊布雲梯由西南兩面先登城中督隊衝擊
圍始解士民見賊奔胆遂壯跟踪追戮抵穴勦擒攻
螺螄埧紅溪河葬子玢關上塘泡水明塘六洞圍殲
渠魁梁得泮等七人余麻鄉約張大不不曾喜三犯
逃匿無踪越次年五月安民凱撤八月胡祖寅卸事
州牧朱百谷蒞任甫下車擒斬渭逆吳大刀劉大鼻
子殲戮逆黨無遺六年嚴保甲防堵之政得士民親

上之心七年花池教匪夏明聚衆叛三月十一十六
等日朱百谷督團練討平之四境無事八年州牧于
鍾岳來牧斯土六月葵逆申三山糾賊掠州境于鍾
岳帥師追至葵屬江邊而還又桐逆梁三童結連思
南號匪白大滿螺螄餘孽曾喜余麻鄉約張大不
等盤據螺螄石筍鼻孔山等處擾州西陲因設局委
紳餉募精練千餘帶幹團數千進剿賊巢冬十一月
葵逆申三山申水煙三竊據葵城糾集思南葵涓叛
黨逼擾州治于鍾岳由螺螄回師迎頭力剿跟踪至

葵境砂窩賊集強寇數萬四面圍攻于鍾岳奮勇督
戰如虎撲羊血流漂杵斬申三山生獲申水煙三三
子安撫脅黨克復葵川縣城數百里陷地一旦肅清
十二月隨即進剿葵屬溜水逆賀濟泮逆砦四十望
風投誠九年二月初一日復攻螺螄剿除元凶招安
從賊桐匪悉平十二月渭逆侵州南鄙于鍾岳以全
勝之師乘破竹之勢收復渭潭縣城解龍泉縣圍十
年兵分兩路一勦綏陽山賊一洗渭潭餘氛曾家山
圍山諸寇盡平招徠渭潭流民回籍共給穀種三百

餘石與耕牛三百餘頭在事出力紳團等公皆請獎
雖賞不酬勞因公之限於力也十一年州牧陳鑄臨
任委局紳籌欸留鎮軍吳安康大隊遠攻渭潭屬聚
寶場之賊砦龍鳳二營生擒逆首陳四古董山賊平

下略

正安州紳民胡先海等稟狀

據于氏家藏
叢殘文件

具稟狀遵義府正安州江甲一二里知州胡先海都
司胡先紹胡先科舉人馮其原訓導馮思麒馮慶霞
鄭逢源主簿蕭九成駱遠清生員馮汝俊等爲稟請

札飭聯團修寨以保地方事緣咸豐八年桐匪爲亂
生等奉札齊團防堵富者捐貲貧者出力數年越剿
稍獲清平殊兵燹之餘繼以凶歲瓜期難追究莫振
其兵威榮色多憂疇能當此重任此生等欲保地方
而不克保者情也幸蒙前縣主于公蒞任斯土深識
輿情爲我州之後慮下未雨之綢繆嚴飭各團修寨
防堵無如勸之諄諄聽之渺渺不惟不聯營以禦盜
賊反結黨以肆爪牙雖生等謹遵上諭苦化鄉愚自
出千金僅成三寨刁唆反捏上控以惑人心奸詭者

于鍾岳別傳

每聳下愚而逞橫惡由是人心日疲賊風愈熾此生
之欲保地方而不克保者勢也慘於本年十月十六
日涓賊蜂湧而來燒燬我民房搶掠我民命逃竄者
呼天無路被殺者掘地無門血染成河骨堆山嶺牧
斯民者僅閉城而坐觀任斯局者亦束手而無策生
實目擊心傷實有不忍言者也生 圍攻數日捐資

苦守幸獲無虞雖叨暫時之安仍蒙于道之福也

略下

交此稟上之同治二年于已去任然仍
推其築寨之功論固不混也

當鍾岳牧正安時雖兵事倥傯亦偶與邑中儒紳講論

文藝其遺牘中有正安人士歌頌之詩及投贈之作茲
移錄如左

徐以清詩六首

徐字子垣稱治
晚生恭步元韻

萬姓齊呼杜母賢
鏡歌三唱始停鞭
勤勞報國無遺恨
清白傳家有夙緣
氣稟精忠能貫日
兵行仁義可回天
壺漿夾道爭迎獻
遙聽謳聲一路連

纔課詩書又課耕
絃歌雅化奏承平
胸中定力回元氣
筆底餘波寫性情
公子出身賢父母
循良報最舊家聲
功成重至今何幸
桃李春風徧滿城

于鍾岳別傳

挾持有據快登場小試牛刀件件長料敵咸稱名將
相宣猷無異古循良高竈鸞鳳何關翅得路驂騑不
待繯祇恐他年推轂遠重迎有願費思量

誰佐平黔第一功漢家廷尉重于公勲成烏道千盤
上身是金精百鍊中氣運能回爭勝算人心可挽得
英雄有緣最愛天邊月三度旌旗照眼紅

掃却煙塵靜海波洗兵直欲挽銀河遙知四野歡聲
動豈但三軍喜氣多黔省早修平定表珍州齊唱凱
旋歌錦囊愧乏如椽筆詩擬攻車賦止戈

襟期瀟灑許誰同握算持籌事事工緩帶輕裘羊叔
度綸巾羽扇武侯風登堂共識心如水臨陣常懷氣
似虹寫入凌煙圖畫裏天顏有喜燕彤弓

胡炳文詩四首

稱治下貢生
俱言恭頌

豈是孫吳善用兵身經百戰妙權衡南征不惜勞鞍

馬東略何曾問死生

大人歷勦樂安龍坪東
南兩處皆賴其平靜

士統三

千欽偉績胸藏十萬籌先聲

正安綏陽賊
皆畏其威名

運籌定有

安危計醜虜還看指顧平

琴堂化洽歎官清課最偏隅政有聲聽訟如蘇徵淑

問得情師召仰神明懲奸摘伏永心抱盡相窮形鐵
面生自是豚魚皆可格榮陰黍雨更重賡

簪纓世胄不尋常治郡聲名日月光淹雅風流窺李
杜文章著作羨蘇黃他年七屬傳經濟此日三遷重
廟廊簡在帝心天下福勳猷豈止贊黔疆

公惠廉明化理新憐才愛士見深仁人蒙作育承恩
厚

大人每考月課列前茅者皆獲厚賜

我歎單寒待澤真遙想雲霓無

失望須知花木又逢春從今得荷栽培力愷悌長懷

待拊循

陳瑄七古詩一首

自稱治愚晚生恭跋伯英
觀察西笑山房詩集後

我得公詩盥手讀更賜金篦先刮目莫言餘事作詩
人公詩乃自性真出公本京華貴公子詩書氣味入
冠玉一門累葉畫凌烟朝回滿牀盡牙笏不爲仙吏
居蓬萊萬里趨庭歷楚蜀笑吞雲夢已八九七千里
路閱歷足黔山青青黔江鳴誰施健筆開殊俗青蓮
去後青螺死此事非公果誰屬佳句驚人携問天笥
興餐盡萬山綠無端城闕烟塵生尊人殉難盤江曲
烈烈正氣干雲霄大節全家共一哭我公墨經初從

戎馬上殺賊如破竹天荒地老鬼神愁萬里精誠動
黃屋壯哉男兒生世間忠孝難得一家獨我聞此語
心凜然浩歌不覺淚盈掬豈意挽回天地手翻令小
用來出牧爾時攝篆樂源城軍需旁午相迫促身經
百戰不惜死平婺平桐奏功速手辣只爲搗賊巢心
慈只爲恤民瘼有時落筆聲動心外挺奇姿內仁術
元結春陵杜石壕公門桃李口能述我時北上來此
邦曾竭愚忱誌銘服今年賜我全豹窺始知字字悉
實錄立德立功兼立言二百年來指一屈如此奇才

古云難俯視公等總碌碌我欲辦香學頂禮驚駘早
見驂騑伏此編一出千黃金況有泉源蓄萬斛

蕭光遠紀亂詩

錄蕭鹿山先生全集

蜀人苦短轡黔人忌長毛毛賊竄桐境氣陵遵北郊
時維四月中村村插良苗農務各自勤猥云賊尙遙
近守木坊營遠恃鐵索橋賊行速如鬼不壘亦不濠
馬騰蹄踣鐵豺噬口銜刀布藜足不傷投刃虜不撓
虜踰萬夫衆吾敢一勝饒暴風捲營柵賊兆心私怗
平明未罄食駭見髮森森練目遽先奔團丁誰再招

此敗雖人事此輩亦天驕于公來視師迎擊斬其梟
虜衆若蜂擁我寡誠難逃軍有全國法師占左次爻
中夜又驚起市虎百□□力護我行寸鐵不曾操
飛箭思魯連投筆媿班超書生不知兵北山騰笑嘲
賊由北而西十室九悲號我當禦寇時咫尺鋒刃交
事過轉心悸聊用作歌謠

以上諸作大都親歷匪患或躬與戰役者所言良足爲
信史之徵非泛常去思歌誦之詞也

遺聞

與鍾岳同日殉難者有都司吳正邦把總楊桂芳苗德
生守備彭鏞周鳳鳴外委彭兆桐貴陽營千總顧世鼇
黔西營千總林朝榮古州鎮標外委劉文兆候選府經
歷縣丞曾晉從九張鴻賓生員吳錫光僧生徐濬及家
人余庸等練勇四百餘人黔撫張亮基爲之奏請優卹
以未具履歷事狀部吏復故爲留難延至光緒十二年
黔亂就平黔撫林肇元咨催吏部并由家屬具呈聲明
旋奉上諭准追贈太常寺卿照副將例給予騎都尉世
職襲次完時以恩騎尉世襲罔替並准於死事地方及

省城建立專祠其隨同陣亡員弁兵勇一併附祀然鍾岳身後無子僅餘妻楊氏女佩蘭楊賢而知禮岳歿後二年楊以岳從弟鍾吉妾生子延忠爲嗣忠字穉英光緒十四年承襲世職納貲以通判候選投効山東河工以修隄出力經巡撫張曜奏保以同知選用復隨張文襄於湖北節署供差鍾岳殉後部議給予卹金六百兩迄未發給光緒十年延忠稟請卹欸僅獲百金及光緒十二年七月始自黔扶輓回京時鍾岳之七叔字鐵香者在京官密雲□□□係本枝尊親屬爲之營葬庇居

僅獲小康迨延忠卜仕遠遊岳妻女熒熒相依至光緒二十年始以佩蘭字於翰林院學士貴筑許澤新爲繼室翌年病卒楊復就養延忠鄂廬至光緒廿六年延忠又不幸病逝子然無依賴張文襄佐助暫滯鄂中旋致書其壻許學士遣僕返歸京邸依許爲活又撫延忠子繼勛爲嗣孫襲蔭世職鼎革以後亦不能世其家楊於民國四年卒時已七十有奇于氏叢殘文牘悉楊自黔携歸與女鄭重保藏從不輕以示人楊歿後繼勛貧不能守乃散出于氏累世忠貞而其後零落如此天道誠

不可知然此區區殘稿俾吾輩得掇拾於灰燼之餘使其不致泯滅者斯獨非于氏忠魂所默相耶

于鍾岳別傳稿終

黔南叢書別集

伯英遺稿

貴陽邢端署

癸未歲夏六月

紫江朱氏印行

伯英遺稿卷一

鐵嶺于鍾岳著

貴陽邢端編次

碑記

尹道眞先生務本堂碑記

漢儒尹先生務本堂在正安州城東一百二十里江七甲明萬
歷四十年遵義府知府孫公敏政重建祠宇國朝康熙二十四
年遵義府知府陳公師沅嘉慶二十年正安州知州趙公宜霽
又兩新之歲久將替前任正安州知州朱百谷思有以建堂作
室謀諸邑人士功未竟也岳以咸豐八年來署州事踵朱公未
竟之緒逾年歲事邑人士請磨石記其始末謹按先生諱珍字

道眞後漢書西南夷傳桓帝時郡人尹珍自以生於荒裔不知禮義乃從汝南許慎應奉受經書圖緯學成還鄉里教授於是南域始有學焉珍官至荊州刺史華陽國志序志文學荊州刺史尹珍字道眞母歛人又南中志明章之世母歛人尹珍字道眞以生遐裔未漸庠序乃遠從汝南許叔重受五經又師事應世叔學圖緯通三才還教授於是南域始有學焉珍以經術選用歷尙書丞郎荊州刺史而世叔爲司隸校尉攷明章二字當是桓帝之誤應奉曾祖在和帝時爲河南尹已在章帝後奉以桓帝永興元年平武陵蠻爲司隸校尉可知桓帝時爲是然則先生桓帝時人也後漢書不言先生爲母歛人而華陽國志南

中志言之遵義知府趙遵律有尹珍攷謂今之正安即唐之珍
州唐之珍州即漢之毋歛然則先生漢毋歛今正安州人也而
鄭孝廉珍修遵義府志以爲非是鄭氏謂毋歛在今都勻貴陽
兩府間正安州漢甞縣地唐溱州東境珍州東北境兼播州芙
蓉縣地宋西高州及珍州樂源縣地

州有樂源井大旱不涸

皆不謬獨以

正安州爲漢甞縣地以都勻貴陽間爲漢毋歛縣地此因前書

牂牁郡毋歛下剛水東至潭中入潭鬱林郡定周下水首受毋

歛東入潭行七百九十里鄭氏旣稱剛水出今貴州獨山州故

疑毋歛在都勻貴陽兩府間也又牂牁郡甞下不狼山甞水所

出鄭氏於不狼山以今桐梓縣婁山關綏陽縣朗山關當之稱

婁山朗山爲不狼山之訛夫以今之水道求漢縣地未爲無見然毋歛之剛水未必出自獨山奚以知其然也前書毋歛下剛水東至潭中入潭言由潭中而後入潭則潭中非定周之潭可知下一潭字乃定周之潭且東至潭中入潭不言道里遠近則剛水出獨山與否不可知也暨水東入沅過郡二行七百三十里今婁山關狼山關無巨川其牂牁諸浸匯爲巨川以入沅者又不僅七百三十里然則以暨水證暨縣暨水且不足恃謂正安州爲漢暨縣無疑可乎且以婁山朗山爲不狼山之訛尤爲無稽古今水名互有同異蓋夷夏殊音文人稱述不一未可以臆度也大抵西漢始建牂牁郡縣畫野分民大致而已水道則

細流統乎巨浸或沉受之或鬱受之皆泮荆夜郎且蘭之水也是不足爲證也尹先生之出西南夷既有明文矣今遵義府爲西南夷地無疑也後漢書旣舉磐縣又舉毋斂則兩縣之相鄰又可知也以提封言之今正安州綏陽縣提封各五百餘里今遵義府提封千餘里恐非一磐縣所能罄也磐縣旣與毋斂爲隣則今正安州東北偏之地隣今貴州桐梓縣四川南川縣庸詎知非漢毋斂地乎然是說也鄭氏必謂此曲說無確據也今都勻貴陽間無人道及尹先生者僅鄉賢祠春秋一祭而已正安州則有務本堂復有先生墓有殘缺銅碑土人能道先生生年月日時去城一百二十里土人猶歲時奉祀惟謹祀於城或

疑爲好事者所爲祀於窮鄉僻壤此非附會者所能形似也蓋
牂牁一郡於全黔最早去蜀最近其被文教亦必最先非如都
勻貴陽間苗夷土著衣斑斕而語侏儻也岳故謂牂牁郡十七
縣地近在烏江以內以江爲徼不遠及都勻獨山也獨山都勻
間有附乎中國者必隸乎鬱林蒼梧象諸郡如今之荔波縣疑
即漢蒼梧郡下荔浦也岳又讀趙公遵律所撰尹珍攷謂前漢
牂牁郡十七邑後漢十六邑晉書牂牁郡八縣宋書牂牁太守
領六縣南齊南牂牁郡領六縣毋斂且蘭皆隸焉且引宋田景
遷州多災疹請改州名因改爲西高州是故爲悠謬之說隱寄
易名之義爲證據以斷定先生爲正安州人無疑鄭氏以爲唐

貞觀十七年置播川鎮以川中有降珍山因以鎮爲珍州

據太平御

覽引十道志

謂先生爲珍州樂源人者蓋由景重前賢唯恐非我邦

所有致以唐人州郡強作漢儒鄉里岳按南齊時牂牁纔領六縣而且蘭毋歛縣屬焉則是且蘭毋歛二縣不離乎遵義府者近是貞觀十三年以播州爲播川郡十六年以芙蓉瑯川隸播州十七年置播川鎮即以鎮爲珍州領營德夜郎麗皋樂源四縣可知今遵義府即唐之珍州南齊與漢之牂牁郡也今正安州桐梓縣綏陽縣遵義縣即唐之營德夜郎麗皋樂源四縣南齊之且蘭毋歛等六縣也南齊之毋歛即漢之毋歛此理之無可疑論之不可易者此四州縣中何以獨定正安爲漢毋歛也

攷四川省志以先生爲今南川縣人綦江縣志以先生爲綦江縣人綏陽縣志以先生爲今綏陽縣人正安州志以先生爲漢毋歛即今正安州人相爭者南川綦江綏陽正安也都勻貴陽言之者且無豈竄無爭者爭者之所在即先生鄉邦之所在也今先生祠墓在正安境內而於南川綦江兩縣實近且毋歛壩在焉以此知先生之必生於斯也且唐至今未遠也國家禮樂兵刑多仿唐制居今之世考漢之縣舍唐宋其奚由唐宋所述我可因焉唐宋不稱我無徵焉宋太祖開寶元年改珍州爲西高州仍名夜郎郡領夜郎麗皋營德樂源四縣隸夔州路此尤足證毋歛之不在貴陽都勻間而與巴涪夔巫相近也

後書附先生事

於群荆及公孫述時大姓龍傳董尹事下叙群荆又絕不與武陵象郡交趾鬱林諸蠻牽混可知群荆之近蜀矣即以今風俗攷邕遼義一府衣冠文物與都勻獨山之羣苗雜處時出擄掠者不可同年而語可知西南夷文教之倡都勻獨山斷斷乎不能先遼義也又按晉謝恕亦母斂人其事迹功業多著於涪陵江間又可證母斂之近巴郡而遠鬱林也今之攷據往往以羣書遷就已之私見宰割秦漢郡縣移易鄧侯食邑自以爲博其實皆優戲來敏也即以尹先生之故里論雖三尺童子皆知爲今正安州某鄉人而宿士反多悠謬無他一執卷而求一得之父老口授此史遷之所以遨遊名山大川詢問故老然後成一家言也國朝去東漢幾二千年而欲以酈道元水經注前漢書註寥寥數語定西漢蠻夷中鑿空之郡縣四至猶兩小兒以炎涼大小辨初日遠近也岳力辨先生爲正安州人已

蹈聚訟習不免爲通人嗤然舍考據執理而談亦不敢謂先生
非今正安州也何則孔子之徒魯人爲多文王之化江漢居後
綏陽有講堂之基南川綦江以名賢入志正安則祠墓在焉州
轄橋溪河多先生子孫能道先生生年月日時歲歲奉祀先生
之教化於正安有獨深知先生之遺迹在近隣爲較著亦足考
鄭公之鄉破襄陽昌黎之謬矣旣叙述其事以備來者參攷乃
作贊曰昔在新莽禮壞樂崩世祖光武嗜經求文負墳抱策聚
風屯雲范陳鄭杜衛劉桓孫濟濟洋洋盛於永平偉哉長解
字說文羽翼經傳厥功惟尊司隸校尉圖析緯分威討惠降克
平詹山推攷厥時永興之元矯矯先生東京靡羣毋歛之瑛珍

山之現北學中國許墻應門學開天荒文回日曛入爲丞郎出
實牧荆湯湯江漢猶歌古循德教所浹故鄉爲肫土人所祀雖
野實虔後世景重擣播名賢或衣冠葬猶指爲眞漢之毋歛爲
唐之珍今之正安子姓實繁後儒好奇以爲都勻引班證酈文
彩鋪葦是皆末化撾鼓雷門先生之道靡世不存先生之化靡
方不分講堂有基高塚祁連是其所生正安近焉前有千禩後
有萬年敬述顛末以待來賢珍山嵯峨樂源清漣流連徘徊用

成斯篇

咸豐十年歲在庚申閏
三月記據正安州志補

鳴鳳書院碑記

鳴鳳書院前牧羅君所建歲久傾圯岳以咸豐八年戊午下車

徘徊兩廡間思有以新之明年冬邑紳達君陶江丹林鳩工庀材晝夜併工爲堂爲寢爲左右夾室爲庖馐祗廡籬土易桷櫨楹髹壁州無考棚即增置案几爲扁試地庚申清明前獻室有日矣因進諸生而詔之曰國家建設書院徧天下文教覃敷超越前古恩至渥也爾諸生將何以報之夫樂育人材非專以爲文也爲進德修業他日有化民成俗之責者也大學十章自誠意正心至平天下魯論言政者居十之八九孔子曰文莫吾猶人也躬行君子則吾未之有得他如及門諸子之間政孟子之論井田其皆有意於治人事神而非如後世之冥搜窮理記問鴻博見長也夫內聖外王之學思學不可偏廢內外不可缺一

今見夫士子平居談理筮仕後所舉措又未能愜輿論而稱人情無他內有而外無思多而學少也人情者聖王之田也內而誦詩讀書以講乎理之精微人心惟危道心惟微惟精惟一精一之義大矣哉不多讀書不能明理非通乎人情不能成政治嘗謂明天文知地理而不通人情謂之俗儒通古而不通今謂之鄙儒爾諸生橫經鼓篋于是堂者宜如何求人情以盡書理本經術而達於吏治耶顯親華國胥在乎是諸生勉之諸生皆唯唯請書此語於碑以爲記咸豐十年歲在庚申清明前一日賞戴花翎署正安州事候補同知直隸州知州于鍾岳記并書傳記

賀長齡別傳

賀長齡字耦庚一字西涯晚自號耐庵又號齧缺叟系出唐秘書監季真居會稽山陰間子孫世守浙遂爲寧波府定海縣人康熙中分定海鎮海爲二縣遂爲鎮海人季真廿五世孫宏聲雍正間任湖南按察司司獄有惠政乞休居長沙占籍善化祖國華父啓曾皆習法家言爲郡縣賓客嘉慶丁卯公舉湖南鄉試第一明年成進士改庶吉士十五年充廣西副考官正考官彭拜疇以疾請假公獨復命蒙睿皇帝詢家世甚悉二十二年督學山西二十五年成皇帝即位充日講起居注官保御史引見記名旋升左春坊左贊善道光元年授江西南昌府知府向

例首府由大吏揀調而公獨以特旨除授召見自陳初補外吏

恐不勝任上曰錢穀刑名有書辦在汝讀書人不過數月也就

明白

在南昌結積案待
貧葬浮厝柩數千

二年升山東兗沂曹濟道

在兗沂道開
溝洫課土仿

造曲阜孔廟禮器
存善化縣學宮

四年署山東按察使

在山東藩司任結案一
百九十六起請免州縣

遲延處分攤捐致虧者量爲緩攤且免最苦州縣攤派入奏允
行又變通兌漕不准旂丁以買米上免之例訛索州縣治臨清

馬進忠邪教
案不誅一人

越六月授廣西按察使未之任調江蘇按察使

江寧

藩司任內周濟糧道中山身復歸其
妻子某公以公義亦焚債券四千金

五年升江蘇布政使議海

運與大學士英和同主海運便總督琦善陶澍初以爲疑得公

所著海運圖說及商人施占任所著海運三篇事乃克行海運

二次不爽時日得旨嘉獎六年調任山東布政使七年入覲上

曰汝聲名甚好今調山東實因地方難治爲地擇人汝自江蘇
來何事最難奏曰漕務並細陳辦漕之難上問挑河對曰自古
無挑法上問江南可有貪劣道府奏曰都還好大約循分供職
者多實心辦事者少上曰什麼循分供職直是麻木不仁是年
護理山東巡撫以母病劇請假不待俞旨即日遂發十五年有
旨來京聽候簡用八月授福建布政使十六年調直隸布政使
旋擢貴州巡撫正月到京召見四次七月到任在黔八年政論
可舉者如議覆鴻臚寺卿黃爵滋奏嚴塞漏卮以培國本議覆
大學士寶興禁錢票十九年議覆某御史所奏查禁漢奸盤剝
苗民二十一年議覆御史花詠春請飭邊疆認真訓練所陳管

見三條二十二年遵旨保舉武職疏論將才七月復議土兵覆奏皆持大體通達時政二十五年補授雲貴總督時以步蹇耳聾精力大減請病假兩月在署調理聞命即請覲行抵常德奉旨無庸來京病痊即赴新任公遂折回八月抵滇先是滇中漢回構衅已久緬甯雲州順寧回漢互鬩數次積不能解是年四川永昌回民馬大等以唱曲與漢民口角聚衆報復永昌知府捕之斃數十人旋復聚集猛亭公檄迤南道周澍咨提督張必祿赴永昌勦捕九月初二日迤西道羅天池斬永昌城回民之內應者公特疏敘功且馳赴永昌安撫猛亭誅回首張世賢及肇衅之漢民萬林桂等回終不服二十六年正月回衆復變公

又奏請撤銷羅天池等保案復駐大理督勦在逃之張富馬效
青投誠公納之順寧軍犯王芝義以團練鄉兵助勦公與巡撫
陸建瀛援新疆成案疏陳將功贖罪八月廿三日奉上諭上年
雲南回匪滋事經賀長齡親往督勦辦理果協機宜何致本年
復有蠢動現在雖據該督奏稱連獲勝仗地方安謐就未能及
早籌防勞師糜餉已屬咎無可辭甚至以總督任重兩省營伍
皆其統轄豈竟調遣乏人轉藉一軍犯之力練勇助勦謬妄無
能莫此爲甚實不勝總督之任着降河南布政使九月解總督
篆至河南二十七年病懇開缺回籍旋奉上諭李星沅奏遵旨
確查原辦回務情形一摺覽奏均悉此次殲擒雲州回務之告

病羅天池未能詳慎區別率行掩捕以至回衆寒心有所藉口
實屬貽誤大局前任雲南迤西道告病回籍之羅天池着即革
職永不敘用賀長齡於羅天池搜殺過多託疾以去並不從嚴
參劾止請撤銷議敘又率准張富投誠代請免罪實屬辦理不
善着一併革職公纂有皇朝經世文編邵陽魏源董成之世多
有其書又有孝經輯注勸學纂言奏疏若干卷詩文集若干卷
以道光二十八年六月卒於家以其弟之子詒令嗣論曰公所
纂經世文編一書當代嘆其留心經濟及溫水謝法眞倡亂伊
里布勦之間公方略公嘿然也及永昌回叛公竟不能定其事
迨嚴旨切責神氣盡矣遵義守陳先蘭見公公知其常事楊遇

春間遇春爲人陳對曰賞罰嚴明公曰此老生常談耳公撫貴州時其奏疏多本經術通達治體何行與言之相悖也豈非志有餘而才與識不足以濟之歟及左遷河南一時牧令望風解綬者數十人昔周天爵有調河南巡撫之信一時望風牧令解綬者亦數十人也然天爵酷虐公粉飾以經術與同異然公之所惡必置之死地不開人自新之路愛者必使之生能盡己力以致之此與天爵異而實同耳公祖父習法家言其風氣使然耶李象鵬與公書有云呂端原不糊塗除却小事王荊公若非執拗豈非全人公初以翰林在京與象鵬陶澍稱湖南三傑及後象鵬官貴州藩司公巡撫貴州公苛細象鵬務持大體而不

相能也象鵬稱病篤公視病至門而返其磬磬之度至老不變
獨怪其平居所稱讀書非競才華須將書中道理滋味收入裏
面來藉以養心練識方是身心真正受用處余以公所行觀之
不知公所養之心與所練之識竟果何如也相傳公罷官居家
象鵬猶優遊林下爲書以嘲之公忿而死然歟否歟道光間督
撫嚴効所屬不市寬厚名獨公與周天爵周善治盜公能愛士
賢於周遠甚使公任學政監司必多善政封疆大任處非其據
矣

貴州提督孝順都勻殉難事狀

貴州提督孝順以軍餉故屢疏陳貴州危苦狀且曰臣不難一

死苦壞國家事徒死無益又屢書與巡撫蔣蔚遠備言察吏臧否而舉措之無徇情面無事姑息軍中餉乏士飢卒多昭通人聞回紇陷昭通遂懷歸志藉口黎明拔隊而西公涕泣諭留弗聽公知事不可爲以手鎗置案上又以火繩安火門鐵盤上朝衣北嚮再拜趺坐短足榻與鎗對燭燃鎗發中公腦血流溢裨將聞銃聲驚入視公氣已絕舉哀一軍皆哭是夜大雷電以風公歿而風雷頓止是爲咸豐七年二月丁卯也巡撫蔣蔚遠以公歿入告天子震悼賜祭葬官其一子知縣任內一切處分悉予開復公名孝順字行先滿洲廂紅旂人香山駐防以健銳營行伍起家官雲南遊擊屢立戰功洊陞雲南督標中營副將平

東川府馬二花亂初名孝順秦道光中召見成皇帝以國書無孝順秦三字爲文者易今名問平馬二花事甚悉公質言陳說上悅遂注意大用公矣尋授陝西漢中鎮總兵命下方署雲南昭通鎮總兵將之漢中任今上授公貴州提督當是時貴州桐梓楊鳳就撫狎匪起上游安順府戒嚴安順本提督駐節處也雲南鹽法道王成璐貴州貴西道福連率兵勦之苗匪起下游陷厓門圍黃平清平縣城四川提督萬福旣平楊鳳將旋師公見蔣蔚遠力請留川兵且曰苗匪蠢動非細事也如不早爲計公以憂鬱死矣蔣以爲然商之司道或言餉絀留川軍不便事遂寢蔚遠問公上游下游何先公曰某何擇也顧中丞意何如

耳遂勦上游狎匪時王成璐平桐梓有功甚見信用蔣蔚遠謂公有事必以諮成璐公請調兵蔚遠以餉不支乃止公既勦上游蔣蔚遠檄貴東道承齡勦下游時上游狎匪擾鎮甯州落別扁擔山火洪羊角嶺諸處東至安順普定歸化西至永甯所在皆賊不得已遂調公兵大小百餘戰破扁擔山火洪諸賊巢四方股匪多降軍威大震王成璐主撫公與福連主戰公獲賊多有成璐投誠免死牌者公遣示之曰此君之良民也成璐大慚已而歸化賊竄定番陷羅斛大塘兩州判城圍定番定番去省城僅百餘里下游都勻平越貴定教匪又起圍貴定縣城燒狗場撲新安犯高坡高坡距省亦百餘里省門戒嚴蔣蔚遠咨請

公會總兵佟攀梅先救定番公兼程進師解定番圍大破賊於雪坡崖脚復羅斛大塘兩城破賊於巴歪河巴歪河者賊據河爲營屢攻皆不克至是公涉水而進砲如雨石着公身如神助遂破之追出廣西境擒首逆岑鍾英等七人誅之降者數十萬苗夷夾道歡呼頂香盤跪於馬前當是時公威名震動雲貴川廣公自奉刻苦敝衣菲食軍羅斛鄰省協餉不至軍士乏食掘野菜煮爲炊部將於山村得白米數升以獻公怒曰吾何人獨當好食耶棄之地自煮菜羹爲食一軍皆泣下是時所在士卒飢噪公營獨晏然王成璐福連勦撫兼施上游寇漸平總督恒春疏奉俞旨來辦貴州軍務以本標中營副將陳得功爲前驅

上游平陳得功專其功成璐鬱鬱病死福連獨爲恒春器重頗優容之恒春駐節貴陽拜巡撫及監司皆盛設兵仗嚴陣而行公以餉絀故將見恆春無靴假於部將無袍假於部將部將皆笑之至貴陽一人一騎而已恆春大驚謂公何不自衛重如此時恆春與蔣蔚遠忤屢疏皆隱斥蔚遠公不平告蔚遠曰若具疏君獨不能具疏耶蔚遠曰師克在和否則我必與爭矣定番羅斛平公移師下游當此之時公氣吞烟障威懾苗疆賊近麻哈遂進兵麻哈陳得功與俱得功自貴定間道趨都勻極著戰功然忌公成大功公方合戰得功率師遁去賊出襲公陣後潰賊圍而去公忿極欲自刎部將奪公刀師旋指得功面唾罵之

得功理屈無詞明日得功移軍馬場坪無賊處公盡揭其奸於
恆春於是恆春始効得功矣麻哈城圍急公分駐軍於城內外
以保之賊用內應夜攻城黑暗中賊百餘扒城入城中大亂公
部署諸將令於軍中曰走者亂者皆斬一城軍民肅然盡得內
應及扒城入者誅之是夜微公在麻哈失矣公之初至都勻也
下游事已大壞厓門司松里縣丞城都江丹江通判城三脚州
同城皆陷鎮遠府都勻府台拱同知古州同知清江通判黃平
州清平縣勝東縣丞邛水縣丞城施秉縣城皆被圍銅仁縣教
匪起陷思南銅仁思州三府松桃一同知城蔚遠檄調兵練鄉
團會湖南兵以次收復而鎮遠都勻平越軍務無起色承齡退

保清水江又檄候補道張鏌勦下游無兵練分於防教匪蔓延
愈廣鏌軍舊縣解貴定圍遣麾下官分防烏雞坡順德關清水
江皆屢捷而未能遂下其疆也及公軍次下游賊畏公威馬首
所至望風降張鏌大破賊於茶山解都勻府城圍總兵巴揚阿
大破賊於翁樹河翁樹河以外至都勻二百餘里橫二百餘里
處處皆賊盤踞不可尅期至都勻公自貴定捲甲疾趨都勻破
賊於楓香營下游圍城中聞公帥大兵到以爲得覩天日貴陽
聞公軍下游亦恃公爲北門鎖鑰焉雲南回紇變恒春具疏云
臣在貴州請另簡大臣辦理雲南軍務尋有旨恒春辦理雲南
軍務孝順素著勇略着辦理貴州軍務滇川黔三省兵勇任其

調遣在事文武統歸節制恒春十月八日回滇公以總兵佟攀
梅守麻哈先是清平黃平施秉勝東清江台拱都勻府相繼失
守恒春蔣蔚遠皆革職留任事益棘手公遂進兵復都勻是時
局面一變無地非賊公數十戰乃至都勻城與巴揚阿會兵巴
揚阿亦百餘戰始至都勻城下與公會師六年十月克復都勻
府城公屢疏貴州危苦兵單餉絀狀且曰臣不惜一死恐壞國
家事上皆詔報之公在都勻時鍾岳在巴揚阿營中得常見公
公具言初至貴州即與蔚遠云云不幸而余言已中然當此時
明賞罰別賢否猶未遲也公每戰身先士卒寇炮銃矢石雨下
卒不傷公公夜省文書常至四鼓睡不及一更又起草奏疏及

致督撫書扎矣公年已六十餘其精力耐勞有非常人所及者
事繼母孝如其名人多樂稱道其事所用偏裨皆自雲南爲副
將都司出師時舊人公能以恩義盡其智勇而以剛毅斂其貪
詐俱以驍健稱及公歿而後知其虎狼之不易馭也蓋公不徇
情面不事姑息於屬官雖素所敬愛有所過犯面斥不少迴護
然不念舊惡不爲己甚有知州某舊交也罷官貧而歸公公養
之如兄弟衣食甘苦與共死於軍中公爲請卹某守備爲公領
廉俸前後侵蝕多至四千金待之如初始終無間每勸其無爲
奢靡無事聲色曰予不汝瑕疵也恐他人不能如予汝終以此
取敗也勸之至泣下公之渾厚質樸爲何如乎公自昭通來所

携廉俸三千金以用反間犒士卒盡之軍吏登之冊請咨布政
司公曰國家庫帑支絀忍作報銷耶取牒焚之公在軍中常謂
予曰黔事如此我終必一死恐死不痛快耳今竟死矣是豈公
志哉公歿前一月有野鳧數千萬自東來飛蔽天公曰是兵死
之鬼也爲之設祭於營門數日鳧盡死谿壑間占書謂野鳧入
營兵潰之兆至二月公果以師潰而死悲夫論曰公豈非知事
之不可爲而以一死維繫潰散之人心耶公死而戰士又延數
月不可謂非公之忠義有以感之也而過此數月師竟潰矣公
亦盡心焉耳或謂公爲大臣不當以一死塞責嗚呼若公者豈
以一死塞責者耶公所見者遠矣公處死也決矣公固不欲待

師潰土壘之時以背城借一爲辭腴顏偷生辱朝廷而羞當世之士也公豈以一死塞責也哉

增記佚聞六則

余友人穆小村常陷賊中爲余言賊中畏孝公特甚公功雖未成其威名未可誣也

恒春檄鎮將有云孝軍門親歷行間冒矢石爾等當如何自奮耶

公旣効陳得功益勤勤懇懇自是至自戕之日一意以苗疆自任

公身短而精神矍鑠眉間文如川字

余猶及見公戰都勻城下張左右翼多長矛短刀精兵居中
權多炮銃收軍層替而退後勁殿之其步伐止齊皆有法度
可觀是真能爲不可勝以待人之所勝者而麻哈之敗益知
爲陳得功罪

公先士卒其參將遊擊都司皆束裝如練勇冒矢石先登非
必公部下將人人奮勇其勢使然也

貴州遵義縣令江公炳琳死難事狀

江公炳琳字玠侯四川江津縣人以孝廉檢發廣西知縣咸豐
四年貴州楊鳳之變以仁懷縣九壩爲巢近江津公起鄉兵擊
走之論功以知縣留貴州署仁懷縣知縣時仁懷亂後難治公

至重門洞開來見者徑至內寢無所隔闕官民情相通懸金於堂有能捕得逸寇以金賞之都計擒僞帥三十餘擒僞將軍百七十人夥寇千餘而仁懷肅然矣強不侵弱化行俗美作團制有不入團剿賊者即以治賊之法治之自是仁懷之團皆善戰有紀律修城修衙百廢具舉時遵義王安國勢方張郡守牧令奔走其門下公上書督辦軍務雲南鹽法道王成璐請剿之成璐抵書於地謂公貪功自是北至川西至楚無非王團者公心知必變凡仁懷民入王團者皆析之別立紳首於是仁懷民皆惟公命是聽五年桐梓賊穆二竜鄒神保叛聚衆數千踞紅岩頭公擊散之鄒神保匿落水硐公圍落水硐月餘破落水硐穆

二竜鄒神保僅以身免六年楊鳳餘黨梁三發財勾結穆二竜鄒神保再亂於綏陽趙三甲地踞分水嶺爲巢遵義府知府竇奉家檄公討之公大戰於分水嶺以一軍誘其前兩軍攻其後戰至日晡我軍益奮從賊後攻入斬千二百級賊首死其九穆二竜鄒神保梁三發財與焉時石笋紅溪河有賊公進兵攻石笋紅溪河以仁懷鄉長思歸乃旋補桐梓縣令猶權仁懷七年安國抗糧絕遵義府城米薪養楊鳳舒犬餘黨千人陰謀叵測大吏檄公權遵義先是公勦紅岩頭賊安國圖仁懷縣城連營數十公擊走之生擒以百計公曰若不從官而從安國何也對曰畏安國耳公曰今就擒矣奈何曰罪當死公曰我不殺若然

拒我亦不可謂無罪杖而釋之使知上下之分遣告安國之黨有能從官者皆免死也自是安國之黨多歸心公安國之圖仁懷也佯訴於遵義知縣顧崑揚謂公激民變顧以聞於大吏大吏檄照磨王錫祿營之錫祿至遵義顧謂公剛暴不近人情戒勿往即依某前稟以實其過可得署仁懷令錫祿不可徑至仁懷入境訪於士民無不歌誦公惠政且曰此官去吾屬死矣吾邑之無福也錫祿入見公公以印授之錫祿曰公事我已知之此來爲公非貪公缺者速進省見大吏否則爲顧賦亭壅蔽厄矣促公夜發由間道入省錫祿返遵義顧問何去之久旅寓何所錫祿具言往官舍且告以公已進省顧趨而出遣伴告知府

楊書魁曰江某已進省是人無忌憚恐以鄒神保未獲譖本府請本府速發稟錫祿尾出竊聞其語歎其用心之險軋公之深也公入省經安國團安國遣死士刺之間諜以報公兼程夜行免於難顧崑揚催科案牘均爲安國所持雖死罪囚王皆匿之亦不敢過而問顧明知爲安國所愚弄然忌公益甚至是公權遵義去仁懷之日團民送者數千人皆泣下以公能死巨寇而生良民也公未至遵義即銳意討安國張安國罪狀於四方安國遣諸生某諜公僞爲請檄立團者公心知其詐留與同宿又授意門下士顏佐才健侯微露公旨此時無勦安國意必俟受印而後可諸生以爲然以是安國無大備公兼程夜進克其楓

香壩十二營圍其居室室後山賊營數十五千餘衆驚而遁安國點大炮公軍少却公忽曰吾寧死此不欲爲顧賦亭所長短而死黑龍江也黑龍江犯罪官遣戍地也公親當礮礮裂死士陳某執纛先登屋後火起安國出諸倉下生擒之將士請駢誅公不許曰安國名動三省若以死者送解愚民且疑非真安國後有風鶴之煽人心不可爲也遂以己輿舁入郡城斬之市曹其後叛者如劉義順賈福保諸教匪果稱安國未死始服公先是役也自出仁懷擒安國僅七日耳王安國之黨猶有携軍械來助戰者聞安國已擒乃散走又流言謂公且盡殺遵義團已而見公釋安國親族數百人歸其兵於仁懷人心乃定其時

省城大吏慮團變羽檄星飛責竇奉家及公不應討安國蓋事

敗則諉過於公及竇而已

委員十數輩居遵義學使鮑源深按臨亦在遵義安國至郡城諸官無肯

訊供者恐拂大吏之意也

初省官阿大吏意謂公謬及聞安國就擒乃稱公

能其後安國弟王老六叛於四川敘永廳四川討平之人始知

安國之不冤也大吏以安國事入告有旨敘公功以同知直隸

州用并賞換花翎旋丁父憂奉特旨奪情留遵義縣任勦甕安

黃平上坎賊同類嫉之戰不利八年白大滿白小滿周三八楊

應策耿滿趙冒頂勾結曾喜梁三龍徐福穆應朋亂於綏陽桐

梓間自桐梓鼻孔山層巒山石坎刺猪硯喇叭硯馬服坪蠻王

硯川主硯賊衆萬餘二月犯綏陽旺草地桐梓城且被圍奉家

得請於大吏以公兼綏陽令二月遵義協副將祥公戰死於旺
草公軍羊岩擊走楊應策進師圍川主硯楊應策請降誘而擒
之盡坑其衆公門下士秦安慶攻馬服坪白大滿久不下公留
兵圍蠻王硯赴援馬服坪晝夜兼進死傷數十攻益力白大滿
懼夜遁追及之於河殲其黨千人蠻王硯者負山陡絕有巨石
如屏礮銃不能傷賊我軍攀援不得上公憂之乃召石工千人
日夜鑿之既久得後硯軍入自後硯公居洞中自仲春至孟秋
凡百餘戰始克之斬趙帽頂耿滿賊死千餘毀其硯是時安慶
與余子鍾岳稱白稱剿石箏刺猪硯八月或譖公兼綏陽爲利己非爲
地方公入省陳利害且辭綏陽大吏問何人可代公舉鄧爾巽

九月公偕爾巽至軍中破喇叭砮及刺猪一連四十餘砮石笋高插天僅一線路不能至頂賊用木梯長數十丈上下士卒中礮石故日死傷數十人十一月公追刺猪砮賊於馬嘴營以逼之十二月九日公中礮彈子入股二寸許梁三鼃聞公傷悉其衆來戰公裹創督陣斬百廿級時鍾岳討濯水賊公歸養傷涕泣作書以致岳曰天下事惟公可屬遂還郡大吏入奏有旨江炳琳裹創督戰殲擒首要勇敢過人賞給固勇巴圖魯貴州文臣得勇號自公始人以爲榮九年夏公解龍泉縣城圍六月以馬嘴石笋久不下以公兼桐梓縣七月鍾岳與爾巽降馬嘴寇即以降人誘鼻孔山梁三鼃白大滿等頭目百餘人公盡檻車

送省大吏病練擾民遣游擊劉攀桂持信令矢斬羣寇於沙子
哨論綏陽肅清功有旨晉公知府時鼻孔山之功未叙而提督
蔣玉龍之兵潰於偏刀水矣逆首劉義順陷湄潭縣城犯遵東
甕安逆首賈福保犯遵南公勁練在螺蟹未集公募壯丁出戰
不利退守郡城寇踞團溪水奉家時以貴西道督軍務囑公緩
出公性剛善怒不能須臾忍以地失團潰忿而再戰寇衆我寡
營有內應火起潰而北親丁勸公行公不可□石子於衣襟間
擊賊賊少却賊見惟公一人奔而前公大呼殺賊拔短刀砍死
數賊身被數十創猶罵賊不絕口賊以刃斷公喉置公骸井中
懸公首於團溪場口時咸豐九年十一月某日也事聞贈道銜

建祠弟載恭以忠骸歸葬江津公青面英眉雙眸炯炯聲音宏
亮縱談古今成敗天下利病晝夜不倦論古尤具卓識於吏治
兵法闊達精微非人所及時官場方以彌縫粉飾爲工公獨毅然
以安危爲己任至難之事他人所避公優爲之任重致遠多
謀善斷公兼綏陽護口見憎某大吏信之公入見大吏顧旁坐
者絮語略不及公語至釐金公應聲而譚大吏驚始知公長才
自後數餽食物不以待州縣官禮待公每見大吏語無忌諱抒
臆直陳大吏亦重之敝衣蔬食不尙裘馬以矯時弊其學有體
有用能行其所言工筆札書法尤妙戎馬中猶臨坡公帖軍中
文書從不假手於人過耗精力故患弱陽時服附桂開州知州

石公虎臣有威名公與訂交其夫人悍妬無子石公置二妾於外已而石公戰歿夫人與夫弟不和弟泣訴於公公入見以大義責之石夫人善詞令竟屈於公公念其貧旣繩以禮乃迎養其全家人以是多公之義畢節縣知縣周蒞貪鄙公聞總督張亮基劾其罪謂人曰是應大辟則大快人心矣其實與周素不謀面仁懷縣令黃紹贊婪而無恥公抵書於岳曰我輩竟有只圖兩文錢不顧大局者遵義縣令顧崑揚媚事王安國公雖與同坐不與言笑同知婁一枝曾宰遵義大吏問公何不詣婁婁熱遵義事公對曰某進省雖從九某未入流某皆詣之若婁者受安國賊者耳何足道公性剛氣麤疾惡如仇大率類此然亦

以此間於讒貳之口不得大用惜哉螺蟹軍中鍾岳與公共事
公與岳書曰此番軍務兄與吾弟處處不謀而合殊覺可怪靜
言思之天下本無二理兩人所見皆一理也公與岳往來信札
百數十封岳皆裝池而什襲之以爲世寶公又言生平剿賊之
法只十二字逼團殺賊激團獻賊岳謂此法有病公不以爲然
及攻鼻孔山又用此法每團民千獻賊首百竟有賊級不中格
全家自縊死者亦有奸民斬良懦之級以免罪者破蠻王洞雖
嬰孩長尺許皆戮兵噤不忍下手公自斫之曰寧我損十年壽
不使逆根萌芽魚肉良民也若此事則不能學公者也若公之
實心實力大氣盤旋嚴憚刻苦任難勇斷又岳所願學而不能

者也如公者是天下牧令第一人不止黔官場中失此良吏公之事多不勝紀載其歲月先後岳又多不詳聞獨山莫友芝遵義鄭子尹亦將傳公行事聊志大要俾後之君子得參攷焉公兩娶妻一妾皆無子以弟之子爲嗣幸有遺腹天儻以此報公乎嗚呼公與桐梓軍務相終始天生公以爲遵義也耶

筆記

紀僧忠親王佚事

僧王大勝白羊橋終平連鎖寇王處小帳篷矮榻甘苦與士共不輕保舉官銜文岱因旂兵侮請王令王曰持令去且囑曰要殺將旂兵殺盡不許殺一人若不殺而繳令者我參之文岱懼

乃肉袒請罪□文岱虐而無禮兵恨之故王以威教之也王知兵其所設施古名將不過也

紀烏蘭泰佚事

廣西駐防副都統烏蘭泰以兵易敗乃壁軍不戰日演練之明賞罰申約束兵皆樂之奮而請戰所向克捷每戰歸則某軍之勇怯某弁之得力自書硃單遍行諸軍將士益鼓勵奏報必自已出常至夜分罷某守備先遁公將誅之總兵十人跪請不能得潮勇公所重用者也或挽公手或持公裾語嘲哂爲請公笑乃釋而罷其官公以水竇賊且遁請賽中堂尙阿增西路兵已而賊潰西圍而出公急請檄向榮援桂林向後賊而至賊方以

信矢賺城城中疑其詐而向兵至公雅重總兵和春時向榮位提督公既中礮以王命旗牌交和春賊犯長沙和春營長沙外長沙之全和春之力乃服公知人之明

公素受僧王知遇留意武備在京師造藥造炮皆僧王爲之奏請一日誤落火桶中藥燃爆發傷數人皆公好友公次日至各家謝爲市棺木當是時寇未起也公留意營伍如是人多笑之公卒爲名將雖大功未就大星先隕其忠貞勇略足以千古不止度越一時已也

滇黔兵曾事公者無不樂道其事而歎息其死全州之役輿論以爲公在粵寇殲盡矣何天奪之速也

粵寇有石姓者亦賊而爲公之間諜公造一棒雷外爲函式後竟不知如何

時有張敬修觀察廣東巨富號百萬自家以船運火器往所將東勇潮勇最得力戰時張公坐馬札督陣貌閑雅一時稱之

江忠源時以知縣丁憂差委至烏公營公與語大悅留于營中有重事成就商之江不及三年遂總憲矣爲國名臣烏公眞卓識也哉公所重戴文瀾全玉貴後皆爲名將

紀向欣然軍門佚事

柳州城外湖南軍與湖勇前後營賊攻城湖南軍礮誤中帶潮勇一武官潮勇大譟賊攻城又急向公遣人安慰不服必殺潮

南帶兵官而後已軍門乃縛其人於城上令於軍中使其遊四門衆人聚觀之遊四門畢又縛椿上其人以家有老母哀泣慘語待命公乃遍拜潮勇曰我有一調處法潮勇曰公第言之公曰是固有罪然汝之官枉死一命償一命何益焉何不罷此人之官以洩汝憤而汝官以陣亡俾得廕卹讐既報汝心亦安矣潮勇皆拜曰善事乃解公於湖北城下之戰幾滅賊而常大淳不開城出師以應之至撓眞軍之告奮勇者可歎恨也

紀大定府姚東之佚事

姚伯山先生東之在黔時日公座右府經左委員講論律令門上一聾瞶者傳命而已先生於律令字字究其義理臬台唐鏡

涵先生駁公所讞獄公面詰鏡涵先生曰幕友誤耳公曰大人之官幕友爲之耶鏡涵先生慙謝公欲縛幕友某因大恐而逃賀撫台問公我所舉某官如何公曰或取其八股耳則可吏治則未也公以李雙圃方伯壽率大定羣苗被弁服執蘆笙往祝方伯遂去之罷官歸江南主南京書院

紀林文忠公佚事

少穆先生督滇時永昌回叛先生問監司需兵幾何人皆以爲回數十萬兵至少數萬先生曰然先生陰調兵數千曰某部會某處某部會某處監司上院先生佯病而單車已至永昌矣某部後期則杖謫以徇於軍中

趙州被圍城危旦夕報先生請救先生以師行緩帶數十人盡夜馳五百里達趙州回聞督師至驚遁

先生見文武官輒詢以利弊虛心廣益形諸言貌

公爲河督數月自以不諳河務請罷廣東英夷事時論歸之成皇帝終排群議而大用之不可謂不遇也

紀胡文忠公言行

胡詠芝墳樹爲族人發太公雲閣先生卒族人再發先生以典試江南罷官先生恨之間友人陳秉鈞發祖坎木何罪曰至大軍罪耳先生曰若爲斬罪我必訟之以雪恨

先生守安順有劇盜黃老廣先生密延秀才王俊擒之安順盜

名皆在先生夾袋中先生歸至貴陽夜發比至安平而所遣人已獲盜

先生勦革夷誘羣盜至十人爲夥詐至營後坑之先生曰可保十年無事已而又曰噫猶恐未必滿十年也今果然矣

先生謂漢人多占苗田此禍根也

先生守安順前守爲常沛霖先生輕之及撫湖北常官鹽道先生劾之

紀唐子方先生

唐子方先生赴邑試時逆旅主人夢一烏蟬飲水桶中翌日先生至天熱渴甚飲於其桶主人知其異厚待之

先生宰某縣欽使至號滋擾沿驛皆不得其歡橫受鞭笞先生
先一日行故衣店買新夏布小衫百件又買西瓜數十挑欽使
前驅至先生勞苦之曰熱矣命人以盆盛淨水至令盥濯即與
之衣又引食西瓜至者皆然莫不得其歡心稱先生恩欽使微
聞亦稱其能

一時大紳嚅嚅唯公慨慷敢言事多所建白皆考之往古不繆
聖施之當世合時務者公以方伯告歸家無餘財唯富於書籍
可以見公之嗜好矣

紀陶子俊先生

陶子俊先生廷杰陝藩告歸待鄉里有恩掌書院時以理學爲

諸生模範非禮不蹈工時文詩多理學語在陝多平反大獄爲
貴人所譖成皇帝召見令跪近前免冠上睹頭禿嘿然遂罷
歸納賞給二品頂戴殉都勻之難

補遺七則

前編就梓復於叢殘手稿中得筆記數則雖
屬瑣聞而皆有歲月人地可徵因附錄之

義貓

辛亥歲三月時在甕安署有貓生子六貓斃於犬子不能食其
鳴咿咿鄰貓有修而長者不知所自來過其棲聞聲趨視徘徊
瞻顧狀若有不忍者遂去久之聞屋角重勢中有聲唔唔令人
梯而察之則他處來貓子四枚欲取下不得須臾鄰貓來哺六

子又登篋格哺已子往返甚勞頓數日盡銜取其四子併六爲十後六子稍長能食鄰貓乃銜四子去去則六子從之乃置鄰貓於余室六子遂不他往今皆長大毛色華好矣余欲爲賦義貓行未果也明年孫君藕船在家君平越署讀虞初新志有左事與此相類者歸而錄以示余是夜余遂書前事而並錄孫君所示者

唐時北平王家貓有生子同日者其一死焉有二子飲於死母母且死其鳴啾啾其一方乳已子若聞之起而聽走而救銜其一置於其棲又往如之反而乳之若已子然咸豐二年六月初二日書

魏明農

道光戊申余讀書飛虹山山在普定縣治時家君得替居省替者爲衡陽魏公承柅其令嗣明農名略先者年長予一歲習舉業工時文貌亦韶秀與予投契明年己酉明農還鄉應縣試病卒其夫人隨翁姑在黔亦於是月去世夫婦之歿先後不出十日亦異事也明農之風度文采精神才氣皆強於余不意其遂溘然以逝也

伶俠

徐聘三者南府供奉伶人也以洩軍機被逮亡之兩淮間是時鹽務殷富大商五十家小商一百七十家咸以豪侈相競尙每

有讌會演劇非聘三登場不歡聘三前後所得金貲以百萬計然性情闊達仗義疎財又嗜博以故所得隨手輒盡嚴小農河督煩未遇時以主簿需次河干亦嗜樗蒲場中遇聘三聘三謂嚴曰視君非久人下者何不加捐嚴以缺資斧告聘三曰此易耳遂以萬金贈嚴嚴得金不以捐以博盡輸之愧不復請詣聘三聘三往之復贈以萬金嚴得以加捐遂歷官總河以書迎聘三聘三至嚴以數萬金報之又爲大設筵招河工十五廳司馬徐裝扮登場演只一齣耳而諸司馬每人賞銀一千兩共得萬五千金焉嚴復至南河總河聘三隨往南河南河諸司馬又贈以八萬金嚴屬聘三往蘇州置衣裝理舊業聘三至蘇州一夜

盡輸去聘三爲人倜儻開闊絕不似梨園中人得失不動於中
喜怒不形於色世俗之士不得而窺測蓋豪俠之流也咸豐二
年中秋前一日聞家君述其事退而筆之

星變

咸豐二年壬子三月甲辰二十八日戊寅戌刻有星斜對北斗
七星之次光芒四射倏而光周環如月暈又漸收漸細久之復
明如初史記天官書軫旁小星曰長沙明則兵大起注軫五星
主行使使動兵車亦動誌之以俟知天文者

同年五月初七日夜二更與月相去不遠在月之北有白氣如
絮團風吹萬雲過盡而白氣團團如故始知非雲恐或是星光

偶因眼花見光而未見星久之白氣漸收漸渺蔚藍湛然竟非星也此亦一異但不知主何事耳

襄勤公遺集

先曾祖于氏家言謂家中有先襄勤公集欲檢寄隨園先生而未果今家中無此集豈遺失耶同治元年十月初四日李壽萱太守咸中云在京都琉璃廠親見此集有奏議并詩稿云

于清端公集

于清端公全集其孫貴州巡撫于準所刻有陳說岩所作傳熊履漁所作墓誌集中有奏議詩稿公牘等類余得之貴州省城今藏家中

黃石齋硯

同治三年八月十七日在畢年生少府庭號所見石硯一方有五寸許正面刻斷碑二字八分書道周印一篆書身可汗心不辱藏三年化碧玉十二字竹垞銘三字皆行書背面吳越勝事重來乞詩要尾下缺一字谿藤視昔過眼十六字行書蘇東坡筆意相傳贈山谷之碑殘缺爲黃道周所藏後歸朱竹垞

伯英遺稿

伯英遺稿卷一終

伯英遺稿卷二

鐵嶺于鍾岳伯英著

貴陽邢端編次

公牘

稟遵義府夾單咸豐八年十一月

再稟者二十三日連接鈞諭讀至心藏心寫足見大君子愛民之心出乎天性其愷悌慈祥流露行間仰止之心不能自己又讀至婪匪稍退即設法勸捐以濟綏軍之餉且以四號之捐當以威勒之以期踴躍岳竊有疑焉不能不爲憲台一詳陳之正安之富首稱四號然皆商於河南四川當此四鄰皆賊其不遷徙以去者以岳之至誠相待感激而不能自己也若如江令之

逼綏捐岳不能保其不作錦里遊也所恃以守者有人有財而已遷豪富以實關中古人於根本之地不辭百計以富強之今乃百計以逐去之官誰與守正安不守綏遵亦能安枕乎岳未敢以爲然也州屬共計德江思小四里地方德里之黃都壩二台白菓樹思里之胡羊場上壩場小里之鐵窰此三里皆鄰婺川目下爲寇蹂躪不能催科焉能勸捐僅餘一江里江里之樁標箐車盤岩青水溪沿邊百餘里皆鄰螺蟹民捐久已竭矣甚至典其居宅得米升斗輓至廟塘以濟練食如此者非他實以岳一片至誠有以得其心而非以威脅之術取之者比其成效又如此也綏捐遵釐之不濟旣在洞鑒中矣正安獨非憲台之

子民乎或者以岳勦賊無江令之勇招練無江令之多以岳爲有蕭何韓滉之才足以濟江令孫臏吳起之術江令之用兵也足以成枯萬骨之功而不足以司三軍之命其實心任事大力包舉岳旣心折矣若信賞必罰紀律森嚴岳未敢多讓也徒以江令在播年久且官首邑往來於郡中者衆得稱道其功績於左右岳僻在正安其得失憲台不能盡知也然岳之練實不下二千人可以委員查其足數否也大抵天下事如衡之稱物其始僅失之錙銖其末遂相去尋丈嫠匪之覬覦五屬未遜於螺蟹也此中稍有偏重他日必有明效然後岳獲知言之虛名而地方受失機之實禍矣果能別委賢員署理州篆疎防失城有

人任其咎岳乞江令五丈旗爲之先驅無內顧之憂有必前之志焉若以餉專責岳殊自愧其才短未嘗不以去官爲幸也鄧令之稟正安勸捐寄稿於岳花書而無間諷字意若惟恐岳之如王衍之雌黃其口也常讀素書極愛其神莫神於至誠一語生平待民待兵取友純以至誠其感應如響痛恨他人之用權詐者以權詐用兵則兵疑以權詐用民則民詐以權詐取友則友離江令優於識而絀於量能而已而不用人蓋於無求備於一人一語未嘗留意焉忠恕二字無我一語不可不講求也定須如我難求友岳嘗以此語歎隨園之達彼剛愎自用者烏足以知之岳初見江令告以岳之處友久而後見此岳所自信者

春間蒙仙憲力薦而憲台以爲然於是乎有正安之委何嘗不願以楚山之璞爲卞和光豈甘心以不舞之鶴爲羊公辱乎然力所不能事所不可不能不預白不能不詳陳岳與江令素無嫌隙而侃侃而陳者爲江令盡責善之道爲大君子補過拾遺所謂君子和而不同者也婺事已詳諸通稟而勸正捐以濟綏者岳方多方善辦而不肯以剛暴失民心也德之流行速於置郵而傳命一章當今之急務也願明公留意焉呂新吾謂中懸一物推之太重則其反擊也必猛岳因此而念及元祐君子之黨昨在螺蟹曾與江令談此理願江令留意焉素知大君子舍己從人集思廣益以地方爲重待屬吏以寬用敢盡言昔唐子

方方伯嘗稱生平惟事少穆先生得以行其志安知岳今日在明公前不能行其志乎請嘗試之冒昧陳言惶恐惶恐

通稟辦釐捐米無效請撤參治罪

敬稟者竊卑職於咸豐八年五月署正安州事會同江丞鄧丞
勦辦螺蟹賊匪自八年六月至十年□□□事計用餉銀三
十餘萬米十萬餘石中間收復婺川縣城斃賊□□□□級
肅清二百餘里地面去年又與鄧丞克復湄潭縣城均有□□
□□每□□□□皆出自民捐而無怨言亦未鬧事此通省所
知□□□□□也去冬正在趕□□□□之時蒙委林令舉
人李春暉來辦正安釐捐□□□□設局攸關即代爲籌畫於

臘月二十八日開局卑職囑以正安人情最猾小人最多宜用舊時本分之人不可問事於小人以開讒邪之捷徑亦不可好小人之面諛墮其詭詐之術中林令宦場多年素有閱歷頗見嘉納故自設局兩月釐金起解並無阻撓二月內因陝西綢商釐金已經議定章程李春暉又有過秤之加費經卑職開導陝商亦肯應允而李春暉於過秤之外每疋要錢十文方過圖書商人怒而遷往四川正安之民全靠賣紬每年地方中有十五萬金出息陝商既去民生失望怨聲載道李春暉又屢作狹邪之遊與百姓妻有姦用百姓管釐局又有經卑職答革犯事多次之蠹役□□□□黃緣於百姓之妻李春暉又重用之李

春暉之內姪潘姓亦管釐務□□□□均有陋規民間數有聚衆之說均經卑職派正經紳士勸導化大事爲小事紳等屢勸春暉勿信諂諛而失民心李春暉自作聰明毫無忌憚竟在安順場相看民家處女欲聘爲妾士民不服李春暉信羣小之言凡濫壩子土溪場新州廟塘到處設局小人趨利若鶩羣相依附甚至拈香結盟夜間數十百人坐卡有漏釐者固當罰半充公亦不應行類搶擄搶擄入公民間亦不違拗竟至羣小分一半李春暉分一半又販賣牛羊作小生意者卑職與林令會銜出示不收分釐以宣布上憲體恤窮民至意而李春暉□□□膽敢收錢而不入賬三月初間百姓即思齊團打局以十六炮

爲□□□□達才鏈馳往苦勸而止至十八日卑職尙在謝
壩發給難民牛種及捐廉施□□□安思溪之過路藥材販
子□□□□上六百文釐金管釐者偷竊其錢謂少四十二
文販子借貸三十九文□□□管釐者即批其頰趕場之人
不服一擁而入李春暉之內姪潘姓□□□搶錢文據李春
暉面稱三百餘千銀六十餘兩而移文又稱有金鐲一付有七
百金借券一紙不知金鐲借券何人之物從何而來其欲以重
贓之盜案爲難卑職耶卑職仕宦以來欲行其平生所學非混
飯喫者愛民如子嫉惡如仇見此行爲實在願聽參辦不能與
若輩同流合汚林令長者民間亦未言其過失獨李春暉州民

恨不生食其肉夫民猶水所以載舟亦所以覆舟值此時艱綏撫安輯之不暇而又從而魚肉之萬一激變地方不守李春暉可以滿載而歸卑職有守土之責罪何所逃也且如此辦法已失之郡縣未必能復未失之郡縣又將糜爛也若大憲有意收民心培元氣進賢退不肖保未失之郡縣復已失之地方則當將李春暉撤回重治以貪婪之罪□□□□寧有盜臣不可畜聚歛之臣將釐捐歸林令一人管理委邑紳達才鏈爲副委員庶乎可以有裨軍用正安有用釐金仍得撥動以濟緩急至卑職彈壓無方應請革職治罪是所盼禱若信李春暉之言飭卑職拿人卑職惟有拿李春暉站斃示衆以順民心以保土地

耳卑職係原任河道總督于襄勤公之子孫祖宗爲朝廷培元
氣先君爲國家殉城池卑職能獲罪於大人不能爲先襄勤不
肖之孫先君不肖之子也至接濟甕安沈軍之米卑州概係高
山曩年豐收民間稍有所積而年來軍務搜括一空卑職在營
所食並包穀而無之違命請再以重罪俾卑職得保官聲死無
愧於鬼神生不見嗤於豪傑宏景於神武門前挂冠□□□□
□是杜陵男言罷拂衣保全令名感恩匪淺

稟辭札委總辦遵湄綏防務咸豐九年

二月初六日申刻承到憲台會札開爲札委總統各練以一事
權事照得前據該牧具稟收復永興湄城等處剿辦甚爲得手

且現在賊勢復張各路帶練官弁並無統率以致事權不一殊非鄭重軍務之道該牧自軍興以來迭著戰功謀勇迥邁羣倫以之總統各路指授機宜自能迅掃逆氛而奏蕩平合亟札委札到該牧即便會同遵綏渭等縣將所有帶練員弁逐加考察精選丁勇偵探賊勢輕重相度地理險夷妥爲分布應剿應撫或戰或守悉聽該牧便宜從事如有抗違不遵者官則指名稟揭請參練則立予正法至遵屬東路統帶練勇知縣張師敬現任在母病乞假經本道改派訓導劉從矩生員袁國楨前往分管仍着該牧查看情形隨時斟酌施行資去令箭即祇領任事仍將遵辦緣由具報查考毋違特札又承到憲函各隊練餉仍照

舊各隊自關各隊與卑職無涉丁昇之練歸卑職調遣其餉仍
由郡支發等因承此並恭接大令一枝伏查落花屯敗潰之後
賊勢日張投者復裹爲寇良善流離在途誠如憲諭自初三四
等日水涯子各營失守興隆場落花屯新復之營亦心虛奔潰
初五六等日該逆糾集大股圍攻秦令湄城外大營勢甚危急
卑職之練除隨同卑職紮營永興場外或紮李村以顧正安糧
道或紮文昌閣扎龍塘以壯聲援四面皆賊萬難再爲分撥茲
承札飭總辦遵湄綏軍務此誠鉅任卑職非不願竭盡駘仰
酬知遇於萬一其如遠隔一屬事兼三縣任重責大既非卑職
庸才所能總理而隔屬官呼應更覺不靈卑職若貿貿接辦則

債事之日雖參治其罪已不足謝三屬受害之百姓是以再四
思維仍將大令恭繳遵綏之防宜責遵綏各地方官則衆擎易
舉若一人經理則鞭長莫及必致失機刻下秦令之營朝不保
夕其丁昇謝洪鈞各隊請札飭歸秦令調遣則該弁等不敢不
爲之救援此變無益爲有益之練也若到遵境防務萬分吃緊
卑職情願交即正安來遵作防堵委員帶練而不籌餉所有奉
札自揣難當重任恭繳大令緣由合行稟復

稟遵札進剿螺蟹賊匪並籌辦攻擊各嗣

(上略)卑職赴婺川招練四百賊犯黃都壩原想添招六百
其後僅添二百進剿螺蟹又添募三百共九百名現在尙不敷

用龍里有卑職舊用武生周坤俊秀周飛熊所帶之練二百名
有稟願來投効卑職已允其前來至正安各團懦弱非常畏賊
如虎惟職員胡其珩自咸豐四年梁三發財圍攻州城伊父子
即屢擒首逆自後胡牧朱牧辦理螺蟹伊運送米石錢文帮同
打仗今年正月二十八日賊破木兒灣接戰三日三夜胡其珩
第九子先緒力戰陣亡房屋燒燬骨肉離散洵屬立功最多受
害最慘此次軍營胡其珩年已八十卑職令其在廟塘辦理糧
台第八子生員胡先海在綏營先甫先恩先紹先科其孫胡桂
皆在卑職營中先甫先恩先科並自募精練二百名助勦每逢
打仗無不奮勇駱瓊德李士科每人團丁百餘名亦係歷年出

力刻下並隨營効力(下略)

通稟各憲報發匪上竄並呈繳發川縣印信

(上略)十一月二十一日發川縣阮令胞姪阮博經來營稟稱自九月初八日迎洋江隘口失後與義團團總覃元貞接官紮戀山坡於十七日移紮興義寨招集團丁五六千人於十月初一日開隊攻水口寺賀逆之羽黨楊二等是日連獲勝仗初六日發隊攻錦被山三面岩亦破二寨是日接四川西陽紳士張繼書來信約期於十二三日帶練由王家坨而上會勦賀逆致本寨練丁有暫散歸家者至期失約故此蔓延不幸於十五日胡逆匪衆二萬餘人由虎門而下濯水相助賀逆圍攻興義

寨於十六七等日開隊寡不敵衆於十八日圍寨五日夜糧盡
子盡似難保守兼之團首覃元貞於二十二夜不言私逃衆心
解體於二十三日興義寨破胞叔文藻及叔祖秉銓堂弟翊經
族兄大經家丁鄭福饒陞把總劉榮昌均被賊匪圍往婺城博
經亦至婺城賊目劉洪喜等力求招安不意十一月初五日賊
匪又欲胞叔文藻至乾溪招安胞叔文藻知不可爲以死自誓
將乾字五千四皆七十六號婺川縣印一顆交博經從間道黑
夜携出晝伏夜行始得來營胞叔文藻素明大義定然以一死
報國恩有胞叔親筆遺囑一紙一並呈繳等情據此卑職驗明
果係婺川縣印理合轉繳驗收又阮令與胞姪博經遺囑事關

立心死節一並呈請查驗至實在下落俟查明稟報(下略)

代貴州巡撫部堂咨會提督軍門及劄飭各鎮墨稿

照得各營練丁理宜各歸營盤以肅軍紀近日查有各營練丁携帶家眷住居城市與齊民雜處其有不肖者往往搶奪偷竊大爲民害或係投誠之人革面而未洗心難保不與賊匪暗通消息省垣重地豈可不及早清查以弭後患爲此咨會軍門札飭該鎮即便選派明幹將官一二員將該營所有在城居住兵練驅逐回營如敢抗拒不服即由委派將官捆解本管軍營訊明懲辦勒限十日各營兵練全數回營并將辦理緣由咨報本部堂查考十日之後再查有兵練居住作爲游練就地正法本

部堂深知戰士之苦未忍不教而誅是以先行剴切指示云云
(下略)

貴陽城防條議墨稿

自辦城防以來懸重賞以購奸細至今並未拿一真正奸細不可因未常拿獲即謂城內真無奸細也今當想一雖有奸細放火喊殺而人心不亂街不驚之法則莫如設游兵一法似尙簡便即在三營內挑選兵丁八百名每保兵一百名以千把總各一員管帶之以知府一員統帶之八保又委一大員統帶之每兵每日鹽菜錢六十文燈油錢十文牛燭錢十文只有燭錢歸帶兵千把每日領錢二千文買辦牛燭爲查夜上城之用北保

之兵駐紮東嶽廟南保黑神廟西保東保五八段六七段均如之其查夜之團丁照應柵欄譬如一街二柵查夜有十六人則一柵可用八人各帶軍器遇有火起或奸細發作各保之兵援應譬如賊在衛坡西保之兵自飛山廟府前街而出南保之兵自縣門口而至其餘團丁仍關閉柵欄東打西不動賊至奔突至柵欄前則開鎗炮以擊之柵欄單簿各戶用棹椅填塞街面街上之民登屋擲瓦大家圍而捕之各街如此預備奸細不發則已發則成擒城上之人知街面處處有備亦不至跳城而遁或是某街火起保兵救火各街守柵今所招團勇鄉兵八百名大半皆街上遊手好閒之人優伶乞丐剪綰小偷無所不有並

不能開放鎗炮日久百弊叢生散之必爲城內盜賊今省八保
無用之練賑三營貧苦之兵用之有技藝之嫻撒之無散練之
患又慮其兵聽三營約束不受文官節制呼應不靈事或掣肘
於是乎以知府統帶千把受知府節制八保又設一大員統帶
恐其日久浮冒人不足數三日點名一次因見城上站垛之夫
勞苦已久晝間可以五垛用一人照應以休息疲倦之民蓋小
生意及做手藝之人恃以養家晝間耽擱生意夜間迫於站城
其勢可暫而不可久游兵一設夜間仍用民夫晝間每保撥游
兵五十名站城天黑下城至於城上緊急之時游兵亦得應援
上城幫打鎗炮城內星羅棋布處處有兵賊匪聞之奸細亦不

敢入城池即使有奸細在城發必成擒無所施其伎倆黔省下
游各府州縣城池皆失於內應之手其弊只講求站城而不講
求救應之法只要奸細火起喊殺站城者縋城逃命婦投井自
縊官以此殉城以此失比比若也今使巷戰之法與站城相輔
而行以符大營包小營之義賊匪攻城我有站城之兵團奸細
竊發我有各保之勁旅賊發而城不動火起而城不驚表裏維
持有條不紊即就此次軍務開端行之日後城市內有變事必
得其益再晝視旌旗夜聽金鼓所以一衆人之耳目也查城防
局舊章凡城上緊急節以亂鑼爲號而四城樓上並無號令如
有急事焉得人人而傳喚之竊以爲每一城樓當設號令一對

有事舉號兵民上城平時民間嫁娶只用鼓吹不許吹號各街打更不准打鑼只准敲梆城樓發號每戶一丁上城沿街鳴鑼五丁抽三上城以一視聽而辨緩急(下缺)

開誠布公曉諭示

爲開誠布公詳晰開導事本州自去年五月初十日接印以來值螺蟹用兵濟安犯境處處告急防勦分心六月之下婺川七月即至螺蟹中間有市坪設防一行去年冬月幸將濟安二十萬匪徒殲除殆盡招安數萬良民然新舊招練二三千名火藥鉛丸練餉一月總在三千多金賴爾百姓各秉天良深知國帑空虛州官勤苦富戶酌量樂輸貧民肩挑背負替運軍糧本州

自今年再臨螺蟹已經百二十日尙無成功是本州之無能而
苦吾百姓矣言念及此既增汗顏又深惻隱螺蟹一日不除吾
屬一日不安練勇一日無糧則滿營鼓噪本州如因無糧無餉
半途而廢民房被賊燒燬老弱轉死溝壑本州又何顏以對百
姓耶所以以不忍之心行不已之政仍然委派賢良公正紳士
勸諭捐米以濟兵食捐金以濟練餉意以爲與其爲賊所擄貽
害百姓地方不如樂輸於官用以殺賊共享昇平永保豐樂也
此中官如有一點肥家利己之私心則斷子絕孫鎗炮打死紳
士團首如有私心男盜女娼天誅地滅爾百姓之富者如存心
慳吝有意投賊甘心不顧地方因捐而抗官長如饒老八身首

異處全家誅滅有聽信饒老八之謠言而甘心從之者日後必
傾家蕩產妻子流離要知州官乃爲地方爲百姓到任一年之
久在城兩月有餘中間親冒矢石不避鋒鏑或深入賊巢以爲
必死而克復婺川或紮營險地以爲必危而安如磐石人如無
愧天豈無知而不料有饒老八這等頑梗不化之民要害我正
安州之人悞我正安州之公事也除將饒老八簽差查拏外合
行出示曉諭爲此示仰四里三十八甲紳耆人等知悉自示之
後勿過於貪財發財有命勿聽信抗官抗官不祥勿打算投賊
投賊滅族勿只圖利己利己者亡身總是有才有能者出來帮
官出力忠厚老實者本分自安既要官打賊匪捐輸不可不出

既要大家降賊此地即不必設官犯上之人終久不免刀劫貪財之人豈有不斷子絕孫一心爲國爲民必定簪纓奕世十分急公好義不難姓字飛揚當此有事之秋正是有才者報國承家之日辦到地方平靜便是無才者亦沾無事之恩如有凶惡棍徒把持公事抗官藐法心已從賊毒流地方我與百姓共誅之

修築重營禦匪示

爲曉諭趕緊修築重營以禦賊匪事照得本州前因思婺龍渭匪徒竄擾在在堪虞隘口太多防不勝防欲保全一州地方再四思維得一久遠之術勸諭上壩場大壩場胡羊場並州城附

近各鄉如大魚塘格林窩謝壩二台等處紳民在要隘處各紮一壘營石工非咄嗟可辦一時救急只照紮營之法築牆挖壕插籤營內修造房屋米穀等物均可運入其中一遇地方有警婦女守壘壯丁出戰官練一到鳴鑼取齊無事之時照常耕鑿貿易賊雖入境野無所掠四面有團不戰自斃自婺邑賊巢至各該場四五十里及七八十里不等其間悉爲灰燼糧米毫無賊匪雖悍裹糧則不能久運糧更易於邀擊賊衆無食不能遠出滋擾此即古人堅壁清野之法實爲此時第一要務本州業經將勸諭緣由通稟在案現奉撫憲批示所稟不爲無見仰即傳諭各鄉紳民迅即實力辦理毋得畏難苟安藉詞推諉亦不

得藉端苛派肥已致滋擾累等因奉此合再出示曉諭爲此示仰州屬紳民人等知悉爾等速即遵照示諭趁此收割已畢農隙之時大家齊集籌議同舉公正紳士董率辦理趕緊於本場附近之處相度地勢擇定隘口修築壘營一座務須齊心協力大衆動手一經修築完備地勢既固人心易壯外寇雖來斷難滋擾本州現在長養精練數百名一聞那處有警迅即帶練救援若能依此辦理閭閻必然安堵民富練強地方鞏固數十年之利也該紳耆等俱係明理有經濟之人必以本州之言爲然速即實力奉行切勿藉端推諉不肯協同辦理以及愛惜錢財因循苟安致使良法美意不能成就各宜凜遵毋違特示

正安州畫界分團諭

爲曉諭事照得致和團匪未靖思小里各團亟宜整飭茲擬團名委派團首札飭一到該團首迅即畫界分團務宜山分嶺子水分心界畫一清勿許跳團先查明若干戶口若干丁壯設立百長十長造具清冊並畫地圖於冊之首頁速送大營本州派人點團以振團威日後邊隅有事某團應堵某處看圖瞭如指掌庶於防務大有裨益至於官練到境應付米石紳士勸捐差役因案件錢糧下鄉各該團首務宜協同辦公有子曰不好犯上而好作亂者未之有也民能親其上手其長而地方安靜矣倘有一不安本分之人及搶擄拷磕盜竊結盟燒香吃教習玄

者許各該團首隨時稟報查拿送赴州城如本州訪有要犯在某處團內即問誤團首要庶幾保甲行而盜源清團規一定行諸久遠有勇知方民自爲守必能共享昇平之福是本州之所厚望於我正安之賢士良民也除札飭各團首遵照外合行出示曉諭

秉端守志清五團總團正樊桂枝嚴宗六總團董韓家碧韓

克賓

秉正團首樊桂枝團董孟宗枝 端正團首韓家碧團董韓克

賓費世福 守正團首嚴宗六團董席作賓 忠正團首費世

福團董王守鈞 清正團首聶化鵬團董鄒慶潼

公明體義義均六團總團正李治馨總團董雷振聲

公正團首雷振聲團董雷先電 明正團首袁彬團董戴明芳

體正團首曾和清團董韓發科韓百貴團長何正清 義正

團首李治華團董李天方李治毓 義正團首鄭文貢熊占高

董書田團董戴明芳鄭光鶴鄭光連吳延理戴清□ 均正團

首韓朝選團董韓先睿

頒發團規示

爲發給鄉團條規事照得本州自前年來蒞斯土即出示齊團
嗣又屢次勸諭修寨並親起團名安設團首飭令造送團丁名
冊至今未見送呈疲玩因循一至於此非本州之所望也本州

亦以四方軍務未息生民蹙蹙皆窮戰士勞勞不息本州之窮年奔走豈爲名利哉私心竊欲下安黎庶上報國恩耳所以到處求訪人才取人不論出身不拘年紀只要有才可用於事有益無不重用誠欲與二三君子同心共濟以保地方清內奸而禦外侮常享昇平之福二三君子或防堵籌餉或隨營帶練櫛風沐雨亦良苦也柳往雪來何時已乎湄潭已成焦土婺川無非瓦礫扶老携幼則避難之民也啼饑號寒則無告之子也夫捨地方而不守賊來則逃當今之世逃將安之乎此本州之所以每一念及坐臥不安而欲苦苦勸修寨勸齊團與吾民苦守而勿去也爾諸君亦有意乎抑任本州之衝鋒冒鎗舌敝唇焦

爾等且圖目前之安逸不願爲長久之計乎吾知其賢者必不如斯矣必有聞鷄起舞與祖逖同其心攬轡澄清與范滂同其志者矣鄉團條規備列於左其各次第舉行勿延勿怠切切特示

團規二十一條

一各團原有界限者不准跳入別團不准與別縣連團山分嶺子水分心各歸各界如有插花地界雖係隔縣其人非親即友於地勢人心宜於合團者亦由本州酌定不得引爲章程

一每團由官設立總團首總團董副團首副團董五團又有一總團首總團董至團內之百長五十長十長練長由該團首

擇人充當官調團則練長帶精壯練丁隨同出征

一團既齊集造具名冊二本並繪該團地圖於冊之首頁至防堵時某團應堵某處看圖便知此冊送官蓋印一存署內備查一存團首備查

一各團趕緊修築寨子擇險要地勢紮成牆子開挖壕溝務求深闊釘以壕籤其山係一條路可上者則將路挖斷營牆或石工或竹木要修堅固各家房屋老小婦女猪牛騾馬穀米動用家具悉行搬入其中務使野無穀米賊無所掠有事壯丁打仗老幼站牆子官練一到齊打接應運送米糧

一凡官來調團則挑選壯丁每戶或一丁二丁事緩則分作兩

班十天一輪正副團首練長各一人親帶上營多帶器械鍋碗必須下班到營上班方可撤回倘值班時團丁有抗傲者准該團首將房屋燒燬並將花戶斬首

一各團製造鎗炮子藥務要精良不可貪工價便宜總要東西得用桿子或方竹或岩絲或紅子總要二丈一丈八尺方用得短小桿子不准用

一各團防堵要隘紮成營盤必須出具甘結如有見賊不能禦及棄營而逃者或團首先逃或團丁退縮梟首示衆

一每團設立糧局派公正八人管理或一處或二處量地之遠近量團之大小花戶之貧富竭力派捐軍糈如有抗違不遵

者准該團首稟官究治富者抗傲許團首抄毀其家以充軍餉

一團首必須公正不可藉公報私不可挾忿洩氣不可尅索銀錢入己不可私賣門牌號片不可勒取投誠一文有一於此或被稟揭或經查出立即處斬

一各團各寨總團首與副團首出具連環保結團內寨內無人吃教習玄燒香拜把無偷盜剪綰無訟棍大五帽頂如有以上各項不法之人團首全家連坐至於有要犯在該團該寨內差役一至協同捕捉不得容隱惡人致害地方

一凡偷盜剪綰大五帽頂不安本分之人團首不敢保其入團

入寨者另造名冊一本送官稽查此等人犯事加等治以死罪

一凡奸巧之徒以爲不入團又不修寨既可躲公事賊來並不打他此等人在團內爲漏戶在地方爲奸民團首捆以送官立即正法田產充公房屋燒燬祖墳挖掘其妻發官媒嫁賣其子永遠監禁

一凡團丁出征不許姦淫不許打起發近見各處團丁出征見了葉子烟海椒鋤頭箕箕無一不是好的此等惡習殊堪痛恨人心不古喪盡天良專貪小利所以地方不清靜也團丁出戰不許混放槍炮守營出隊不許高聲說話總要清靜鴉

雀無聞一嘈雜必打敗仗凡此皆在團首平日訓練而教誨之本州言之不盡也

一凡各團首於團丁總要訓以大義說皇上恩德與他們聽入而事親宜孝父母出而事君要忠心報國不可吃教不可投賊生不忠良死爲下鬼良心一好終有厚福不貪小利而騷擾地方不記私仇而誣枉好人凡此亦要該團首隨時隨事而開導之以副本州立團之苦心也

一凡團丁未曾見過仗多係膽小之人其膽大者千中難選一二要說膽子練不出來是自欺之語古人云可使有勇又曰懸岩練膽此語豈欺我哉亦在平日之訓練耳團首平日挑

選十八九歲二十多歲之冒失後生年輕膽壯請教師教以槍炮桿子勾鏈短刀攥耙鐵叉等項亦不過一兩年必能學出些好殺手來也團內有富戶必有佃戶若思小里之附近婺川江里附近桐梓儘有會打仗之人富戶若招此等人爲佃戶不過要他有家室知道他的根抵平日並不爲匪方可招作佃戶無事耕田有事打仗團上有此等打仗之人自然就把本團團丁亦帶得膽大了江里木耳灣胡家就是此法何不仿而行之

一凡霜降以後本州親赴四鄉點團該團首帶領團丁出迎擇寬平地方演陣開槍炮看桿子團丁都要有號片旗幟套頭

隊伍不肅技藝不精器械旗幟不齊者團首受罰

一各團總團首總團董之戳記由本州發給稟報公事軍務以戳記爲憑

一凡防堵隘口總要在隘口紮立營盤築牆子牆子兩面用大木立椿編以竹子中築土石約一人高三尺寬外挖壕溝寬一丈深二丈中釘壕籤壕外又用整竹編鹿角棚有大炮則於牆子內築炮台大凡防堵都要如此不得草草塞責

一凡盤查奸細要在緊要隘口關口場口設立草棚每日十人輪班白晝五人夜間五人見有面生歹人即先盤問如果言語支離再搜身上有無賊子暗號或是竹筒內放紙捻或是

黑白小圓石一片或是號片其賊匪暗記種種不一總要隨處留心却不可因過路人的財帛豐盈起了貪心便誣人家是奸細或經人告發或被官審出照盜案辦理

一凡本州出兵槍炮子藥過路以及運大營之米挨團運送團丁推諉者團首答責之團首推諉者鄰團稟官究治之

一凡各團遞送公文上憲行本州之文及本州行各方之文團首派人飛送有拖單者某日某刻到某團一一註明若有緊急軍務六百里飛遞者團首派人連夜飛遞遞延者挨查在某處遲延惟某處團首是問

本州常謂賊以燒殺逼良民爲盜我何妨以燒殺逼良民爲團

乎團丁怕打仗投了賊還不是天天打仗棄家而逃更比打仗苦十倍俗語云在家千日好出門一時難出門且難何況逃難賊匪之計是用本地之糧草燒無人之房屋用本地之痞流害膽小之良儒如果我的穀米在寨內賊無糧可搶矣我的團丁不投賊賊無引線不敢犯界矣即或犯界我有寨可守也有各寨及官兵之救援也我有可以自守之道我何忍棄田園廬墓而奔他鄉受道路饑寒投親靠友之苦乎大凡當團首者總怕官不替他作主怕與花戶結怨所以發給條規立法綦嚴爾團首當不怕結怨矣任大事者不辭勞怨堪爲梁棟之材遇小故輒避嫌疑豈是腹心之寄古之訓也爾團首其留意焉大凡當

花戶者總說有本州在此可靠何怕外匪凡此皆偷安取巧苟且目前之言萬一本州卸事又將如之何豈非自悞自己之身家性命乎本州今代爾等籌自守之法至詳且備有志之士必能身體而力行以副本州之厚望也

勸化鄉民示

爲宣上恩德勸化文武生監鄉民事照得本州自到任以來原擬不時巡鄉聚集紳耆父老躬親勸化以移易風俗無如四方軍務日不暇給未能兼顧只好以紙筆代喉舌爾等其潛心靜聽之別省童生進學之後仍朝夕用功及至出仕不離書卷爾等一入學之後在城則三朋四友終日遨遊在鄉則武斷鄉曲

藉以謀生不能上進職此之由論起皇上家待貴州士子之厚實爲別省所無舉人進京會試領有火牌不用自己盤纏此別省所無而貴州獨有者也皇上家待爾等士子何等優厚爾等不肯用功專想包攬詞訟抗拒官長賊來便降官喚不應此等人辜負皇恩矣何不常看看二十四史綱鑑等書感發爾等忠義之心汝等總要想食茅踐土二百多年養士之恩淪肌浹髓若祖若父簪纓從何處得來田房從可處領來無非是列聖二百年休養生息之恩到了如今有事之秋亦不過么魔小醜自尋刀劫你看靖逆記一書所載嘉慶年間教匪鬧事與此時一樣鬧了十二年還不是打平了你們總要日夜想如何出來辦

事可以報國家豢養之恩如何出來做官可展自己之才不必貪生怕死莫想肥家利己陳希夷心相云何爲端揆首輔常懷濟物之心何爲拜將封侯獨挾蓋世之氣范文正公做秀才時便是先天下之憂而憂後天下之樂而樂足見做將相爲名臣名儒的抱負不凡必要有此胸襟方能成大器想你們讀了一部四書又讀了五經看看高頭講章入了個學在鄉下胡說八道便自以高明人情事故一概不知忠孝大節全然不懂賊來則替賊放火炮以此爲榮差來則拒捕抗官以此爲能眞虛生在世也如此行爲如何是好願刁生劣監早改前非多讀二十四史綱鑑陸宣公奏議呂新吾呻吟語正心誠意克己復禮學

些經濟在胸中免得只知要錢不明道理在鄉下害我正安州之民出去做官又害別省之民也此本州之所望於文武生監者也貴州通省錢糧一年約十餘萬每年要用一百多萬都是江西湖南四川等省解來協濟從前雍正年間鄂文端公哈提台剿平苗疆你們漢人纔來做買賣置田房養子孫此地不但

是皇上家用兵打平並且還要拿錢養活本州獨怪那些教匪亦是漢人他不幫漢人打苗子却看見苗子鬧事他亦鬧事豈非在劫難逃招紅窩黑之人以及平日做强盜之人從逆猶有可解何以儘有有功名有家產之人亦從而生事此中亦有個道理我說與你們聽他們那些發財的人都是喪良心得來的

錢出壞子孫一時敗不完犯案亦花用不完即或花完不能滅他的九族所以爲教匪所惑以致於全家誅滅產業毫無天網恢恢何常有錯不過我們做地方官的人不能不諄諄開導勸得一人醒悟救得一人性命也依我說窮人是受了發財人的害膽小老實人是受了兇惡棍徒的害發財人說一個主意窮人雖知道不是却不敢違拗他兇惡棍徒之招紅窩黑交通竄役鄉下好百姓明明恨他因爲他的人手得力亦不敢違拗他本州替膽小鄉下人出個主意鄉下財主有武斷鄉曲不公不平的你們儘管來告兇惡棍徒你們打不過他亦暗暗告之於我我去捉他趁我做正安州幫你們除了惡人免得你們日後

受累此兩樣惡人一除日後鄉民既不受害地方亦平亦不枉
鄂文端公哈提台打平的一片苦心我皇上二百年養養你們
的深恩若祖若父的田園廬墓亦不致遭兵火燒燬豈非一件
防患於未然之事爾鄉下人從此總是一個安分守己耕田讀
書不要爲些小事故聽信訟棍刁唆打官司訟棍是靠包官司
吃飯你們有閑錢何妨給妻孥添補兩件衣服何必打官司花
錢蠹役訟棍巴不得打官司一個官司要拖累好些人訟棍蠹
役則從中漁利到頭還是老實人吃虧這樣看起來你們老實
人何必打官司無非爲口氣只要兩家忍一忍就過去了儉省
多少冤枉錢少耽多少心只要地方安靜年歲豐收老少團聚

比我們做官還要安逸何必一定入公門纔心甘耶此本州之所厚望於我鄉下老實百姓也只要文武生監貪詩書講忠孝不犯上子曰不好犯上而好作亂者未之有也鄉下人能替拿惡人不要聽信訟棍刁唆少打官司我的政簡刑清我州何愁不太平耶本州在軍營不得回城又不得時刻下鄉查場想我這些老實百姓所以寫出此篇就像我當面與你們說話一般聽不聽在你們了諄諄特示

勸婺川鄉民歸里示

本州之辦婺匪也與本州打仗者則陣斬陣擒之鄉團所拿者概行釋放兵練所至秋毫無犯不燒人之房屋望其歸來有家

可住也不擄人之家俱牛馬望其歸來有用度也招其急速回來者望其老幼團圓過此新年安排春耕而不受飢寒也覃元貞之帶練也打仗則打不過賊也燒搶則勝於賊也獲一投賊之窮民則殺之以爲功也獲一投賊之富民則傾家以贖罪也然後遍地之團皆變爲賊而婺川化爲烏有矣覃元貞一敗塗地矣本州之剿賊則與之相反今賀濟泮旣願招安矣爾良民還不趕緊回家安享田園之樂乎抑仍願受刀兵之苦乎以出糧草爲發財乎以造反爲榮耀乎以犯滅九族之罪爲顯親揚名乎以殺人放火爲忠君報國乎竊爲爾等不取也爾等肯受招安前事不追旣往不咎兵到之日秋毫無犯若要與本州開

仗本州已有備無患矣何者爲利何者爲害爾等細思之婺川已平婺川有官兵也有鄉團也四川有官兵也正安之善用兵之善治民爾等豈無風聞乎處於衆官兵之中而不就招安不求生路而能全首領者未之有也遇勦撫兼施之機會而不回頭立功愚之至也

給王述甫等札諭

爲札諭事照得市坪一帶如王芝鳳等富戶不少去年胡羊場勝仗之後解過捐輸錢數十千文今年聞馬嘴洪溪河山羊硯神仙硯已經攻破又解錢七十餘千兩次無非起心搪塞查捐輸乃爲百姓勦賊以顧爾一州人民之身家性命非官長以此

錢上腰也乃存心如此奸猾人心之壞風俗之偷一至於此恐不遭劫而不止也且地方富戶之財與其爲賊所用不如官長

用以勦賊爲此再札王

述甫培元

實力勸捐秉公酌量多寡勿爲自

己勿庇親戚如再不出力及捐戶不出財本州到彼斬奸猾吝

嗇之首級而燒其房屋賊匪能以燒殺逼良民爲盜我獨不能

以燒殺逼良民爲良乎子產論政以爲火烈民望而畏之所以

死於火者少孔子稱其爲惠人又嘆爲古之遺愛諸葛武侯治

蜀以嚴法孝直勸以寬武侯以爲法立而後知恩市坪民風如

此之壞紳士如此之偷安得不因其病而藥之耶孟子曰不教

而誅謂之虐陳壽稱武侯治蜀用心平而勸誠明所以雖嚴而

人不怨本州已兩次諄諄告誡恐市坪一帶仍未能家喻戶曉茲因王述甫來見除當面細論地方之安危利害外再親寫此札識字者萬目共睹不識字者亦可互相傳誦勿使他日身陷法網而謂本州言之不先也

給胡其珩札

照得職員胡其珩自咸豐四年梁三發財圍攻州城該職父子

即屢擒首逆自後州正堂

胡朱

辦理螺蟹軍務該職運送米石錢

文打仗出力今年正月二十九日賊破木耳灣鏖戰三日三夜

該員第九子先緒力戰陣亡房屋燒燬骨肉離散洵屬立功最

多受害最慘此次本州進勦螺蟹該員在廟塘辦理糧局其子

先恩先紹先科帶練隨營每逢打仗無不奮勇殺敵經本州縷稟上憲在案當此軍事吃緊廟塘公局須員總辦惟該職老成勤慎堪以委任合行札委仰該員總辦廟塘糧務及母猪壩防堵事宜所有在廟塘辦事之人以及在廟塘之團首蔡廷鏊蔡石龍趙品相等統聽該員提調如有偷安取巧陽奉陰違許該員據實稟報本州查明治罪因該職員父子急公好義任勞任怨特給札委以示鼓勵彼偷安取巧陽奉陰違之人見本州如此重用出力人員或可改過自新不至愈趨愈下本州有厚望焉

伯英遺稿卷三

鐵嶺于鍾岳伯英著

貴陽邢端編次

家乘

先大夫事略

(上佚)道光十八年六月到省謁大憲賀耦耕中丞以府君貴公子初仕慮未諳吏治姑留省學習是年冬仁懷縣鐵匠壩賊謝法直倡亂伊莘農制軍親蒞軍督勦由溫水逼進方家溝賊巢府君專辦糧台出納皆不經胥吏手衆悅無復言事平制軍將以功狀上府君君世受國恩不敢以微勞邀甄叙辭大吏由是器之十九年三月檄委代理長寨同知事長寨瘠而繁或勸辭

勿往府君謝曰遇盤根顯利器隨處皆臣子酬報之地敢以苦難避乎至任三月民苗大和有配犯爲盜失主覺起捕盜遁得盜遺刀拘某至一訊而服人稱神明八月移宰龍泉縣最繁劇多盜張七王者盜魁也最凶悍武勇絕人前令數捕不能得府君至未匝月訪得其出劫期親率兵練伏八公山盜出不意獲之論如律餘盜悉遠匿自是境內肅清府君尤愛士龍泉文風遜他邑六十年中獲雋僅二人府君課文指示瑕疵手爲批改優者厚獎之士氣一振有冉光泮者家貧賣卜府君巡鄉過其地袖文來謁見其文奇賞之令赴縣城肄業邑試拔置案首入學是歲庚子秋闈復助之貲遂中式廿一年奉檄始赴綏陽縣

本任

正安南川買桑枝數萬株教民種植養蠶之事大興故賦綏陽
竹枝詞山蠶不及家蠶好只恐山高難種桑邑人贈句亦有桑
陰遍野即甘棠之句在綏陽三年洞悉民隱人不能欺待士不
異家人父子而自乾隆嘉慶以來會試黜售者至是王作孚成
進士□□□□□□□□□廿五年甲辰奉委解連京鉛差去任
之日父老以磁器貯清水置明鏡於上遮道攀留泣下數行府
君兩事貢金之役襁被疲驢往返數千里時祖父邗山公致仕
流寓衛輝因得便道河南省視咸豐元年府君旋黔調署襄安

縣篆四年調署普安縣蒞任未數月而巴林賊起陷普安縣丞分駐之新城汎府君聞警急籌守備時承平久城無樓櫓雉堞圯敗同城一把總營兵五十已調征桐梓出學官皆送考出助守僅一捕官兵械僅廢礮一火銃三積儲則常平倉在新城戰守皆無可言乃馳稟各大憲請兵請餉飛移鄰邑乞糧集城內紳民議戰守札四鄉紳耆齊團練扼要防堵諭以保城即以保家務宜同心協力一面召工匠繕城壁製防具竭三晝夜之力城守稍備顧縣城窪下慮不可守在兵法善守者守郊原不善守者守城垣縣在萬山中樵徑叢雜隘口甚多計惟擇要守險爲上策而邑西江西坡安南東來要隘也南青山新城北來要

隘也於是議幕友孫君藕船典史馬公世臣率紳民城守命不
孝鍾岳率練扼江西坡要衝府君親帶練駐青山扼新城來路
十一月初二出師瀕行諭衆曰吾家世受國恩吾名臣後裔惟
有殫竭血誠鞠躬盡瘁而已是日師次蓮花山獲賊諜二斬之
初三日次阿岡遇賊督衆奮勇迎敵斃賊百餘生擒二十餘名
悉斬以殉稍稍卻而南安縣城失守之信至又探南安賊謀撲
我縣城府君慮城有失急折旆回城慷慨登陴集紳民誓諭期
共死守顧城中無餉外無援賊一圍城勢必坐困省城路俱阻
賊鄰封事亦皆不可知難持外援計惟赴雲南請救於初四日
召不孝鍾岳回命至平彝乞濟師命不孝鍾毓就近至四鄉召

練爲外援不孝等逡巡不忍離府君忿然曰汝曾祖母未歸葬汝祖父年逾六旬汝姑未嫁我之責我死汝等責也且汝等亦不當絕我祀況求援援至城全一家亦全援絕我一家與城俱亡去矣無回顧揮家人掖不孝等出嗚呼痛哉初五日有署劉官屯把總項德明奉調守南安帶兵五十名夜至府君告以南安城已陷乞項留兵助守項佯許諾府君喜甚厚餉士卒初六拂曉項遽引兵遁去百姓見官兵去譁言賊至驚亦走不去者老弱百十人耳府君左右則惟幕友孫君藕船與家丁廿餘人警報猝至賊不時且來府君乃急勸孫君行不聽府君笑曰君徇友誠義然無益於我我死二子在外得君相助殺賊報仇不

愈於同死乎因取孫君履命先母手綴帶並賦贈別三章又賦

絕命詩四章

絕命詩
見附錄

並稿付孫君催急走孫君慟哭行走平彝

將助不孝鍾岳乞師也於是府君謂先母張恭人曰事急矣將

若何先母曰此待君言耶吾與兒婦及三女已備死具矣賊至

當先君死耳君毋多慮府君大笑曰真子門婦女也是夜命家

丁持藁炬相率登城燃藁分插女牆上徬徨巡視二更時白水

冲賊至夜半南安賊亦至近城下府君手燃礮擊之繼以火鎗

賊不知虛實且見環堞皆火星驚却四更香山賊大至藁炬垂

燼北城虛無人賊遂由北城踰城入人聲驚喧府君見事已去

揮家丁走急馳回署則先母張恭人子嫻二妹子靈三妹子英

四妹不孝鍾岳妻司氏婢小梅已先自縊殉矣府君乃朝服出坐大堂以待賊黎明賊至府君曰夜放炮擊賊者我也可殺我毋傷百姓言畢大罵遂遇害咸豐四年十一月初七寅時事也時年四十有七以上皆孫君及家人逃出者告述得之不孝鍾毓招練方至茶亭猝聞難觸石暈絕爲衆救之始蘇鍾毓慟哭拜衆求協助練衆哀之且感動願出力共殺賊遣間偵賊賊以府君已遇害鄰邑僅自守無敢爲難者日縱酒高會而不設備遂以是月初十率衆進攻直搗城下賊竄而他去縣城收復即匍匐回署改殮遺骸一門慘殉躡蹠哀號痛不欲生時興義府城圍已解而普安廳屬及興義各屬邑猶有竄匪滋擾未能扶

檄晉省不孝鐘岳自普安廳沿途募團練勦竄匪前後十二戰擒獲逆首劉阿閏僞軍師劉九倫及夥匪多名興義一律肅清案內蒙興義府今張春潭觀察稟蒙中丞具奏以州同留黔補用不孝鐘岳旣不能隨侍九泉又未能與弟復城死有餘辜偷息人間何顏以對父母祇以靈櫬尙未回旂（下闕）

右稿爲于伯英觀察自撰先德崇野漁明府璟事略雖草稿殘蝕難窺全豹而自野漁以部選綏陽縣令入黔以來之仕歷以及咸豐四年在普安盡節一門同殉之情狀颯縷無遺且似在軍中殺賊復仇以後磨盾而書身膺家難語切悲憤文有未經點定者殘蝕之字又別無正本可補姑仍其闕隙

以存真筆吾黔咸同以來死難牧令事實頗多湮沒貴州通志局方在搜采軼聞于氏一門忠烈必早采入新志此稿雖係家傳然亦不可不存又于氏叢殘文件中發見普安知縣劉君所撰于公忠烈祠碑銘亦爲表忠之作事狀則取材於伯英所撰家傳附錄於左以資互證編者識

附錄一

贈朝議大夫綏陽令權知普安事于公忠烈祠碑銘

興郡古于矢部勝國以來仕宦之以忠義顯者十八先生而後得兩人焉曰朱公秋田于公堃漁于公死事在甲寅仲冬之月距朱公前後數日明年賊平事聞於朝天子有詔敕部

從優議卹進爵朝議大夫並於其地建祠以褒忠烈於是保陽周君來治斯邑謀諸都人士遂規址於城之東隅鳩工庀材戒期以襄厥事又明年及余視事之三閱月祠迺告成奉木主以庋於甌都人士徵余一言詔其繫牲之石余文何足爲公重間嘗取史冊忠節傳讀之如張睢陽顏平原文信國及近代戴山止亭陶菴諸先達卓卓大節未嘗不慨然想像其爲人竊以爲處死難處死而能從容就義則又難當蒼黃急難之秋苟非數十年讀書稽古卓然毅然於綱常名教之大未有不中情回惑苟且偷生以延殘喘者若公真可謂之無媿也已公諱崇璟字埜漁漢軍鑲紅旗人先世以從龍起

家三世祖襄勤公拜兵部尙書出授河督從征噶爾丹有功
入國史滿洲名臣傳曾大父紫亭公官御史有直聲大父以
下世篤忠貞公之出仕於黔也十餘年矣其蒞任盤水未數
月而巴林賊起時縣城窪下在萬山之中四面受敵公謀拒
要害會賊陷連城空城孤懸公慮之急退守先是桐梓楊逆
反守城百戶兵悉被征調軍裝捆載以隨常平倉米遠貯新
城至是人無尺寸之兵城無三日之餉人心惶恐朝不慮夕
乃集士紳十抽一推造器械動運鄰米以資接濟日夜涕泣
登陴諭民死守月之初六日劉官屯百戶總項德明奉調赴
安南公椎牛犒士留與共守賊急項引兵去是夜二鼓青山

白水冲賊先後繼至公猶督練登城詰旦賊衆大至士民交
駭走公於是仰天嘆曰寇急矣可若何城陷夫人張氏先自
經死其子婦司氏方有姪先夫人欲令偕幼女子英避難曰
儻何之乎迺與長女子靈次女子嫻及婢子小梅同時殉難
公朝服坐堂皇罵賊不絕口遂遇害嗚呼是可悲已賊至之
前一夕公長子鍾岳如平彝乞援次子鍾毓募練茶亭之村
堡惟書記孫藕船與公在署孫君於公爲道義交不肯去公
置酒賦詩贈之迫之行死生交誼終始不渝嗟夫自東南盜
起堂堂將相擁強兵提重鎮及覆師失守委而去之者何限
而公以孱弱儒生守百里之地獨能慷慨捐軀城亡與亡可

不謂偉丈夫哉畢命詩四章其末章云他年附入先生傳我
與秋翁二十人然則公之志可知矣公方面威嚴晴光炯炯
喜爲詩平生廉謹不可以非分干初公之來黔也以貴公子
屈於賀耦耕中丞羈滯省垣溫水賊變伊莘農制軍廉知公
有幹濟才委公糧務出納平準兵吏胥悅制軍器之中承意
左輒難公檄守長寨瘠苦且繁劇同僚勸勿往公不可以爲
出而圖君若避難非事上之道也至則三月民氣大和旣歷
龍泉綏陽任所至皆有廉聲甲辰由綏連京鉛去之日父老
以磁器貯清水置明鏡於上遮道攀留泣數行下凡公之得
民類如此厥後再事貢金之役僕被疲驢往返數千里輾轉

齊魯燕趙之間流連景物憑弔關河於是公之吟詠日富而公之家道日貧也今上紀元之初公歸自京師當道稔知公令宰甕安兩護平越州刺史篆四年權知今邑公之恤民勤政雖古良吏未嘗過焉死之日其次子在外聞難泣血誓衆時民亦感公遺愛殊出死力立復城池越三日昇公及夫人骸骨於邑之城隍廟而殮焉斬賊首以祭吾聞春秋之義大復仇今公死於賊而其子齎伍員之志效包胥之哭卒能搶天倒地轉敗爲功公可謂有子也已記有云有功德於民者則祀之公之功德藉藉人口矣況其節烈與日月爭光乎余不獲見公而繼宰斯邑備悉公死狀敢不糸其事而銘之辭

曰

赫赫苗裔肇厥從龍尙書崛起克勤克忠河渠有疏燕然勒
功帝曰咨汝弼予一人延延世地累公累卿柏臺骨鯁驄馬
有聲翩翩來鶴聲聞於天由祖及父德政丕稱我公之作一
自其躬克恢祖烈嶽嶽英英挾藝都下夙有令聞學優而仕
出爲循良口碑在道龔黃比倫狂獬入市天狼召兵年未始
衰罹此百凶陽九構禍大數以終闔門殉節殺身成仁夫人
城圯婺女星沉婉婉少婦家姑是從玉碎不點冰冽而清矧
彼義婢亦捐厥身梅花寫照弱質如生三年碧血千古丹忱
黔山蒼蒼盤水湯湯我公之節履茲艱貞白虹亘日黃霧塞

林小子有造墨經興戎厥考死賊厥子復城綱常懷懷惟孝
與忠生爲名宦死爲明神百世而下眎此貞珉權知普安縣
事劉□□撰

附錄二

于公崇璟絕命詩四首

乾坤一炬去飄然擺脫塵寰便是仙誓把餘魂仍作厲誅除
妖孽勝龍泉欲與明賢步後塵媿多遺憾負君親他年附

入先生祀我與秋翁二十人

自注明十八先生殉難於今與
義府願與朱明府秋翁同歩其

後

廿載夫妻苦若荼輒軻命運世間無與君携手泉臺去

三女相隨死不孤囑兒一事惟忠厚以此傳家可久長代

我奉親卽是孝嫁姑安葬慰衷腸

附錄三

鍾岳之祖卿保聞崇璟被難有哭崇璟詩載是吾齋集茲錄如左

哭崇璟

嗚呼崇璟吾長子五年不見今死矣作宰普安死王事死得其所猶不死嗚呼吾子真可憐一家軀命同時捐自古綱常重節義老人反袂爲掩涕

乙卯八月初二日得孫鍾岳鍾毓黔南書始悉長子崇璟夫婦死難顛末乃二孫殺賊立功得邀恩恤悲感交集

和淚詩成集和淚詩成不復計工拙也 六首

萬里書來不忍看
舍生取義古來難
誰知烽火盤州路
碧血濺時土未乾
黔南遠宦別庭闈
一去翻成永訣悲
太岳鴻毛同是死
死能報國是鬚眉
子女安排計早成
從容就義誓堅貞
可憐血影青溪石
異代同垂烈婦名
乞師一哭効包胥
繭足奔馳淚眼枯
念爾孤兒仇未復
大僚感動肯相扶
弟兄墨經共從戎
殺賊能將孝作忠
克復二城非爾力
祖宗佑得成功
奏捷論功達帝闈
同懷一例沐君恩
老夫南望收殘淚
不墜家聲有二孫

祭祖父文

嗚呼痛哉吾祖竟棄不孝鍾岳而長逝哉憶自隨侍吾父仕黔
以來遠隔天南我生不辰遭家多難繼而成立後蒙奏留黔省
隨即承乏正安遵義等處以地方多事募勇籌糧幾無暇晷屢
次差僕迎養吾祖不允即欲請假回籍省視又莫遂烏私每念
及此五中寸裂然猶私心自慰吾祖優游林下顧養天年待不
孝鍾岳能卸仔肩即可星馳旋里親承色笑得遂分飴之樂盡
孫心即以盡子職也遽料宦場之羈絆難釋而鄉關之凶耗忽
來捧讀未盡肝腸痛斷矣竊念吾祖少而穎悟七歲屬對皆成
童所不能及動作行爲均屬大度雍容得曾祖父歡因念尋章
摘句非救時之務遂投筆援例簽分東河嗣署洵河同知以水

淺難於轉運吾祖履任後利川澤建閘壩汰沙泥于是挽運無
停阻之慮而吾祖之心力瘁矣繼調祥河同知殫精竭慮每每
化險爲平以致能安瀾入告浸版無憂疊經河帥奏獎吾祖不
敢有倖心猶以勤慎自勗也至於補黃沁加府銜吾祖不見有
矜容仍更黽勉從公稍有餘力即以培文風植人材爲念服官
三十年其間兩當大事屢膺繁劇非吾祖之精神才識不足以
當此然而心力又爲之一瘁自道光丁酉歲解組歸田囊橐蕭
然書畫而外別無長物當其時吾父已著仕黔南屢奉家書均
以清慎勤相勉勵勿以老人爲念不料普安之變閭家殉城僅
餘不孝兄弟二人而吾弟鍾毓復歿吾祖聞信大傷厥心既憐

死者流異域復怙生者無恃怙心懸兩地愁緒萬端而吾祖之心更爲一瘁矣近年鍾岳雖迭經薦擢不次超遷祖父聞之或可稍釋前憂於萬一然自己酉旋籍稱觴後睽違又及二十載音容尙能彷彿以吾祖青年時廣額方頤致仕後骨相清癯精神瞿鑠飲食起居雖老如常祇謂吉人天壽冀享百齡詎期去年冬月初一日賓筵甫散身體難支即延醫診視進以益氣降痰之劑未見大效良因元氣虧損空則生風急進參苓大劑亦無起色延至初六日戌時竟棄不孝等而長逝矣嗚呼痛哉伏維吾祖一生持躬廉服官愼處家嚴御下寬退歸廿餘年不與世路相往還靜以養氣期頤可望也胡天不弔以不孝岳有可

盡養之時而天不假以盡養之年莫贖之罪不惟無以見吾祖亦且無以對吾父矣悠悠蒼天曷其有極茲擇期家奠泣訴悃忱靈其在天哀哉尙饗

祖考邗山公哀啓

哀啓者先祖體氣素健自嘉慶十五年分發東河即有洳河之委履任後增修閘壩糧艘暢行歷署曹河下南歷任下北祥河蘭儀黃沁等廳處處化險爲平道光十四年堵禦原武陽武支河險工興築磚壩尤爲栗河帥所重奉旨加知府銜二十年解組歸田優遊林下因工次積勞有嗽血之症先祖讀養生之書究導引之術調攝逾時勿藥有喜咸豐四年先嚴殉普安難時

五先叔已前棄世先祖睹家運迍邐不無傷感送姑母出閣有

句云雁行零落悲三子兄妹於今汝一人當時之悽愴傷懷略

可想見以致精神如故貌漸清癯自鍾岳署理正安州稍盡菽

水之歡

先祖七十自壽有句云長孫甘脆能無缺弱女于歸略慰情

每奉家書悉皆親筆總

諄諄以清勤自守上報君恩爲訓

先祖常寄詩云萬里家書至掀髯飲一樽汝今官刺史我

喜抱曾孫功立三苗地重興馳馬門清勤守寒素努力報君恩

而且文思周密腕力精強并稱

每飯一鵬飲食有加於前常邀二三老友飲酒賦詩興致極佳

身體亦漸豐富帶寬數圍鍾岳聞之私心竊慰以爲期頗可望

擬俟軍務稍鬆即循例告養侍奉慈顏仰副含飴之願今年二

月初一日鍾岳奉檄委署貴西道篆兼攝威寧州擇期啓行忽

值清鎮被圍軍書旁午大憲留辦城防兩局正在昕夕籌防忽
於十九日接到訃音痛悉先祖於去年冬月初一日與友人宴
集甫散覺身上不快猶以爲偶感風寒即延醫調治投以益氣
降痰之劑病勢略減至初四忽變中風亟進衽茸已經罔效延
至初六日戌刻竟棄鍾岳而長逝矣嗚呼痛哉鍾岳生旣晨昏
有缺歿復含殮未親抱憾終天百身莫贖慘慘惟先祖靈柩在堂
風鶴可慮先嚴先慈旅櫬淺厝黔南十載於茲道阻且長回旂
匪易不得不苟延殘喘勉承大事謹於同治二年二月二十二
日遵制成服擬即匍匐奔喪再圖歸葬苦塊昏迷語無倫次伏
祈矜鑒

上六叔書計復一切事宜

一大兩妹一及笄一十五倘有相當旗人即求 六叔大人與

景二舅主婚不必等姪回輝

一珠花一匣可變爲二兩妹嫁妝之資

一男女裁料一箱可由 六叔大人偕景二舅與二兩妹置嫁

衣

如有泥金泥銀米色袍套料替姪留一套再留夾襖一件如留不下即作罷論

一承賜埜地感激涕零更勝分宅之仁麥舟之贈當此多事之

秋淺厝究不放心自然以安葬爲妥其義塚內寄埋七柩一

並遷葬按昭穆次序各立石碣棺木如有損壞亦請更換此

事仰承關切私心感慰即請早辦勿待姪回

但王貴之案宜令寫立賣契契

明價足以免王
貴日後翻悔

一貴州近年軍務更糟省城外居民均被練搶極擬離開囊橐
蕭然有走不動之苦又有 先人靈柩未葬擬百日後稟明
兩院單騎啓行眷屬留之貴州

一老姨奶奶舉動性情親友所知留於輝縣固然不妥迎到貴
州亦未盡善擬於渠之數百千衣物略置田房住居輝縣 姪
每年些須分潤養其垂暮之年 六叔以爲何如

一大二兩妹有相當旗人婚配固是好事若一時高底不就可以
搬進城內賃屋居住與衙門相近之處便於照應城外之房
變賣以作用度 姪到輝自然接來同居如 姪不能回豫亦必

派家丁去接但未接之前能說着人家更爲妥當耳貴州旗人更少婚嫁甚難二大兩妹及老姨奶奶姪有缺必寄養贍也一吉格到貴州之後一切無出息情狀曾稟明 先祖決不令渠到輝多事也

一姪現有奏留仍署西道之說如果不能起身姪下半年崙人到輝接二大兩妹此未出閣之說也並祖宗神主影像小照書籍古

玩等類唯有老姨奶奶一事尙祈 六叔大人鼎力爲之安

頓或請姪姑母勸其變賣衣物數百千之物也買置田宅在輝住家

姪每年稍寄養贍以終其桑榆晚景若老姨奶奶決意來黔

只要能守禮法亦聽其便

一姪未耑人以前老姨奶奶與^大兩妹可以同居其城外房子太寬二三女流何以居住自然在城內賃小房居住接近衙門方好照應

一以後信息交馬遞最快萬無遺失若專梁升等類徒花盤纏至今未到驛遞一信摺差一信均係二月十九日黔摺差之信亦是由馬號送來摺差尙未到也驛遞八十日可到摺差須八個月也

一朱露亭先生贈以栢樹百株姪隨後寫信申謝

一老姨奶奶^大兩妹閑居用度以節省爲妙先祖去世家人

小子厨子火夫可以裁減變動珠花及男女裁料一箱能可

替^大兩妹製妝奩至於日用倘能通挪不動當舖中所寄之物姪只要有缺其寄銀信與先祖在日一樣不能視兩妹如路人也

一先祖有手著餽飮集及詩稿之類祈囑姪姑母尋出珍藏不可遺失姪到輝再爲面領或崙安人到輝亦可交付

一此次大事全得六叔大人深仁厚德歿存均感一家女流幾乎爲外人所笑枉自先祖做人一世身後風光子孫體面皆爲大恩人所成全也感曷有極古道猶存於六叔大人之爲人益信此語爲不謬想起經開弔及贈塋地所費不貲姪等不知當如何報答只有一家老小日夜祝六叔大

人富貴壽考簪纓鼎盛子孫百世蕃昌伏念家中自祖宗以來手澤書籍糟塌太多此時稍有所存敝帚千金姪所以寧可借賬以養老姨奶奶諸人不願變動書籍字畫古玩也祈曲諒下情勿以姪爲見小

右家書一通蓋鍾岳祖父邦山公逝世後鍾岳在黔聞訃致書其叔處理若祖身後家事於遺牘中得之移錄於此以從其類鍾岳聞訃事在同治二年二月時貴州軍事方急省垣戒嚴請假奔喪竟不允行又奏留仍署貴西道賊踪縱橫苦戰不息遂及虎頭山之難哀哉其處分輝縣家務且拳拳於先人手澤書籍字畫亦可於此書見之故余

輩收拾遺牘亦不禁爲之慨然也編者識

伯英遺稿卷三終

民國癸未紫江朱氏刊印

伯英遺稿跋

啓鈴童時侍先母居長沙讀書外祖傅公青餘家一日忽有旗裝女客自黔中來憐舟河干向外家告貸外祖母劉方赴鄂外祖命吾母出應客偕來者有衣冠少年冠四品詢姓氏似曰楊即其子也則命余與敬之表兄夔陪坐飯於書齋云尙有一女守靈舟中以輿往迓未果來彼時聞吾母呼旗婦爲姨母敬之兄告余此嫗與吾祖母及外祖母爲通譜姊妹外家欸接甚殷又念其窮途贖以二百金信宿始去余睹漢軍旗裝詫爲初見而少年則作黔語舉止談吐猶帶貴胄氣息其行色至今猶憶憧在心目是爲光緒十二年丙戌冬間事後六十年蟄居舊京

蓄意蒐採鄉邦文獻初得于公鍾岳西笑山房詩鈔刊本繼再
探索肆人又捆載其生前手稿及家世事悉歸於我整比而綴
讀之知于公殉難後遺族羈滯黔中者廿餘年扶輿回旗正在
是歲嗣子延忠方成年承襲騎都尉世職故厥冠四品舟中守
靈之女則字佩蘭者也稽其家乘一行三人情事都合當時余
誤聽傳呼以少年爲楊姓蓋旗俗以官名首字爲稱延楊聲混
遂致迷離童時懵懂今始恍然悟及向所見者即于公之繼室
楊夫人也楊旣與吾家有雅故其歸櫬之舟以冬令水涸自沅
紆道入湘鈴也適侍吾母寄居外家得一日之瞻對此中殆有
夙因不意易世而後其家流出遺牘乃展轉入於余手冥冥中

若有主使者誠不可思議已楊夫人保守其叢殘文件鐫存行
篋與孤女佩蘭什襲珍重不輕示人泊北歸佩蘭適貴筑許穎
初丈未期年而殞又數載延忠亦歿楊夫人遂哀取佩蘭手鈔
稿及延忠生時官私文書囊括入之余既無意中得此摩挲永
日幾忘寢食顧淩亂殘蝕不可爬梳而手稿之塗乙潦草首尾
不完者彌難卒讀就中惟鄭子尹先生手寫贈伯英太守長歌
一首及所寄詩箋皆字墨完好人知寶重遂先付裝池乞傳沉
叔宗伯邢冕之太史爲長跋述其來歷于公遺烈遂得彰聞於
都人耳目余終以其事狀未能刊布有慊於心荏苒數年衰疾
稍間復發願整理殘楮就其有關故實之作蠹漉一過詣商邢

君執筆纂述邢君以殘牘不足以盡其生平黔中方志所載本傳又多絀漏乃夷考平黔紀略備叙戰績旁徵其先世著述補入家世闡幽發微凡所見知靡不甄采爰輯成別傳一卷遺稿三卷斯真所謂收拾斷句遺編功同掩骼埋胔者不特足慰于公於九原即余於窮年短景得遂觀成默憶前因亦快然如釋重負至編餘手冊家乘無所附麗者祇可緘滕付之國立書藏以待鐵嶺于氏子孫後起之賢矣烏乎天時人事茫茫若此邦家遺獻穀魄幽光但得猶存天壤不終泯滅斯即吾曹後死者之責邢君所以惓惓於此者其亦同茲微尚也歟

民國三十有二年十月紫江朱啓鈴書時年七十有三

于鍾岳別傳勘誤表

頁	行	更	正	誤	說	明
六	十九	衍		鍾岳		
一三	一二	閏八月		閏七月		
一三	二〇	上字衍		上遵義		
一五	二	賊		戰		
一八	六行註	舍富民而言利國 舍內憂而言外侮		脫一字 誤二字		
一八	一八	五成		五或		
二〇	一八	將楚國池魚以同殃		脫二字		
二〇	二〇註	曰正安集		曰黔南集下脫四字		
二三	二一	鄒開桂		周開桂		

伯英遺稿勘誤表

卷	頁	行	正	誤	說
一	一五	一註	傳	傳	明
全上	一一	一五	繩	燬	
全上	一四	八	勝秉	勝東	
全上	一五	二	勝秉	勝東	
全上	一五	二	優詔報之	脫優字	
全上	二一	七	固勇	因勇	
全上	二九	一五	衍	請	
二	二六	一九	孔子曰不教而殺	孔誤孟殺誤誅	
三	一〇	一	衍	集和淚詩成	

黔南叢書別集

西笑山房詩鈔

紫江朱啟鈴署

癸未冬十二月

紫江朱氏印

西笑山房詩鈔序

于公伯英以從龍華胄世篤忠貞弱冠從軍中年膺難其生平
行誼著述曩紫江朱桂辛丈旣已發諸塵篋命爲釐比近復自
蠹餘中得軍中詩稿一卷審其籤題蓋寫正於友人劉紫熙者
大抵蒐入西笑山房之正安集中其散見各處未入集者尙佚
二十餘篇觀其少孤早客執掌風塵下馬著書橫戈草檄當劍
炊矛淅之時猶有雅歌投壺之樂引商刻羽或託賦於閑情臨
水登山或低徊於往蹟雖少年跡弛惜爐火之未青而戎馬悲
吟披肝膽而皆赤斯則并門嘯月無忝越石之歌夔府悲秋仍
傳杜陵之詠者已朱丈憫厥遭際重惜清才旣彰其蒙難之艱
貞復不忍沒其嘔心之文藝爰就其手稿所遺暨黔南正安兩

集中之有關黔事黔人者物加甄采鈔爲一帙藉覩志慮之忠
純匪較詞華之工拙其撫時感事與吟風弄月之作自存集中
無煩鍾贅嗟乎尋蠹後神仙之字九原應有餘哀溯生前孤憤
之篇三世胥推作者陳思遺集或索叙於夢中溫序忠魂倘思
歸於塞上知人論世之君子亮有取焉

民國三十有二年癸未秋八月貴陽邢端序

西笑山房詩鈔

第一帙

鐵嶺于鍾岳伯英著

紫江朱啓鈴輯

黔南集 遂錄古近體詩凡九十七首

鎮遠謁甘忠果公祠四十韻

公諱文煜漢軍正藍旗人死吳三桂軍之難

義殉封疆日機槍指漢宮千秋逢主聖一死重黔中
皇極彌綸始朱明歷數終廟猷思奠乂侯服擁軍戎
陳項驅除迹高光盪滌功惟公膺特遇持節導仁風
主將方安忍么麼欲內訌連盟誰併力逼處且和衷
已辨身投虎何妨圈逸熊遂初違彩服敵愾念彤弓
抔土洪流障維城衆志同醇醪懷士卒剛正懾奸雄
守禮情難奪歸途亂始蒙蕭牆擊鼓動驛棧羽書通
羣小塗爭附橫流勢逐淖鯨鯢殊跋扈鷹鶴脫條籠
臣膽徒如鐵軍符未

握銅運謀兵不宿欲守土全空事去皆成敵城降豈待攻株知

難守兎刀便解鳴鴻樹爲枝朝北山呼寇勿東還餘三尺地完

此百年躬慟哭眸如炬臨危氣吐虹生無臣節玷死念國恩隆

赴義嗟眞果惟癡乃作忠威稜資保障氣節壯衡嵩潏水英魂

寄星山廟貌崇駿奔來宦案報賚走村童岌巖環營嶂

是處有
戎背

山臨江
而營

櫛慘冒雨樓

山多棕
樹散之

霧岑淞樹白鏡吹戰旗紅

時黃
平苗

鎮微兵
遠

蛛落空廊網麋虛廢井罍我隨春往返

予去年三月
此今歸來乃正

三月初
也

山未雪銷融香爇金爐炷松鳴石澗濠畫簷冰挂筋瓊檻

篆留蟲忠孝家風遠悽惶道路窮流連尋故址踣踟望蒼穹輿

馬催裝束瞻依劇遽恩感懷遭郅治憑弔想膚公祠宇行人拜

蠻荒祭秩豐酬勳昭代典永遠嬌商彤

宿鎮遠逆旅聞黃平苗亂喬見齋中丞

用還

檄胡詠之太

守

林翼

勦之喜而有作

道光庚戌

望闕八千里歸流二百年鐵橋梁漸蠹銅柱字猶鏤道路初聞
警行囊不自全緬思滇海事遺恨滿山川

萬戶爭傳說青年董少平鬚眉神早異發摘衆皆驚奉令權軍
旅專城擁旆旌從容諸諷議協力乃功成

談笑無蠻貊斯民自此蘇奇功由謹慎小寇易銷除笑我遲投
筆何人健執殳家風恐終忝感懷一踟躕

題甲秀樓鄂文端公

附奏

鐵柱一百韻

蠻溪歸盪滌凋劫入甄陶圖籍加前古英靈效聖朝緝熙承列
祖蓄銳克三苗勦扈功高啓誅防緒纂堯憲皇臨極宇海內樂

鈞韶化洽遊原鹿仁翔解網鶴軍曾郊射散民肯太原料丹微
頻蠕動蒼生恐瘳凋封疆誰保障痛癢切疽癰宵旰平成念臣
工俊乂挑驂騶難伏櫜鸞鳳必翬霄神武規模闢英雄事業昭
論兵李廣利命將霍嫖姚國豈勤兵甲邊偏苦摸猺相攻成越
習屢叛作梁跳元武鈞陳暮群山萬壑遙九征司馬法三錫侍
中貂克捷功名盛金錢賜予饒一時嗟土改不復視民挑烽燧
重馳警元戎更握弢雷霆天子怒風火大軍標寶校星躔動崑
岡玉石焦分憂能作范發難不同鼉身總師干久風傳鼓角嘹
轟牙演闔建旌旆粵疆飄獸跡峯巒斗羊腸道路橋地危仍布
陣途險且乘橈禦侮長城倚隨車好雨澆當斯邊事急益勉令
名勛哲匠須斤斧長川要楫橈得人皆彥俊律衆不喧囂虎旅

頻伸約魚麗每出療矢心如礲日占象立清宵帳外寒風露軍
中肅樣刁集思無固我受益遍群僚斟酌無遺憾才能必見招
鵬鵬寧有種燕雀亦舒翹廣泗張鳴金鎬元生哈奪錦鏢挾舟
皆競走在軸賦重喬未縱胥臣馬先鳴謝艾鵠投籤忘半夜滅
寇食崇朝韜略經猷密精神志念謬自從專秉鉞豈敢倦征輶
氣象山凝重邊疆彼蕩搖入深無淺試持重不輕撩全勢天將
壓先聲質可要養鋒期破竹勸役罷吹簫猛士風雲合王師甲
冑穀雄心無鉅鹿勇氣鼓夫椒礲火飛狂電柴塵厲急颺嘯呼
添翼虎奮迅脫韝鵬慾獐神魂奪將軍士馬驍兜鍪忘重滯驅
騁劇騰剽餘勇吾猶賈回奔寇不驕剗腸林已滿流血杵橫漂
挺險亡甕樂隄岑走獾獠游魂無隱遯捷足失輕趨官吏因全

土渠魁已伏臯人寔瘳痼疾山鬼靖姑媼清間分良莠虔劉取
血臂策奇由謹慎略地出荒要懋績徵忠亮饒歌止殺噍力回
金虎燄光爛玉衡杓葛亮能平獲田單竟下聊勞多終底定任
重費和調勳業由磨折聲名始遠條經營參管樂將相一韓蕭
駕馭英豪展明良際會邀黃居巢鸞鷟頰尾念魴鱗帝力還耕
鑿黎情遂袞纁弓刀弢府庫劍戟鑄鉛鉛聞喜同鄉地垂名子
父鑄甘棠周念召刑鼎鄭思僑銀鏤梁州貢光精柳宿歆一勞
逸萬古百鍊此孤標大冶鑪錘運功臣款識雕風雲長爲護姦
僞不萌袂石鼓魚龍讐金鐘瘴癘銷直陪天柱立詎作大瓠呀
畫像麒麟閣成功庚戌橋馳書纔獻捷賜甲又征遼綏屢禾雙
穗徵祺峒溢鐔英聲留水秀勝蹟鎮山魃陡起危樓庇拚無劫

火燒滇黔生氣色棟宇俯岩巖武帳嗟人往文棧自嶽嶠登臨
多遠意憑弔發長謠莫問當年事言尋谷口樵黛光橫暮嶺卵
色上春潮水荇風猗靜巖花雨助嬌磬聲清桂殿香影度蘭橈
寺柏青留幄池菱綠折腰行人聽濺瀑遊女曳輕綃雲水高懷
寄鄉村罨畫描戰場分畎畝古跡詢荔萸世界昇平久郊原禾
黍橋優遊吾輩樂煦育聖功超交趾名烜赫荊州觀寂寥丈夫
當血食陋巷笑簞瓢漢相祠堂對千秋共不祧

相對爲
武侯祠

雪厓洞望河亭夏夜獨坐

以上爲庚戌在貴陽作

水月光無定開簾宿鷺飛仙臺香冉冉竹院露微微夜久梵聲
寂燈明泥飲歸避喧來古寺未覺賞心違

鐘磬諸天罷疎槐月挂鉤露苗如雨洗河水帶星流市遠茶瓜

潔人稀風景幽深宵吹鐵笛山氣冷如秋

靜坐風吹竹長吟月轉廊水雲心澹靜蟲羽意悠揚石氣侵衣
冷泉聲傍枕涼只疑幽寂處自有一仙鄉

登仙橋山放謔

辛亥侍宦塞安時作

驪山茂陵生秋草人生富貴焉長保對酒當歌詎幾何鬚眉蕭
颯成衰老我昔夢從仙人遊驂鸞跨鶴歷九州銀臺金闕五雲
裏下視群生如蜉蝣以茲感悟盛衰局白衣蒼狗變倏忽欲騎
白鹿尋仙人老住名山鍊金骨伏我白虎騎青龍談道遠求張
三丰東入滄溟阻弱水颺靈浩浩吹天風忽聞三丰仙人在平
越南遊甕水肆空闊幾兩麻鞋踏白雲諸天清夜聞仙樂嘈嘈
仙樂鳳鸞鳴萬籟百泉淒以清登高一笑海天闊七十二峯秋

月明仙橋山高幾千丈雙峯萬古屹相向誰使人天有路通儼
然刻劃橋梁狀我聞牛女佳期苦寥曠年年歲歲長相望倘使
銀潢有此山雙星何事愁風浪又聞秦皇漢武求神仙文成徐
福無真詮樓船童女葬弱水蓬萊宮闕空雲烟精衛之神銜何
冤啣石欲將東海填南山巨石啣欲盡東海浩浩無涯邊我欲
遠假秦皇驅山鞭橫之弱水以當長橋懸蓬瀛方丈來眼前遨
遊不假舟與船百丈長虹懸邈綿安期羨門相周旋相周旋談
重元後天而老千萬年躡彼雲氣遨遊青天朝餐沆瀣暮棲紫
烟肌膚如嬰兒顏色桃花鮮化鶴歸來青松巔但見悲風蕭蕭
吹墓田阿房宮中一炬火昭陽殿裏青苔錢嗟彼既無神仙骨
金莖承露皆徒然不知姓名匪外務紛紛制作徒可憐吾生癡

頑如嬰孩山空月明空徘徊夜深星墮碧峯頂懸巖瀑布鳴風
雷日出扶桑青鳥回遺我素書緘不開雙雙玉童如瓊瑰五銖
飄飄來九垓勉我道心無塵埃丹成許臥金銀臺自笑此身非
仙才偶入名山心悠哉殷勤爲我謝王母一曲長歌歸去來

冉樂齋孝廉

光祿

公車北上賦此送之

人生離合信前緣此去都門路幾千惆悵瀟湘好秋色青山紅
樹孝廉船

送杜杏東廣文

芳璽鄉試

播州才子三四君我雖未見名早聞思與抵掌談典墳大樹旗
鼓張三軍莫友芝鄭珍文章曹劉亞作詩往往凌鮑謝草元見
笑鄉里兒好奇每被甲科罵遠辭故里走長安長安貴人皆交

歡西蜀父老笑陳壽江東人士尊虞翻杜公文才蘇與韓少年
玉貌黃門潘潦倒場屋不稱意滿腔血淚增悲酸猶憶羅魏典
公撫黔載聞君文名虛心待幕府先收庾杲之憐才雅似李北
海英豪吐氣當有時成敗紛紛難預知衆道橫凡可登第誰知
李廣數偏奇驕驪健步不得騁歸作廣文守清冷小市聊謀苜
蓿盤鳴琴更奏飛龍引君不見郴州將帥喧鼓鼙烽烟氛祲昏
粵西天子憑軒思大將羅公擁節出京畿男兒生不作相當作
將手刃鯨鯢靖風浪好施霖雨洗兵戈不重繭絲重保障含笑
贈君雙吳鈎勸君辭鄉遠行遊愈風試草陳琳檄借筭更展張
良籌長歌奏凱獻天子高文磨厓留山陬何必棘圍苦跼蹐富
貴功名不可必試官誰是有目人榜前不免無名泣嗟嗟吾子

非常人矯矯仙鶴翔雞羣璠璣武夫自有分明珠魚目難同論
安知不遇六一君東坡一鳴不再鳴文章福澤原相成摩天巨
手擎雲行紆金拖紫長安城如拾地芥何足驚

胡克生覽余詩稿賦七古見贈書此答之即以誌別

年來貧賤耽苦吟架無藏書囊無金郊寒島瘦顯者笑垂眉聳
肩頭泔泔憶昔旅食夷門下短歌微吟用自寫地老天荒困馬
周悠悠誰是知音者竭來得從胡君遊英才亮拔天人流高談
尙論蘊今古布衣韋帶輕王侯氣吐虹霓志冰雪交傾湖海肝
腸熱下筆騁驪踏九州神駿何甘受羈勒感余意氣傾余詩贈
余長篇絕妙辭雷陳管鮑久已死千秋誰果心相知感君知余
握君手人生萬事付盃酒幾日春風動地來開遍城南好花柳

行當携酒仙橋山高歌暢論巖石間光陰一去何時還雨鳩風
燕爭飛翻桃花柳絮春漫漫一身留世能幾時對此聊以開心
顏岳也賦命苦窮薄朱顏綠鬢輕銷落亦欲傾身事典墳相對
古人足爲樂無那饑驅不自由歲歲風塵染京洛白眼時逢行
路人無才敢怨長飄泊胡侯胡侯寧久蕞簪毫射策登朝堂致
君放勲風陶唐勿學寒蛩吟哀傷威鳳千仞高翱翔離離噦噦
鳴朝陽元首明哉股肱良虞廷稽首賡天章我將遊覽江湖鄉
相逢漁父吟滄浪權謳隨意無工商興來挂席浮瀟湘百年三
萬六千場亦知後事終茫茫誰能預卜否與臧不如酒傾千
觴別後相思天一方果富貴兮毋相忘勉旃特達爲圭璋名儒
循吏邦家光無爲伯英瘦而狂

用南史王僧
朗沈昭略語

眠食以外無一長

雜詩

赫赫權貴門黃金昏乞憐奄奄翳桑人過者慳壺餐當用乃爲
貴失時良可歎於彼無取材焉望披心肝世風日澆頹壯士誠
艱難矯矯淮陰侯寂寂垂魚竿歛然遇眞主奪幟驚登壇如何
高鳥亡良弓旋摧殘當其事推解恩情非不殫用之席上珍功
成敵旣捐楊公飼黃雀非希白玉環隋侯縱神蜃明珠自來還
漂母飯王孫不意酬金千施與貴至誠千秋稱其賢

聖王重五教明五刑以弼用意固已周末學詎深悉少年者誰
子顧盼氣驕佚伸眉論是非張目肆呵叱一丁字寧諳四子讀
未卒挾其揣摩工名以申韓術以茲千貴遊青袍贊幾密塗抹
鄙俚辭哂笑燕許筆無復張殿才獻成互得失同黨據要津匡

救免窮詰坐致陸賈金私囊日富溢食厭梁肉精藜藿不遑恤
出入裘馬都氣燄視顯秩東家有賢子閉門論著述季子書十
上展禽道三黜終歲求童蒙十金贍家室飢饉雖未逢溫飽不
可必宛轉場屋中紛紜比蠨蝥以視相府蓮晨星望朝日男兒
生世間百年殊未畢出門懷苦憂狗書受貧疾偉哉駮舌人捷
足信超軼蘇髯豈不豪咨嗟未讀律

定鼎征戰餘所宜崇文章垂拱治平世猛士安可忘武王克殷
紂歸馬華山陽武成豈不偉貫革不可長宣王委方召師干稱
鷹揚讀彼六月詩元戎先啓行吉日狩東都侯伯齊來王誠以
久承平文治旣汪洋甲兵日凋喪騎射無精良外侮與內難伊
誰先受殃濟之以武功皇猷用以彰晉悼聽和戎是時國富強

方爭長諸侯詎屑威戎羗魏絳識其幾六議不亦臧鄙哉宋左
師乃欲甲兵藏盟主旣孱弱楚氛不可當譬以水濟水何以爲
弼匡子罕誠知言千秋仰芬芳君子貴觀時未可主故常下士
駭高論掩耳走且僵醜醜凡庸才規圓而矩方有宋胡安國經
筵日趨踰尙論戒黷武二帝淹北方不思復國讎目論徒偃偃
豈其賊檜薦和議相狼狼兵以止暴亂亦以守土疆聖人以之
興亂國以之亡皇皇宣聖言所以警聾盲以不教民戰是棄於
鋒鉞後世有天下戒之慎勿忘

國容不入軍古先民有言奈何舍騎射揖讓相周旋草淺百獸
肥旌旗羅平原將軍日夕來裘馬何翩翩柔脆如書生烏號不
得彎徒令介冑士群立如堵環古來頸虎臣狀貌稱桓桓公侯

誰干城糾糾如羆豸手力不縛雞何以親戎旃恨時無貫高復
誰笑其孱

百戰百勝將所用多親兵平居心相知推解感恩誠醇醪投河
流飯食同蠹精士願爲之死破敵誰能爭不然彼小人豈解談
忠貞恩匪泰山重命豈鴻毛輕今也百夫長一歲遷其營各存
苟安志誰懷功與名小醜施陸梁闖韋同出征上下情不通謀
猷無所呈未戰鳥獸散各各謀其生吾欲求勁旅樹恩幽燕并
當代名世賢釋褐自科目皇道方清夷雲龍運相屬奈何庸妄
子泥古薄今俗高論舉賢良可得英俊物吁嗟選政難明珠混
魚目苞苴行其間變法滋流毒將使名器尊遂爲私門鬻念彼
葵藿餐月謀一斗粟無金以致身猶然榜前哭

網密滋文過權輕建功依違圖苟安上下情相蒙漢武苦羣盜沉命坐罰重畏咎趨粉飾探丸日以充刼掠滿江湖郡守若癡聾豈無英傑人傷時懷深衷射罷落雙鶴手握無弦弓緬我聖祖朝邽治稱熙雍皇心美寬大推舉由至公循良十數人星羅寰宇中詎屑漢唐盛力挽黃虞風萬物由夷庚四海吟綏豐至今草野人謳歌念穹窿粵稽定制初今古相參融至當不可易六經堪並崇奈何蒞棗嶺據位甘凡庸行之不求實具文如書空所難在得人制度靡不同制度固猶昔賢才難比蹤英雋沉下僚不乏枏梓材所恨功名薄局促如輿臺良驥困鹽車何以殊驚駘高談論經邦見者驩然哈黃鵠志千里燕雀群相猜建牙者誰子膽識如嬰孩救過日不暇遠大非所懷自謂

頗持重姑息貽患胎雪涕灘江濱生靈罹其災

讀破萬卷書更作江海遊郡縣百利病一一窮冥搜釋褐登堂
皇雷雨思經猷豈不慕往哲去日甘棠留其如供應煩百事苦
徵求經用日以新稱貸長不周欲作眼前功遑先天下憂嗟彼
吳下蒙木天吟呻嘸一朝作方伯權均古諸侯逶迤旌旗來負
弩迎道周顧盼如神仙善道遑諮諏未與牧表接矧知飢溺愁
褊心向鄉里故舊乞美州上書不必實黜陟快恩讎國史循良
人無乃異此儔人生幾何時處世如蜉蝣所恨蒙短褐無以揚
天庥奈何衣金紫不別薰與蕕芻蕘作風詩俯仰懷前脩聞者
足以戒言者庶無尤

留別何渭生

之子愛書史風流今晉人經時臥空谷養氣如初春中散竹林
賞左徒芳杜鄰遙遙千載上高致若爲親

相逢纔幾日相別落花時驅車惜芳草臨流折柳枝山山落日
晚去去白雲遲揮手河梁上春風吹鬢絲

有感十首

錄二

潦倒天涯十載過舟車貧病苦消磨方嗟書劍長安遠漸覺風
雲戰壘多燕趙將才終寂寞朝廷衰職仗誰何書生苦被窮愁
累不爲憂時鬢始皤

文章經濟兩模糊豈有奇謀到腐儒忍使豺狼當道路釀成寇
盜滿江湖春深北去無鴻雁風急西飛有夜鳥欲爲人間洗兵
甲早從黃石受陰符

俞淵淳徵士讀書貴陽城南山寺中癸丑夏日乘興過訪

即景得七古五章

俞郎養真厭塵俗鑿徑通幽碧山麓稷稻作實茄作花山榴紅
綻晚桃熟綠蘿寂寂陰寺門小軒叢桂忘炎燄掃地焚香誦今
古客來揮塵同討論賤子聞名走相見清才妙論中心羨何日
提携酒一罍僧寮蔬果開清宴

山塘水淺多芙蕖時獲素藕蓮葉俱主人餉客盡歡樂更指河
中多鯉魚因之頗憶江湖鄉錦鱗初肥香稻長十年從宦滯南
裔葦鱸孤負秋風涼多君絕不憶鄉里知君至味在書史白芍
紅菱佐晚餐僧廚惟乞金沙水

汲泉自煎鷹嘴茶水聲如蟹爬銀沙銅鑪活火諳舊法開鑪白

浪翻松花河樓離妓弄音樂樓上遊人恣歡譁

山寺對面爲雪
瓦洞望河亭是

歌日有人携
鼓其上手

有客憐然泉石間山水清音勝絃索興來嘯傲吟滄

洲列坐賦詩臨清流蕭疎槐柳覆磐石吟聲未斷蟬聲秋

鋤禾汗滴日當午吾儕慚謝老農苦開軒坐對千丈松滿院仙

風語鸚鵡浮雲冉冉生空天霹靂列缺雲脚邊電光一霎不成

雨烟雲散淨天蒼然清談不覺日將暮渡口依稀暗烟樹萬壑

千峰暝色迷一行白鷺西飛去

齋魚粥鼓音且清妙香冉冉佛火明夜深露坐寂無事空廊飛

墮蝙蝠聲須臾解制老僧飯野田風靜水聲緩禾苗萬頃青琉

璃伴月幽人睡恒晚禾根滴露苗翻風蛤聲如雨明月中夜半

高巖響泉水夢回疑在錢塘東

雨中至扶風山

甲寅

入山路匪遙登山力已竭但覺寒意深峰頭雨成雪古寺一聲鐘寒烟翳城闕

仙臺自今古菩薩纓絡鬘俯仰六合中俱作平等觀春疇麥苗秀高墳芳草間春風意無限忽憶江南山

寄懷張步堂表兄

仁樂

大梁

王孫芒屨士萬里客遊梁驄馬速流電寶刀明雪霜賦詩江總宅結客少年場與爾經時別相思蕙草芳

馮杏村師七十初度日即席賦詩

幽蘭在御嘉賓盈堂主人宴喜曲室洞房

一解

鯉魚在盤庖丁

是膾旨酒盈觴嘉賓是醉

二解

嗚嗚洞簫淵淵鼉鼓巴童清歌

齊娥妙舞

三解

雞棲庭樹日薄虞淵明燈繼夕博山歎煙

四解

翩翩者鴻載好其音展矣君子實獲我心

五解

人亦有言芻蕘

不廢相贈以言古人所貴

六解

自非王喬誰能神仙怡神養性

可以永年

七解

勤爾所職崇爾令德爲圭爲璋以匡王國

八解

驚馬安步騏驎可追庸行無愆賢聖是規

九解

惟友輔仁惟仁

是寶衆賓稱觴主人壽考

十解

武昌謠

江流嚙沙嘴賊行速如鬼鐵礮壓城城已摧官民十萬同日死

蒼蒼古城中流血成海水

一解

朝來上城望青天但寒雲戰場

彌平沙曠野無行人骸體生齒牙人頭藉藉白骨如亂麻嗟爾

江漢之民何以爲家

二解

誰家婦人抱子哭棄子中途草間伏

賊斫小兒局縮肉眼中睜睜血出灑賊去潛出逃滿目迷蓬蒿
彌望斷人烟積屍邱山高行行血沒腕零淚沾衣拊膺歎

三解

誰家少婦顏始紅被賊驅入犬羊中崎嶇道路摧頽霜風鞭撻
宜咎號呼句句求死不能得呼天天不曉青雲萬里任翱翔恨
不輕身似飛鳥

四解

水西兵敝布單衣潛逃歸爲我言欲言未

言雙淚垂大營無軍糧人馬同時饑賊去空城空劫掠任所爲
志在獲一飽不知所爲非噫吁嚱馬無豆萁兵無粥與糜瞻彼
蒼蒼天何日爲我皇帝陛下平定四陲萬國咸豐綏

五解

頭橋

曉雲逗微霽清暉千里餘遠山岬綠樹歷歷望中疏目極野田
水掩映見村墟原上人未耕垂柳間春蔬暖意在郊野好風吹

面徐何年掃塵俗來伴野人居

夜出安平

甲寅八月待宦
舊安途中之作

夜色黑如墨野田低更高山昏燈影小石亂馬蹄勞驛騎催風
鐸林鳥警露巢誰家看稻叟夜火在東臯

經去天尺五處

日光遠山腰雲氣遠山角山與雲相遮絮團紛漠漠我來萬峰
頂涼風動叢薄取坐披荆榛於焉息腰脚神清境自恬心空意
無着秋林相對間無風一葉落

下拉邦坡

三日陟高山十升不一降人馬亦既勞日夕得平曠忘在深山
中謂地漸高尙茲辰下峻坂一落萬尋丈直至邱壑底山靈出

真相回瞻昨日程
杳若九天上仰攀
三日功迸作一朝
償既歷險以危復
經坦而蕩山勢雖
逞奇於理不相抗
險絕必平易鬱極
必奔放吾生獨不然
三歎默惆悵

黃果樹

乍似來風雨
驀然心一驚
忽看亂峰下
無數野泉鳴
丹桂道旁發
欒欒岩上生
山川幽絕處
疑是剡中行

茅草坪

我行萬山頂
日落山荒怪
石向我立
秋草如我長
野火燒不絕
往往災枯
桑蠅蚋聚
炎熱蝮蛇
中潛藏
行人汗如
雨毒熱蒸
肝腸深秋
類酷暑冬
夏素炎涼
鬼國非人
居浩然思
故鄉

天仙米

誰家籬落綠陰稠
日色初晴風景幽
且喜天仙米新熟
數枝紅映碧溪流

空山

空山聞犬吠始覺
有人家屋與牛欄
接籬編鳳竹斜水
田荒晚稻藤架熟
秋瓜羨殺農民樂
力耕閱歲華

入普安縣境

一片篷聲亂笳與
穿竹行天低山勢
逼徑窄樹根爭落
日亂樵影秋風動
客情蠻荒何所戀
十載作長征

舉頭千仞逼古道
逐江還石出突當
道輿行斜讓山孤
村榕樹外淺水蔗
林間耕鑿諸蠻女
啁啾意自閒

自註以上九首隨侍之普安作也
德已遭兵燹記憶書之
又有打鐵關老鷹崖西林渡數首
德已遭兵燹記憶書之

奉贈莫邵亭孝廉

友芝

咸豐五年
貴陽作

乙卯三月自普安至

遼東從幼安不憚乘海航陳留事邊讓千里遠裹糧君子抱異
器欲晦名轉彰學者急名師如渴思壺漿髫年聞邵亭熱想縈
中腸意謂龍門高欲謁何時當偶然見所書運筆如挽強譬古
鎗刀劍中有鋒稜藏非彼弄虛機貌壯神實厖往與羅孝廉

光榮

讀書飛虹岡爲余言邵亭邵亭當代良公車昔相見拱若圭與
璋身衣敝緼袍身中神昂昂長面而豐下微髯雙瞳方經術旣
湛深行誼如范滂家貧苦無食片席占講堂束修盡買書富據
六十箱爲我出繭紙新詩十數行云是邵亭詩鈔以贈行裝捧
誦百遍過亮節諸宮商神鬼愁雕鏤法律嚴毫芒幽思渺冥冥
大力包穹蒼此境古未有自公開天荒所以元遺山不肯奇蘇

黃前歲黎廣文

先勛

輕裝遊貴陽更遺邵亭集鄭重如琳瑯開

讀快全豹此喜非尋常安得見此人一與談羲皇仰止幾經年

耿耿中難忘今夏送介弟

正嗣令弟

省兄行恩忙謹述先人行乞

公鉅文章公曾先人交備知先人詳慨然許載筆大節因公彰

今幸值公來喜入芝蘭房古來多詩人或者頗清狂疇能如我

公外樸中含光去年播郡圍妖氛肆披猖公心悼瘡痍知熱甘

探湯先幾破羣疑死守全城隍此郡賴以安再起萬姓僵在昔

撰郡志高文駕班楊羣兒駭奇字蜚語故謗傷乃今服高賢有

口不敢張僞儒苟乘時孔光登廟廊名世不見知葛亮甘耕桑

公少登賢書驥足當騰驤十下春官第半百年已將比來值謁

選欲往愁空囊倘假百里位足福百里氓志不下位衰終致饘

蛇裳賤子慘家變雙淚垂浪浪歔旌颶悲風哀歌下嚴霜呼天
非屈原斫地悲王郎流離萬里道何年還故鄉

丙辰春日與褚峻生都戎

克昌

連營小場勤亡寨賊偶成

二首

時在貴定軍中

百戰疆場識楮侯一身是膽更多謀苦遭坎壈心還壯未靖邊
隅誓不休時局如斯羞縮手君恩末報恥回頭建牙秉鉞他年
事知爾能分聖主憂

羣盜終難一戰平危城處處望援兵巖疆募士財先盡使節籌
邊意至誠招隱書來真卓識從戎人倦悔求名憑高北望長安
遠無限蒼涼故國情

二月二十二日因傷乞假留別同事諸君

重傷不死更清吟
懶覓金創藥
萬金折臂焉知非
後福全身終覺負
初心遠求黃石當何處
欲隱青山恐未深
太息阮囊無長物
那能買斷白雲岑

梨雲柳絮送吟鞭
回首沙場暗自憐
敢道知幾張翰早
曾聞獻策繞朝賢
心肝朋輩深相信
勝敗兵家豈偶然
惟有生靈堪下淚
關河千里斷人煙

聞清水江警

隔江烽火急昨夜
羽書馳人事竟如此
天心本可知
邊庭多難日將帥報恩時
莫再遷延役軍儲
遂不支

送張雨琴州判桐迎櫬粵東二首之一

決策平苗不論功
飄然踪跡似冥鴻
遠迎一櫬千山外
留得全

身百戰中杜牧才高真曠達孫郎年少是英雄
執鞭我有平生願夢轂隨君到粵中

飲吳小芸公子

森宅

側身四望歎無家飄泊西南感歲華
運去英雄猶負氣亂來詩酒是生涯
豪情未盡頻看劍青眼相逢且賞花
久矣不曾如此

醉玉山頽傍玉釵斜

本事在苑垣感舊詩序中未錄

贈人

主人留我浣征衣如此高情世所稀
患難至今方未已流離莫定始相依
終天有憾身還在壯志無成計總非
七轍遠懸七千里故園望斷幾時歸

世情如此可如何壯士征苗尙荷戈
未必乾坤終浩劫祇憑忠

信涉風波縱懷詩酒無聊賴放眼雲山自嘯歌留得鉢中雙龍
劍年來戰血不曾磨

飄零又作荷戈行多少淒涼去住情只爲家貧輕性命非關年
少盼功名本無壯志惟求食喜有良朋善用兵如此浪遊亦堪
笑旁人錯比請長纓

紀事

丙辰五月再至保定軍中作

念此長征士單衣不蔽身田存荒喪亂家有但清貧囊裏餓糧
盡江山戰伐新如聞漢天子流涕語羣臣

軍中作

繫馬長松下西風吹戰袍蒙龍衰草合搏擊野鷹高半夜見烽
火全身託寶刀廟堂有征伐諸將莫言勞

廉頗生季世李廣起龍城將帥非天授英雄出戰爭乾坤兩間
氣征戍七年兵定有屠鯨手江湖風浪平

留別胡肅瑜州別駕

履亭一百韻

粵寇昔跳梁群材效驅馳投筆去鄉里奮袂隨王師滇南胡夫

子天馬不受羈相見黔南軍知爲英俊姿爲我數行蹤出師亦

多時維時從經公委質報所知

君從戎粵西在昭通鎮經總戎文倚幕中

鬱林象郡

間斬將曾擎旗夜草露布文筆掃千熊罷堅壁永安州礮火轟

如雷遂搗蟻蟻穴荷戈窮尋追大戰古東冲烏帥揚天威

都統烏公

蘭秦道寇及之於古東冲斬首逾數千盡殲靡子遺是時將成功皇道當清

夷奈何桂林竄天未息殺機可憐將軍橋將星黯然低

烏都統戰於將

軍橋炮傷左足旋因傷薨逝從此洮陽城追兵次江湄坐視不一援老我師

者誰

賊竄全州追兵皆次江干

江公有深謀破船取長桅築堰橫大江斬斬

排千錐狡寇起從陸天意非人爲

江公忠源沉舟江中萬槍并森立賊不得過棄舟由陸并

力守熊湘君實參戎機

守長沙也

洞庭古天險守固猶可支廟算至

密勿諸臣苦依違

是時今上迭降諸臣奉行不力也

哀哉武昌城

萬姓填溝谿維君覩時艱憂國雙淚垂書生無寸柄有志將安

施下雋剪羣盜經公謀逞奇掃蕩旬日間剿撫得所宜

寇授通城崇陽

君隨經公剿平之

從此出豫章皖城軍馬嘶弔古歸德軍遊覽增壯懷

中州陸中丞剿寇許昌來上表留經公相助驅狼豺

河南巡撫陸公應麟

剿寇移節許昌經公表請留辦豫省軍務

殘寇圍許昌君實領健兒叱叱沙塵間

吐氣千虹霓奮身勇所聞陷陣殲渠魁羣寇腦塗地白骨揚飛

灰中丞疏以聞捷報天顏開叙功予少府健羽榮冠綬

君以解州圍

追寇遂平功奉旨以再戰大勝關功業誠恢恢百萬汝南民始

得親鉏耜擒匪走慎陽環攻城將摧君又振義旅一戰清氛霾

父老饋羊酒歌功頌雅才

君追寇至大勝關又解正陽縣圍汝南遂清

中州從此清

命駕遊吹臺樊樓佳麗地聽歌展雙眉粵寇出山右訥公秉戎

麾

直隸總督訥爾經額公督師剿辦

經公與合兵趙北燕南陲鑿戰臨洺關蟻

賊巢如圍我軍鳥獸散棄甲歌于思

我師敗績於臨洺關

君夜走雞澤路

與元戎歧詰旦入廣平相見生猜疑藁城大斬獲載滿千車騎

敗績蕪婁亭士卒復流離麻鞋史家莊元戎同歔歛勝公眞定

來津門喧鼓聲

謂勝都統保自眞定追至也

靜海星散營北風雪成堆荷鋪

鑿冰壕嚴寒裂人肌天遣召虎來佐帝掃近畿快哉白羊橋雕

戈凌雲揮逆寇伏天討縱橫陳其尸積甲熊耳山流血成江淮

西笑山房詩錄

阜城屢戰勝甲仗生光輝

王戰於白羊橋大捷自後屢捷

君往探臨清來往

勞且疲連鎮有天助遂盡誅鯨鯢君已去鄉久遠志成當歸歸

來小弱弟不識阿兄回誤認客投宿答言居宅卑阿叔出應客

一笑棄杖藜喜極翻感傷垂涕相扶持阿咸久從軍顏鬢殊未

衰又聞珥簪纓笑聲連童孩黔南楊瀾變窮竄如奔犀君實防

鎮雄辛苦甘如飴

貴州桐縣防梁鳳竄

凱旋始親迎鸞鳳鳴啾

啾新婚未百日軍書星火催再控紫驄馬借飭青油幃累功日

以多薦剡陳丹墀

黔南苗匪不靖昭通鎮巴對軍奏保州判念

君少早孤家貧恆苦飢君本名家子

君祖父以名孝廉司鐸呈貢

傭書非所

怡性剛負俠氣語質心無欺千金入手盡志在扶人危助弱折

強暴誼與郭解齊仇人中傷之幾爲禍網罹折節讀書工爲

古文辭才大中心虛運筆如風飛君才實出羣我愛非阿私年
來三從軍世途經險巇郡縣百利病靡不洞隱微坐見荷新恩
天書封紫泥早晚治大郡霖雨霑蒸黎岳也四方人爲君情依
依軍中數晨夕唱和壘與箴今也當北征雨雪方淒其嗚呼多
事秋千戈阻天涯帶甲滿黔山賊密戰士稀流亡滿道路何年
起瘡痍天道信悠遠後來匪所思此別萬餘里焉得長相携努
力崇令聞相見當有期擾攘征塵間歌成但長噫

玉盃歌爲李文軒都閫作文軒拔猴塲堡賊巢獲玉杯一

具軍中酒酣出以示客因作歌以紀之

刁斗無聲風露涼軍中召客傾壺觴碧雲捲盡明月出光搖萬
幕如秋霜高談不覺漏三墜埃火光微遠山晦荒雞催曙丑時

啼童僕潛匿客辭醉主人愛客無倦容撤鷄鵠杓琥珀鍾更進
玉杯大如斗啣以螭吻蟠以龍腥痕浸潤入肌骨雕鏤精緻非
人工衆賓歎賞稱未卒恐是宣和御府物此物來由君不知我
請長歌爲君述主人昨破三道河揮鞭斷流馬踏波木馬拉六

名二地

寇尙衆布陣如山屹不動將軍妙術超孫吳剗平拉六如

摧枯蟻賊紛紛聚木馬亞夫軍從天上下天戈指處妖雲消豐
功偉績誠超超銳師徑拔猴場堡組練三千猛如虎祇期朱雋
破黃巾不惜蘄王援戰鼓健兒呼嘯虎生風萬騎憑凌青山東
淮蔡從容滅元濟潁陽指顧殲張豐征馬如飛膽如鐵耳後生
風袍濺血分明金甲破龍堆更把玉杯出虎穴凱旋營壘勞三
軍雁行魚貫各如雲眼看六郡良家子惜少千金與策勳惟有

椎牛復釀酒酒在玉杯杯在手持杯遍以飲三軍三軍更上將
軍壽此時戰士歡如雷同飲葡萄酒一杯黃金十萬何如此誓
助將軍破虜回自此陳師幾酣戰摧堅破敵奔如電荷戈猛士
重橫行感激將軍心一片君不見勾踐醇醪投河中欲使滋味
士卒同銳意誓雪會稽恥出奇逢沼吳王宮又不見魏其黃金
任客取士願與之同生死用兵貴得英雄心七國功成實由此
將軍作用齊古人掃除妖孽清烟塵報國丹心炳日月成功玉
貌圖麒麟吁嗟乎玉杯玉杯幸得主我爲玉杯起舞舞譬如荆
嶺璞歸和不作豐城劍埋土亞父玉斗爾何爲彥章鐵鎗何足
數惟有將軍白玉盃盃雷樽共千古

贈李文軒都戎

春錦以下皆予已
自軍中回實歸作

山西出將古所云隴西李氏天下聞我朝將才出西蜀鼎鐘百
代銘功勳容齋無人時齋死誰與天子安乾坤方今寇盜何紛
紛何人際會乘風雲李侯一笑拂塵土絕代文人好談武西平
門第建旌旄中水家風擁貔虎昔年防守向夔巫籌畫安危策
不疎濫預堆邊無候火籌邊樓上展雄圖一朝携劍去鄉里戰
功實自播州起妖魔殄盡凱歌還從此南人不反矣有苗底事
動戈矛鐵馬重勞出益州將軍畫戟凌霄漢戰士弓衣跨紫騮
今年徵兵戰江北紅旗戰鼓春風裏將軍玉立眞天人桴鼓親
援萬人喜一鼓再鼓寇紛奔王師逐北疑風雨骨棄沙場飛作
灰血污寶劍紅如洗將軍風雅世間稀談笑從容決戰機馬上
相逢一傾倒憐余文士着戎衣健兒振旅歸來後連轡清談殿

後歸歸到營中吹暮角回看山外落斜暉後來清水江傳箭將
軍奉命營郊甸修刺先來訪故人僧寮暇日開芳宴將軍玉手
撥琵琶僚佐清歌穆護沙坐上投壺還射覆窗前犴鳥映蠻花
鳳蠟高燒篆烟吐健兒更擊漁陽鼓小隊弓刀出左廊鬢纓短
袖龜茲舞此時消盡酒如淮此際烏啼月滿街不覺酒痕沾繡
甲起看清露滴疏槐九龍山上張戎幕三道河邊飛露布至今
士女踏青遊盡是將軍爭戰處將軍善病復工愁令伯陳情數
乞休人說長城堪倚重我憐猿臂未封侯送君歸去傷人意錦
江花柳春無際赤甲山前春草生黃牛峽下春波細夜郎萬里
風騷騷眼中群盜正如毛廟堂溫詔求良將誰爲吾皇展豹韜
賢豪自古家邦重萬方憂樂心相共謝傅難堅泉石緣韋臯終

爲西川用浪遊詞客劇堪憐飄泊天涯年復年正喜風塵遇知
己無端祖餞敝離筵如此分襟堪太息千山萬水長相憶盼君
努力作干城他日故人看史筆

遣興 五首

問程過來人所告非不悉足所未曾經懸想已殊迹宣聖不可
見豎儒狃所習六經迹已陳道固貴親歷

郢人運風斤歐冶莫邪劍易器俱不工兩長各專擅北方有佳
人文辭美蔥蒨以之鳴唐虞未覺國風遠奈何親戎行干戈誤
文獻樊噲以武彰叔通以禮見用之苟不當參苓且無驗

士必有素習而後能建功南人乘北馬攀鞍如短童鞭策且倒
持安望行步工往昔太平歲斯文角劉熊弱冠掇巍科黑頭已

三公朝野正無事坐享倉箱豐皇仁包萬類賢愚同一功邇值
世多故事有萬不同盤根橫當前鉛刀喪其鋒王衍自清談殷
浩徒書空是坐不了了未必皆庸庸

春氣入肌骨臥多誤爲恙昨夜雷雨快令我髮膚暢抽架得新
書適意動高唱理達困境亨識多褊懷曠樂與古人遊亦不俗
人抗可笑稽叔夜殺身殊孟浪

平生作詩篇千言筆奔赴及讀山谷詩萬絲累成布篇篇百鍊
鋼字字鑪裏鑄爽然悔少作雖多不中度自此於文章苦思竟
無著貴當良獨難求高反窘步

送黎伯容

兆勳

之官鶴峯州佐

故山猿鳥莫相猜了邵公家事便回那不林泉長在念其如君

相正須才藥。巫風物。扁舟下江漢。旌旗幕府開。聞道中丞思得士。知兵況是故人來。

三更

三更倚枕後。萬事上心來。鬢髮愁中改。年華暗裏催。世途黃蘗苦。貧賤壯心灰。恨不隨親去。團圞共夜臺。

孤生無一可逝者。已三年。諸妹皆從殉。惟渠更可憐。謂四妹也聰明無與比。忠孝定成仙。精衛空啣石。難將恨海填。

黔婁曾有婦。大節亦森然。後死增吾愧。從親賴汝賢。事都非得已。生豈免憂煎。想到魂歸處。鰥魚夜不眠。

吾家有慧解。謂義婢也解誦子才詩。繡佛應成癖。無愁或似癡。至

情深主僕大。義懷鬚眉千古盤。江上長留六字碑。

有弟

有弟人中傑
髫年喜論兵
身能拚九死
力竟復孤城
七品宰官
職千秋孝子
名如何遂先
逝令我愧爲兄

贈人

相慕十年久
相逢兩眼青
深談疑舊雨
先輩感晨星
廉吏必有
後斯人足典
型循良家學
在堪以報堯
廷

何必登三事
風裁已出羣
嗜書沈昭略
愛客孟嘗君
春色夜郎
雨詩情夢澤
雲我慚荒舊
學三載賦從
軍

送郭鼎臣兄

穆 閩 錄 一
之西蜀

廉吏之子孫
往往愁饑寒
郭侯亦人傑
與我同悲酸
今將去家
遠爲客但求
升斗計亦得
鄰生遇合不
可知王粲依
人豈長策

問君胡不身巖居君非得已爲飢驅門有剝啄喧催租家有妻
兒啼無襦彼蒼有意相迫促不容閉戶甘園蔬憶昔相見君之
廬是時君貌何豐腴上有老母下妻孥門庭輯睦多歡娛良朋
三五偶相過匡坐祇有談詩書堂上老母喚留客漸米作炊烹
伏雛明年岳也四方走萍踪南北相見疎側聞翁伯重然諾少
年結客傾江湖公卿大夫爭造請千金入手忽復無岳也盤江
遭慘變三載墨纒身百戰十月霜寒短後衣三尺血腥莫耶劍
歸來訝君清且癯麻衣話舊血淚俱往日登堂拜母所縛帷零
落堂空虛十年之中幾相見回頭萬事烟雲幻致身無計顯親
難相嚮孤兒淚如霰君今西行來相辭如鳥投林當擇枝懷才
那怨遭際晚今雖富貴非其時吁嗟乎飢凍不死寧非天窮通

有命非偶然幸復筋力尙頑健足耐跋涉餐風煙見聞恰好證
所學坎壈將以成名賢況君孝友出天性願君白首終勉旃君
不見明德必假孝子傳歐公卒表龍岡阡

野鳧行

咸豐七年二月貴州提督孝順以火鎗自戕於都勻軍
中于子作此詞也

日黯黯風隆隆野鳧十萬飛蔽空野鳧下啄人肉滿眼黃沙與
白骨將軍焚香禱向天野鳧紛紛墜馬前死人死鳧肉狼藉晝
夜腥風吹不絕健兒三月飢無糧賣刀賣馬思還鄉將軍志在
保黔土口吐赤心與天語與天語天無聲爲兵泣兵不鷹一人
誓師涕縱橫一軍盡欲黎明行高天一手難爲擎大廈一木憂

其傾是夜風狂雨如矢雷鼓碎電光紫忽聞帳內火鎗聲雷
電寂然風雨止朝衣端坐油幕中淋漓腔血殷床紅滿營將士
哭聲動我曹死罪將軍忠素車白馬來入門萬家號泣聲入雲
至誠感人至於此觀者歎息眞將軍嗚呼觀者歎息眞將軍天
胡不使終其勳爲王剪盡鯨鯢羣

偶成三首

全家成大節一線續香烟忠義名長在兒孫意凜然訓言如昨
日祿養隔重泉輿櫬何時返悠悠路五千

餽粥都難繼淒涼臘一身朝班空接踵家計自清貧避債應無
策求官爲養親此心長耿耿萬里白頭人

未必能揚顯淒其淚一潛備知爲吏苦况復值時艱學古嗟何

及登場恐未嫺願爲清澗水長似在山間

示內子

悽悽復悽悽臨笑返成啼織素來新婦迴文憶故妻家貧愁去住世亂費提携歸計知何日中原正鼓鼙

憶昔從戎日行間遇乃兄墨纓方血戰青眼識朱生婚宦初無意因緣竟有成事皆前定者不必問君平

祖父七旬矣傳家祇一經有詩感零落嫁女費調停日盼孫成立門單牘影形寄書無別語但說早添丁

家庭更何樂弟妹已全無空覓鸞膠續誰憐雁影孤可能操井臼未及事翁姑歎爾雙棲燕應慚反哺烏

題辭

于伯英

鍾岳

以詩稿見示書此歸之 獨山莫庭芝

我讀伯英詩如入羣玉府蟾肪淬點昆吾刀憐爾劖鐫匠
心苦縱令斧鑿贖痕跡祇覺光怪溢堂宇哀時托興寄纏
綿任眞亦復見性天咫尺疑有少陵鬼色容慘淡立我前
我於此事無定力語言往往出輕易蚓蛟糾雜不自羞未
敢示人但拋擲一言持似君勿瞋期君僅以餘事作詩人

西笑山房詩鈔

第二帙

鐵嶺于鍾岳伯英著

紫江朱啓鈴輯

正安集 遙錄古近體詩凡一百零七首

咸豐八年戊午五月署正安州知州
以下爲戊午至辛酉軍中之作

贈胡叟 其珩

行年八十未龍鍾
話到平苗氣似虹
家有好兒能殺賊
天留老眼看成功
蒼生屬望慚吾輩
白首從戎壯此翁
莫謂人才天下少
草茅未必少英雄

寄懷江玠侯司馬 炳琳

憶昨蠻王洞妖氛一掃空
以多能取勝每怒必成功
此老文官耳偏多大將風
由來豪傑士不與衆人同

西笑堂詩錄
示人

既履干戈地安危本共之可憐猶好利不念此何時志士長多
慮窮官未必癡人心如可挽捷報不嫌遲

寄內

五載從戎苦何嘗不厭兵依然冒風雨不是爲功名欲報君親
重都將身命輕我行殊未已望爾勉雞鳴

軍中得內子書

書自閨中發叮嚀意倍長憐余久行役每夜必焚香辛苦承先
志艱難傍戰場此生惟任命不必禱蒼蒼

平婆凱歌

已期馬革裹尸來險處成功亦快哉我以至誠消大劫天將多

難試真才

衆心皆懼我心安忠義爲懷不畏難九道旌旗天上下萬山形
勢掌中看

伏兵四起寇無歸快似天山雪打圍白骨如堆人盡笑紅旗報
捷馬如飛

好把慈祥養太和漫將反側苦搜羅渠魁帳下纔傳首羣盜山
中已倒戈

嘉平七日蟠龍寺題壁

古寺松杉正寂寥孤燈獨坐夜迢迢久經戰陣詩懷減偶入名
山俗慮消富貴那如僧有福江山應笑我無聊內人生日今朝
是萬種牢愁赴此宵

生日作時已克復婺川縣城振旅於趙北渡觀音寺

慚愧循良說漸寬
新詩吟與士民看
不貪自覺民情厚
捨死方教賊膽寒
從此可能消坎壈
當年無事不艱難
何須正婺分疆界
億萬生靈總喜歡

三十年來閱歷身
於今始得牧斯民
已忘我爲閭閻苦
總覺民於官長親
恩惠敢云留此土
聲威且喜到比隣
個中自笑無他巧
祇在癩癢一念真

敢說勲名漸可觀
其如未博二親歡
所成莫謂非難事
無愧何妨傲上官
魚鳥江湖頻入夢
風霜松柏不知寒
英豪事業何容易
羨殺嚴陵一釣竿

蝸牛蠻觸漫爭雄
盡在拈花一笑中
千佛說經徒有迹
一官於

世豈無功福田法雨心偏切苦海慈航道本同稽首空王無別
祝早銷兵氣慶年豐

贈達君陶參軍

才鑑

聞我紅旗報捷來此時應得笑顏開直將國事爲家事能用羣
才是大才奇險當前曾不變至誠於物豈相猜三千戰士無飢
色爲有斯人善理財

贈曾心吾司馬

薪傳

一下柴車即治兵賴君昆季與相成衣帽愛好多風貌笑語天
然見性情此日群奸驚發摘君以計擒邪教苗發貴其他年作
吏頌神明於今不羨何無忌獨羨君陶有此甥

贈陳鴻仙茂才

復初

行年四十忽從軍應悔當年事典墳廊廟於今方重武吾儕相
見漫論文奇功半出書生手高論難教下士聞能不愛錢不惜
死生平將略欲傳君

紀恩詩

已未三月四日奉旨以同知
直隸州用並賞戴花翎恭紀

玉管冰銜繫絳絛新簪翠羽列仙曹珠毛不動風偏細金鏡孤
懸日漸高天子龍章昭懋賞書生馬槊愧微勞仁宗曾錫曾王
父慙愧傳家說鳳毛

翠羽飄揚步履殊可能翊戴帝王謨日邊霞彩千絲線雲裏華
星一顆珠鳥紀儀文稱大備鵬冠侍從補新圖不知唐代麒麟
閣颯爽英姿有此無

鼻孔山中與江玠侯司馬夜話

學步自疑當有進相逢依舊不如君平生風誼兼師友

李義山句謹

論嘉猷我願聞

縛狐行爲竇千山郡伯

奉

家江玠侯司馬

炳琳

擒遵義團

王安國作

長蛇走死封豕屠安得毒手烹雄狐雄狐變化作妖怪爲鬼爲
賊繁有徒何人授以太阿柄視官如兒吏如奴將亂未亂意叵
測震蕩衡霍搖夔巫天下知其勢將變燭龍目爲五色眩江公
奇計人不知乃有竇公握金鑑兩賢相遭非偶然霹靂弓開迸
雙箭議者欲奪東美軍將軍正鑒黑山戰妖星閃灼妖雲忙雄
狐暴怒牙爪張高飛駕鵝低驚鷗後有赤豹前貪狼江公鐵騎
無人當伏莽不動山蒼蒼猛士登山欲搏虎將軍射馬先擒王

帳前健兒笑開口手縛雄狐還太守白鹽赤甲解邊防湘水衡
山罷刁斗太守不爲衆議奪司馬果是回天手噫嘻乎潢汙不
塞成江河蔓草不圖勞斧柯苻堅不能聽景略慕容終竟爲妖
魔祿山儻死曲江手范陽安得稱金戈偉人決策衆人妬偉人
成功讒人訶請看古來尙如此豈惟二公多轍軻祇今豺虎搆
邊患雄狐不死當如何泔荆巴郡晏然享無事乃知二公深謀
遠慮功爲多

猛虎行

猛虎出深山三豹爲之助三豹爭先驅猛虎獨安步九壠有封
豕大力不能捕猛虎磨其牙長嘯赫斯怒掃野開園場封豕斷
歸路面縛就檻車醜類死無數偉哉毛蟲長鷹視而狼顧解衣

被羣羊百獸猶恐怖似聞當此時四海目所注馮婦莫敢撓卞
莊失其素胡爲古高辛遺醜有槃瓠深居閉窮巖連山噴毒霧
虎也免胄來威名動婦孺三豹久已死狐狸借前箸算勝猶懷
疑氷堅未敢渡其技工含沙其巢聚衆惡憑城猝難薰假威誰
敢忤淇梁歌無衣束薪怨久戍有客爲虎言子何用人誤其外
雖黃裘其中實敗絮天生使媚人焉能諳戎務班彪善奇計伯
比出於菟及今收爪牙吾圉猶可固後將不可爲望子憬然悟
虎也敬謝客吾已念之早小子雖不敏獵獸如薤草貪狼無能
爲巨獮何足道所慮府庫虛怒焉心如擣狐父職轉輸士馬日
騰飽秋高百草衰兔窟值一掃日吁君且休菟裘我將老自此
無敢言道路互以目槃瓠嗾其類群狐困馳突宋鵲搗虎虛霧

盧與虎逐一戰虎傷臂再戰虎折足嗟嗟渭潭民百萬化魚肉
猛獸在深山人不採其薪州郡得良吏虎不傷其民猛虎乃如
此迢然思麒麟

聞有量移遵義縣消息慨然有作

庚申

三年承乏賴群賢薄宦飄零又着鞭造物於人多恨事蒼生與
我有前緣重來可許珠還浦大願難償石補天此水此山此人
士將行那得不流連

何常不想早歸耕欲爲荒陬策治平立品豈甘隨世俗爲官不
過近人情所行未敢忘先訓如此真慚說政聲長治久安心未
了者番空到樂源城

年來桐婺厭兵戈執掌軍儲喚奈何菽粟那能如水火閭閻未

免苦煩苛邑無肥壤存糧少野有流民食指多議到禁酤三歎
息直成涓滴濟江河

年年壁壘擁旌旄且喜無多案牘勞辣手我因除盜賊隱憂民
已盡脂膏比蹤循吏多遺憾尙論時宜恐太高安得罷兵講生
聚早修禮樂解征袍

寄言柳絮與梨雲留點春光送使君好客信陵偏善將談兵杜
牧更能文年來料敵多奇中到處從戎總策勳一事自誇還自
笑有誰敢鬪岳家軍

諸君眷戀我徘徊桃李何常到處栽往日可憂惟寇燹此邦所
賴有人才群賢莫作龐公隱新尹行看杜母來倘肯始終扶雅
化臨歧依舊笑顏開

西笑山房詩集
至誠相感不無神上下情同骨肉親野老獻芹多古趣長官出
語應天真邊隅縱是干戈後城郭依然氣象新議堡議團無限
事成功留待後來人

一片書生未了心言之不足又長吟政刑果使存仁愛風俗何
嘗異古今難捨只緣民氣厚傷懷不是我情深曲終賸有青琴
在可許天涯遇賞音

清明後三日作

黃童白叟苦遮留欲去遲遲不自由公論至今猶足恃斯人於
我更何求忍將得月逢春地棄此盤根錯節州一洗官場趨避
習生平從不爲身謀

贈孫霽帆司馬

謹

宇宙非無人數載不一見抑天地生才多恐令人賤譬彼鳳與
麟非時不求見養士二百年時方值憂患迴天堂有人斯事可
理斷或我庸眼庸失之於覲面孫侯黔中英弱冠瓊林宴釋褐
錦官城歷十七州縣內理造聖域外情盡物變政績多傳聞與
論有徵驗綜其以前事已足循良傳况復值時危累年苦征戰
手復仁與桐鸚章僅一薦凡自川以東年來足跡遍訓練鄉里
兒居然甲兵繕掃野清豺狼排山列刀劍力主據上游遂請饒
十萬一氣呵川黔隻手轉昏墊獨持將傾舟化作金甌奠是固
唇齒邦非作桑梓念治兵來荒州衙齋列公讌伸眉論時宜聽
者樂忘倦海若懾河伯公和醒中散聞道在我先一辭莫能贊
唱酬爲詩歌大筆老逾健雅頌與分庭前席有誰僭著作等身

書此猶立言善三世同甲科雅話播里諺不過閭里榮已爲父
老羨抑我所重君風裁獨嚴憚百折氣不回五十學無厭策時
胸有珠論古目如電驅馳白髮生委宛蒼生便重任一肩擔仁
風八方扇黔南出斯人江山足增豔昊天有肅殺雨露變霜霰
彗星指文昌蒼鷹下擊殿謂天不生才是天未厭亂謂人不舉
賢是爲好惡眩若謂秦無人隨會迹高踐誰云楚多材齊亦有
管晏人固不易知士亦豈自炫我聞聖天子旁求四方彥又聞
曾駱胡吐哺不遑饌詎無啓事書早使封圻擅以彙羣賢征咄
嗟大功建君亦戎馬身胡能久留戀我亦厚望君時乎時不泮
行行夜郎山歷歷錦繡段即此十日中午已失春光半持此一半
春明日爲君餞

贈所舉薦諸君

志士修在己初不患無位有人汲引之乃扶綱常墜豺虎方搆
難府庫先告匱不有國手醫將見瘡瘍潰念我早登場濫簪殊
自愧諸子誠多才胡爲不早貴安危仗羣賢得失爭一簣出苟
當其時事半功已倍以人濟民艱如施惠不費我修薦賢書心
焉恆惴惴萊公非不明失之舉丁謂知人良獨難蔽賢斯可畏
盡其所能知拔之以其彙在範金彌純有瑕玉不廢陶冶爲鐘
鏞雕琢就圭佩貢之於朝堂一賢福萬類諸子勤自修我庶免
於罪無使夾袋儲竟乏斯邦最

達君陶招飲烟房

以桐油取
烟燒

路轉碧溪東玫瑰相映紅雞鳴修竹裏蛤吠野田中生計隴稟

古江山剡縣同主人留我醉沽酒百分空

鄧家壩即景

筍輿穿竹樹幽鳥靜中聞窄徑初行怯新秧遠望勻民歡山欲
笑官好吏更勤父老因何事沿村看使君

黃泥村道中書所見

昨夜大雷雨陡漲百尺溪勢如下坂馬一逝不可羈觸石成波
濤迴瀾作漣漪路與河相爭沒脛皆黃泥輿夫狎水墜笑聲動
孩提路轉山之麓有婦把鋤犁草屋間無人一犬守兩兒短衣
不掩臀肉色肥且黧對之忽生愧民已空骨皮長官無善政使
汝寒且飢官無功於民美食而鮮衣譬之於盜賊勢殊理則齊
山蠶方大眠田水已盈陂雨暘無愆期耕織其庶幾耕織苟有

望少足慰貧黎

經石牛場

刺梨花發拂征鞍兩片紅旗犯曉寒山似故人經歲別官如好
女耐民看多情學到安仁易雅度修成衛玠難且幸昨宵雷雨
急秧苗無恙老農歡

土溪場與諸生夜話疊前韻

大家茅店卸征鞍高論渾忘夜氣寒至道願同天下共迷津指
與衆人看不嘗險阻思無益專事冥搜學轉難談理自知差有
進諸生相對笑言歡

土溪場早發再疊前韻

朦朧曉色上珂鞍幽境風來四月寒野草不妨隨意綠好花終

覺耐人看松生絕壑盤根大舟到中流勇退難忽憶江南戎馬
後青山相對不成歡

曾心吾招飲烟房

又與心翁把酒杯竹汀花嶼自縈迴水車傍樹啣明鏡石礪臨
江走怒雷吏治未成人臥病山容如故客心灰循良文苑皆難
事歲月堂堂去不回

長官司上壩場示冉氏諸生

地多冉姓

舊俗相沿重讀書家家種樹繞茅廬高低田水明如鏡深淺雲
林可繪圖幽處自應人罕到空山惟聽鳥相呼不知畫地爲軍

陣可有當年璣璞無

冉璣冉璞冉湊宋時人今冉氏
諸生皆其後裔也

長官司上壩場與心吾夜話有作

僻地行人少空階野草荒鵲啼五更寂蛾撲一燈涼湛露沾無跡明星爛有光因談天下事不覺漏聲長

贈胡紉庭千戎

先紹

獨怪英雄將胡爲太瘦生曾將螺蟹甲更取葵川城我愛機謀密人誇勇敢名輕刀與快馬今日又從征

遊龍塘寺作

征塵未洗又尋幽籐杖欒鞋得自由幾點峯巒秋刻骨連宵風雨稻低頭梵宮偶繫沙場馬薄宦如乘苦海舟願度衆生歸極樂須憑佛法挽中流

雲戈鐵馬七年兵欲把邊陲寇盜平緩帶愧非羊叔子戎衣來拜古先生情田未了人間累癡念難忘死後名莫謂奇功非慧

業丹心更比佛燈明

于役文官堡賈藹堂

樓雄

留飲即席賦贈

四面綠雲合中有高士樓門開秋樹根屋比古道低主人雅好
客邀我情依依乃翁逆諸門白鬚扶杖藜愧我從者多列坐五
畝畦餉士宰肥牛晚飯烹黃雞更復出家釀巨甕雙童提問此
何時蜀年與主人齊窖藏四十載凝碧如玻璃一舉累十觴顏
然玉山欹爲我誦新詩秋月清心脾三年塵土中此會良獨稀
故鄉雖云樂無此山水奇安得買山錢與君共東籬一歌招隱
篇歡然解朝衣

贈呂輝山茂才

玉井

聲律茂才

正音

昆仲

屏庵先生今碩儒隱居不仕攻典謨田有黍稷園有蔬橫經鼓

篋來生徒先生高風振里閭文教欲繼泗與洙於今風雨孤墳
孤其德能感村樵蘇身後家無擔石儲傳家春秋易詩書長君
豐下微有鬢次君秀骨清且癯諸孫恂恂文雅都含飴老母六
十餘菽水侍奉多歡娛門前禾苗青籩簞河水洋洋多鯉魚橫
琴著書衣襜褕不受桎梏衣冠拘笑我風塵長馳驅偶然相訪
山之隅僕飽白飯馬青莠是時盛夏初伏初搖扇不住平頭奴
我欲乘醉歌烏烏村農或笑州官粗不如賦詩胸臆抒人世萬
變烟雲圖王侯將相終何如惟此潛德無時無兒孫奮跡青雲
途闡揚先志爲後模片雲催詩黑糝糊恐有急雨沾泥塗我曹
一笑下庭除鄉老驚視村童呼他日重陽白酒沾登高不異遊
匡廬更約楊君無常觚

謂楊慈昭茂才

就爾籬前醉百壺

達君陶招飲酒酣作歌

我愛達司馬樂源之賢者苦心爲我籌軍實三載孳孳如一日
興來招我傾醺醪一盃一盃遞相續我豈不願醉如泥醉後恐
爲蒼生哭白傅守杭州官妓歌吹清歐陽守滁州曾記醉翁亭
彼當平世有官樂我值此時苦耽擱年年戎馬不在家今年始
得飲金爵孟公投轄真麤疎淵明只知愛吾廬惟有文信國磊
落眞吾徒雕盤綺食吹笙竽美姬三四年方離明襜翠羽飄繡
襦朝歌暮舞紅氍毹一朝元兵虎狼肆手詔勤王兵不至文山
痛哭擲金罇毀家抒難招萬人豪傑壯士來如雲綱常所在不
顧身身經百戰歷辛苦五坡一敗作俘虜一腔熱血灑燕都千
古忠良吾愛汝男兒須似文文山笙歌燕樂皆等閒何得沉湎

爲杯酒阮藉劉伶復何有少壯曾懸捧日心終當大展回天手
手持長鞭鞭赤眉叱咤風雲使西走元黃再造九垓平皇路清
夷四方守歸來拜表承明廬脫却朝衫歸樵漁魏絳女樂悼公
賜汾陽侍妾列屋居經綸已致地天泰風月使我心神娛男兒
到此始無愧古來飲者徒區區我聞江東血凝碧何人起繼汾
陽迹吳苑花殘燕子飛白門柳老蟬聲急可是蕭條搖落時數
聲長笛起秋思南山多少桓桓柏不畏風霜祇自知

贈徐子垣學博

以清

天地晦冥雲氣惡何處兩軍相噴薄憂從中來不可說就君飲
酒強君樂君年少壯才不羈屈身廣文亦大奇豈其吏隱萬人
海不許朝士窺端倪興來落筆作花草挂出滿堂驚絕倒古來

畫手何紛紛惟有絹素留其痕不取其似取其意眼中已具花
鳥魂擘窠之書大如斗腕底蛇龍競奔走磨墨奴子駭且逃十
丈鷺溪未停手愧乏白鷺換君書煩君爲作青城圖我將携之
還京都宦囊得此非貪汚午橋莊平泉里不有黃金焉致此于
耶那有買山錢壁上江山斯可矣

金陵將軍歌

金陵將軍擁貔虎手築長圍困狐鼠胡爲開柙走封狼常州蘇
州化焦土此輩流寇何足數山塘士女遭兵苦可憐六代好雲
山如此烽烟不堪睹誰云大將今非古張公國樑能用武我欲
排雲叩帝閣廣建屏藩作周輔六部法令且刪除兵馬錢穀一
由汝生殺黜陟惟所宜但取彤弓能禦侮與共天下之大利韓

彭所以死項羽地平天成四海清然後孟酒法宋祖子女玉帛
堆如山京師大起王侯府兵爭既息吏治興舊制依然復督撫
我有此謀不敢吐作爲風謠達聖主

詠懷

髫齡至今二十載造物未嘗好相待於家於國兩艱難萬種驚
濤勝航海豈我才大天不容神鬼百計陰相攻境遇愈險氣愈
健路滑其如不倒翁出奇亦不過如此造化小兒技已窮吁嗟
乎范陽不反安祿山天下誰知平原顏不有元兵下閩浙那得
名成文信國人謂彼蒼視我若芻狗我謂彼蒼於我意良厚英
雄豪傑絕非生而知千鍾百鍊天爲之投筆大笑謝天地從今
不作牢愁詩

九日倉聖宮登高

平生恨不冠崔巍頭低腰折雙眉摧忽聞大吏一紙下如聞空
際鳴殷雷大吏焉能遽相苦我有萬卷胸中挂茫茫四海幾知
音櫪馬長嘶未逢主天能使我貧且勞不能屈我詩情高今日
重陽作高會黑雲如織風怒號曾君爲開茱萸宴掃苔布席倉
頡殿千尋高塔矗寒雲歷歷山城霧中見天羅城外山名蜿蜒來自
東佛頭螺髻青濛濛橘柚蕭疎半秋色水田高下涵清空蠻荒
雖陋有取爾山逞怪變萬不同貴人見此信愁絕能助我輩文
章雄況有劉郎遠相過晨夕子唱我爲和要知萬慮皆可空惟
有詩魔不可破獨憐四海戰血斑萬里長征人未還今日之日
且莫語時事放開眼孔看青山更復侑以百樽酒我與諸君大

醉開心顏

與俞曉亭

培 劉紫熙 卓 枝 賞菊

本是東籬種胡爲此地開花如衰吏瘦香似故人來
時紫熙氣
味偏宜冷風霜莫漫催終當買三徑移向小園栽

大魚塘

正安大魚塘石壁繞有孟溫二大字嘉靖甲申十月六日貴國忠定公元孫宋澤書詩云我幽

又無處知我意日夜和哀聲

山夾大魚塘浩浩水東注不見昔時人空尋詠詩處

有感八首

聞道天津府雄師視百蠻如何軍國議忽詔重臣還鐵甲將橫
海金牌竟撼山至今楊柳曲哀怨玉門關

大將韓擒虎闔羅海內知龍興堪並駕鷹隼不同時鼓角三更

月森嚴十萬師何年哀怨笛重譜楚些詞

提督樂善有聞羅之稱

夜半鸞旗肅宮門片月斜東巡關國計行在即皇家留守資黃

閣除官降白麻前車猶未遠非是棄京華

見說乘輿出諸臣有諫章大都陳治亂力請斬汪黃時局非南

宋兵威在朔方會看神武略一氣接高皇

未幾承丹詔蒼黃失大沽專征遭薏苡痛哭伏青蒲憶昨星轅

發中原雪涕呼明公多遠略留作後時圖

諱保自河南召回旋令幫辦夷務

自古中朝政盈廷論不同宜明強弱勢不尙揣摩工獨斷歸明

主平章想晉公追懷邊患起遺恨一和戎

再有甘泉火宵光徹禁垣衣冠遊幸地水竹奉誠園千里秋無

稼孤城晝閉門淒涼兵死鬼多少未招魂

四海雖多事諸侯各晏然不曾驚土木何必異澶淵雪恥酬千古爲謀出萬全汾陽有深意急爲掃幽燕

答江來青茂才

庚申

避地東行意寡歡故園回首路漫漫我無大厦遮寒士民有饑容愧此官十口艱虞居不易四郊戎馬去應難未知推轂當何處破虜歸來着意看

萬壑千巖秋氣高霜華容易染征袍名場久戀原非計師旅無功祇自勞每讀治安懷賈誼爲談詞賦得枚臯因君感我平生事永夜悲歌思鬱陶

經文家墳最高峰

地氣至黔鬱不伸化爲萬丈青嶙峋蠻荒設險禦魑魅精氣直

上通星辰群山到此一收束羅列兒孫盡低伏無心爭勝虎牢
關來爲今皇鎮荒服狼奔豕突縱復橫一隅敢與泰岱爭長鯨
大鯢挾海吼不敵巨靈偶伸手君不見共工怒觸不周山不碎
坤輿碎其首

黔山問答

蜀山青而腴黔山峻而瘦譬如窶人子不與富賈鬪藤蘿百餘
尺詰曲如篆籀中有天然泉涓涓出石竇山含太古色孱顏不
容垢泉爲清涼渠一潤禾苗秀蜀山見黔山啞然笑其陋曾無
綠陰敷但覩石皮皺黔山語蜀山疏鑿在君後滋培賴人力可
漸不可驟十年樹梗楠十年樹桑穀假我二十年且將出君右
蜀山勿自誇黔山勿自囿但得五丁來移易此邦舊

流民歎

涉水水深登山山高蝮蛇噬人虎狼咆哮聲聲遺黎將安所逃
足繭手皸埋頭蓬蒿黃巾如麻手五尺刀婦不敢啼兒不敢號
曠野無人悲風蕭寥吞聲躑躅適彼樂郊傭於富人執爨採樵
我生不辰焉敢告勞一解朽索馭馬不如恩德徧野文法刻深
不如維繫厥心二解國家深仁厚澤僉夫見義不惑不求達官
不求賑恤我祖我父沐浴恩德我行我心匪云忠與節三解吁
嗟乎惟爾能然我心則惻爲爾吞聲零淚沾臆四解

慈姑蕩

我經慈姑蕩有翁貌粗醜去年二頃田今年借升斗問爾胡爲
然輸金數割畝倘爲寇蠶食吾寧與官守尙有力役征大兒小

鎗手次子亦遠戍書來問安否三子隨州官每戰未嘗後昨日
荷戈回說官不去口輕身冒矢石渠魁且授首籌食以贍兵官
也復何有吾儕小人耳曷敢掣官肘鄭冉彼何爲流言謂官取
弭患於未萌神君殆天授力轉危爲安吹噓起枯朽兒歸且歡
娛家有哂筒酒光陰能幾何勞勞我已叟逆寇當驅除盛世正
永久以此貽兒孫所得不已厚

漫興

鴻鈞簸大地亂石爲粃糠沃野留中原礪礪歸窮荒而我處其
間坐井觀穹蒼考古乏陳跡但見山茫茫麋鹿逐其羣野鳥相
隨翔擘筆有述作冥搜響枯腸始知寒瘦詩不升大雅堂誰歟
不解事乃欲王夜郎安知六合外尙有無人鄉所見祇醯雞敢

笑蘇與黃江海且無道先請遊瀟湘

軍毛家坪有作

英雄無所階茲山偶相借斧薪以爲椿編竹密無罅頑石築其中高自領而下壘外開深池長脛不得跨列籤五畝半蝟死刺未化鹿岩環周遭森然戟矛架觸之聲琤琮用防敵乘夜兵有不可勝其安若太華賊騎相憑陵我則整以暇居守恆晏然壯士各休舍日暮彼則竭鼓聲霹靂乍敵人猝不防相顧駭且訝開壁擊情歸萬弩一齊射蛇鳥走旌旗風雲助呼咤頃刻決雌雄所向孰敢迓獻馘青油前配牛以爲炙一軍挾纘歡隆冬變爲夏顧此泥中鰕早非老鯢價當代有偉人庶幾李郭亞下位不見知勲名亦云罷

放言 十三首

相如富而秀子雲博而奇文章霸一世不爲前輩羈隨園縱巨
眼高步青雲梯天縱經綸才棄爲山林棲偶然吐餘波已汰黃
河泥賤子處下位與公同栖栖

堯舜與湯武幸生孔子前假使遇宋儒不敢望大賢自三代而
下名世如蟬聯吹毛求疵瑕豎儒操其權或有聖人學力扶炎
漢顛或有聖人質爲宋規中原事皆同一揆何論後與先大哉
我仁皇帝堯與比肩巍巍莫能名蕩蕩如高天是與古三皇一
德心相傳臣常慮後儒觀海心茫然

大權在君上忽爲腐儒竊秦皇坑燒之足補宣聖缺六藝集大
成紛紛各著述學師無不爲失豈但楊墨相斯荀卿徒胸中有

師說防民與正俗聖人道不絕智君愚黔首變禮以爲質孔誅少正卯子產戮鄧析所以防僞儒政令出於一尙文有流弊宗周忽焉滅箕踞罵腐儒是亦始皇力

必有州縣才乃可州縣官才不厭其位所爲無可觀大哉公輔器乃使天下安在山以爲易出山知其難

乘舟遇風浪篙槳力俱盡衆力不虛施舵師識欲定所以行三軍在帥不在勁醫者非其人百藥不救病何人秉國鈞大造萬邦命

兵家有至情難爲外人道運用此寸心未戰已先較變化出其間鬼神遜微妙兵書路人迹陣圖丐者鈔衆人舐糟糠大智攬其要

我聞岳家軍五百破十萬用兵不貴多所貴識與斷百千萬億
籌不出一掌算不能爲文章徒然富書卷

緬維唐太宗弱冠大功就超然龍鳳姿想其眉目秀民情洞於
水文藻一何茂於今誦清芬尙疑侍左右煌煌貞觀初一洗六
朝陋

我讀李廣傳乃笑太史公勦猷無足紀結撰憑虛空大將有器
識豈徒騎射工挾私殺醉尉所爲非英雄坑降度尤隘終身無
成功或者少壯時矯矯諸將中不過彼勝此固非勦業隆罷刁
斗斥候敵人未嘗攻是其有天幸亦與去病同良友作美傳嘉
名垂無窮射石而飲羽只可欺兒童

漢高戮功臣是爲天下計韓彭若生存焉肯事惠帝心知呂危

劉所以寵如意大聖固天縱後儒何敢議明祖戮功臣無乃失猜忌若以比漢高判然若天地

商鞅變井田才大足開飢挾持所真知獨行無倚傍見明事不乖識定氣乃旺一令在必行百令無敢抗要在發令初胸中雪然亮荆公一書生未能破理障助以執拗資適足召羣謗少年好更張意氣一何壯刺繆不自知乃謂閔者妄彌縫猶尙遲專欲恐無當

樗櫟本棄材宜向深山藏如何媚工師取爲宮殿樑棟折而榱傾居者先受殃不如窮崖陰終其天年長

農夫不識字忽欲爲高官但知有官樂不知官所難民情溺機詐翻覆如波瀾君也蝨其中寸步皆憂患黃雀無遠慮常爲弋

者彈拙鳩營高枝巢破卵不完君本田舍翁不安田舍間

蠻王硯歌輓江玠侯觀察固勇巴圖魯 庚申冬十月毛

家坪軍中作江公以戊午秋七月破蠻王硯擒趙冒頂

岳許以詩明年江公戰死團溪水軍中作此以償宿諾

山可傾海可平古人力與造化爭君不見江公搥碎蠻王硯

開石破天驚比諸古人尤奇橫陽巖一戰寇東走蠻王之洞

石張口祖龍鞭山山不奔江公搏兎氣已吞霧積雲屯戰士擁

電掣雷轟石不動朝鑿石聲礧礧暮鑿石音崕崕移山之志如

愚公拔山之力如重瞳賁育氣盡舞陽死仇池乃與天相通硯

中殺聲震屋瓦將軍眞從天上下列炬萬點如燃犀畫多金鉏

夜鼓聲九天九地無此奇一步一戰羣醜携將軍斬賊如斬草

寶刀切玉如切泥萬丈機槍何足掃男子不奇王保保寇亦爲之滅山亦爲之開天假雄才不假壽祁連高塚生蒿萊我歌蠻王洞壯士皆悲哀夜深月黑風怒吼疑是英靈助戰來

贈徐華治郡伯

河清以下皆咸豐辛酉軍中作

夜郎兵荒八載餘其誰掃除韓與徐韓公無緣少相見徐公方面專城居殘雪聲中倏相過野鳥驚起紅隼旗山城春寒破寺寂恨乏籛筭爲歡娛夜深興辭慮公倦公云且更留斯須論兵論治論著述相對忘却衣冠拘始知此會不易得如讀桓譚新著書

圓圓墓

徐華治郡伯云圓圓墓於今貴定縣之新安有墓在焉爲詩弔之

一女關興廢遭逢亦可嗟如何褒姒恨不在帝王家飄泊天邊

絮淒涼陌上花蠻雲深箐裏指點玉鈎斜

鳳凰山弔前明忠國公王祥

王祥敗績烏江至羅梓台兵潰自刎於今正安鳳凰山之

南嶽寺

力保播州郡勲名亦壯哉八年攻守策三殿詔書來怨讟歸軍

實艱屯屈將才家邦淪喪日豪傑可勝哀

江山奇闊處崛起一英雄恩遇殊諸將威儀次上公令妻明大

義辱主少成功嗚咽青溪水年年恨不窮

聞道烏江戰蒼皇匹馬還我思南嶽寺當近鳳凰山廢壘無人

識荒祠白水環猶聞腰下劍流轉在人間

鄭昌孫墓

宋嘉熙間以南山寨拒元兵墓在今正安州鐘濱里按嘉熙理宗年號其事當在景炎三年全

之川皆昭

義似田橫島崎嶇百戰身景炎猶正統絕域有孤臣遺鐵埋荒
草殘碑問野人高原臥翁仲剝蝕幾冬春

自失南山寨黃冠閱歲時史臣當日闕遺事幾人知應是翔龍
陷都無介馬馳西南忠義節湮沒更何疑

蟠溪寺有前明殿撰羅洪先七律一章問諸山僧墨蹟爲
人竊碑亦無存詩以誌感

懶向華林聽曉鐘翩然遐舉一冥鴻逃名粉署金鑾外高詠寒
山古寺中野鳥不驚蠻樹綠清溪橫跨板橋紅殘碑歎識瓊牋
墨總被人間劫火空

春日寄題鷺池寺

日映嬌花紅欲然春山雨洗淨娟娟舊游忽憶鷺池寺萬壑松

風聞杜鵑

徐公祠

名際平嘉善人正安州吏目以題桑富正安至今祀之

處處榦林綠家家機杼聲蠶桑成土俗伏臘見民情仙尉能行

道王孫舊有名

君祖父皆有名德載浙江通志

可知循吏傳不盡是公卿

憶貴格

繡襦香綳玉雪肌慰情真箇當嬌兒可憐顰面花時節走馬春

山聽畫眉

宿牛渡河

老屋經風雨縱橫苔蘚生紙窗一星火落月十年情不見所思
至時聞斑馬鳴前溪鳴咽水迸作斷腸聲

謝灞夜雨

旅館燈花落懷人獨黯然水田環野店吠蛤警愁眠欲曉寺鐘動無聲烽火然客心正淒絕古樹又啼鴉

鳴鳳閣

夜半前溪水如聞風雨聲星含兵氣動月傍戰場明不寐丹心苦憂時白髮生今宵望華蓋應已返神京

青龍關

畫野分黔蜀龍蟠第一關高低數行樹迴合萬重山生聚謀難就流離去不還年來搜刮令未解念民艱

自歎

豈不懷歸畏簡書普天烽火渺愁余不須更見飛鳶跼早憶平生下澤車

緊急軍書驛騎連呼庚脫甲日憂煎瘦身正自愁風痺羶帳沉
淪聽雨眠

不是泥人草檄工自嗟命薄老兵同皇華驛路無窮恨多在輕
寒細雨中

宋生擊賊行

二月戊寅寇攻文興寨宋生炳文擊敗之

生靈何辜彼蒼何讎虎兕出柙荼毒九州殺人如麻積骨巴邱
誰歟干城修我戟矛嗟嗟宋生居高臨流崇墉深池衝軻敵樓
寇環而攻解鞍少休生奮厥武力敵萬牛聚而殲旃不返一輶
藿食之士沉深有謀肉食之士胡甯不羞小人在官歡營所求
君子在野坐懷百憂皤皤黃髮烈烈鴻猷長樂永康延年千秋

懷愧

耿耿吾懷愧流連未挂冠每思今日計欲索解人難井邑愁征
權平生誤一官蘇門山水窟魚鳴利盤桓

憶秦來

夜草軍書兔穎殘令嚴鼓角數聲寒不知斗轉參橫未喚起癡
兒帳外看

少小戎裝結束新鳴鞭上馬更輕身即今雉雊薜蘿綠少個平
原射獵人

客愁

客愁渾不寐夜氣浩茫茫怪鳥如人語妖星作月光談兵雙鬢
短報國寸心長不及隨陽雁春來向帝鄉

補白

錄莫邵亭送于伯英權正安知州二首

州縣兵戈地官場視畏途愛君豪士氣不肯世賢趨鑿水

花生劍珍山水滿弧前旌開馬首何處有榛蕪

此邦殘燧耳擾擾又經春不識誰司牧道然憶古循推心

持政要洗眼看民親須信襄勤譜傳家果是真

西笑山房詩鈔

下卷終

民國癸未冬紫江朱氏刊印

西笑山房詩鈔蒐逸

第三帙

鐵嶺于鍾岳伯英著

紫江朱啓鈴補輯

集外詩 凡古近體十九首

感懷

乾坤多難日憂患此餘生對酒名心老看書劍氣橫左謀慚薄
宦虛願說歸耕欲問成都卜艱難鳥道行

防守局感懷

山城暮角逐秋來江上愁聞羽檄催塵海烟雲悲過客

謂劉仙石裴樹

任守前次

天涯烽火老邊才樽前說劍心猶壯局外談兵事可

哀何日軍聲靜銅鼓翠屏山下首重回

再和趙鐵筠前輩防守感懷原韻

漫從禪榻坐論兵

局設晉祿寺

四野風高警雁鳴烽火無邊愁北望

開四安寇警

軍儲有賴喜西成好花偏向秋前落惡竹都從斬後生

眼底枯榮成一笑厭聞蜚語不平聲

贈徐華楚吟丈

跌宕徐夫子胸中老甲兵書生留本色志士恥逢迎百戰身逾

健一官貧更清休將眼前事□□□枯榮

海宇方多事先生脾胃生文章餘劍氣功業等浮名不放雄心

減寧辭俗眼驚會當風雨快北漠起長鯨

獨怪遼東豕紛紛黑白爭浮雲看萬變飛鳥自孤行身已穢牛

懼人休腐鼠驚風塵同骯髒誰與話生平

我亦傷寥落人間白眼多兵戈愁老大湖海氣消磨塞馬忘身

世蠻魚寄嘯歌曰歸何日遂江上有風波

贈章仙洲弟

源

造物困吾儔蒼蒼萬里秋榮枯皆幻影聚散等浮漚驛路蠻烟
重荒城暮雨收常依知己樂不羨覓封侯

一往踏黃葉亂山楓樹深秋風離客恨潭水故人心才品清於
玉交情利斷金飛騰終有日吐氣到朋簪

畫圖無限景

錢別有秋山圖

方寸總難傳誼重金蘭簿情深翰墨緣

留連秋雨路悵望夕陽天明日孤燈畔相思各惘然

同是天涯客相逢又別離感深惟有淚欲去轉無辭莽莽羣峯

暝蕭蕭落木悲尋梅須踐約卮酒話襟期

約於冬間旋
迂道見訪

十二日阿都驛寄仙洲

二首

半窗秋樹影客舍度如年離緒連宵月清輝夜夜添
月下峯樹淨蟲聲四壁秋倚欄慵似醉厭聽報更籌

長至

又向軍中逢至日聲聲邊角起愁心依然幕府持文法遂使苗
疆久陸沉亂後蓬蒿堪蔽目爨餘松柏不成林可憐曳足人何
在萬古南蠻瘴癘深

贈劉紫熙

貧徹劉郎骨高調變苦吟獨垂憂世淚不死好名心
吾道將浮海斯人竟陸沉從來高蹈者難得一知音

營中寄內

此詩爲女于佩蘭手錄者茲
於題稿得之佩蘭即貴格也

每將嬌女當嬌兒少小聰明長可知安得終年常繞膝等閑親

自教唐詩

風月蕭蕭戰馬鳴
征人陡覺破裘輕
寒衣寄到心先喜
多少工夫製得成

壽田忠普軍門

與恕

天狗墮地日無色
印江孤城外援絕
大將旂鼓天上來
殲盡敵軍水流血
踏冰渡河錦襦褫
走縛渠魁如縛羊
怒髮已觸不周倒
鵝堡猴場彗星掃
石阡餘慶解重圍
如斷亂絲薤枯草
兩年不拔玉華山
壯士思歸多苦顏
咤叱一聲如霹靂
虎狼十萬皆辟易
妖氛更襲播州城
北門鎖鑰須重兵
將軍移師寇奔走
風沙漠漠開西坪
百萬稻梁落吾手
澤中無復鴻哀鳴
壺漿夾道父老拜
千門萬戶皆歡聲
歸功將士我何有大
樹將軍用心厚

黃龍山寇不足平直抵胡巢痛飲酒嗚呼如公天下奇英謀偉
績世間稀敬重儒生惜士卒兩載玉華同忍飢養士屢捐萬金
產賞功曾解千狐皮嘗爲我言江右戰腰間抽盡百枝箭輕身
烏過萬重圍更赴臨江敵人宴賓慶城頭響鼙鼓礮如飛蝗箭
如雨三省官兵壁上觀百獸望風避雕虎千群妖鳥鍛翎飛從
此威名動聖主顯皇之朝將帥臣君也羣落冠其倫他日凌烟
看圖畫貂冠羽箭眞天人葡萄之酒芳且醕美姬蹀躞紅錦茵
瑤琴錦瑟琵琶箏熊燔膾炙猩猩唇健兒更作渾脫舞千將結
綠光照雲酒酣起爲將軍壽中國男兒誓報恩

附錄 鄭柴翁贈于伯英詩

錄自于氏家藏柴翁墨稿

承示歌行一篇見贈意奇語闊所謂久矣此妙聲不聞蓬萊宮者也然稱道過盛區區實無一語能當之日暮精疲又知不克勉至於是率賦長句奉達鄙懷

東野受材固雄驚孟俠豈足當韓豪長怪韓公肯低拜倚松自謂慙青蒿君今於我復似此驚顧使我失所操海內論詩至今日淺狹未免難爲箭乾坤大氣鎮常在必有一手連六鰲小詩耳耳竟何有差覺不爲時俗臊此事如何漫推我可憐甚愛忘訾警雖然亦自有甘苦巨眼如燭安能逃古來作者盡殊列何李後數朱王高早君從事三十載口角沫盡心枯熬若云老馬夜知道此或未讓吾同袍獨嗟衰矣舊學廢

時間弄筆蕪難尋何期晚始識元歎規伴頗慰陰求勞我觀
君才在當今於人何止十倍曹氣似華芝韻初日聲如仙鶴
唳九臯方茲堯母摠大麓姬公明保鋤凶饗河水清涵底
柱影天風吹落崑尤旄中興鴻鑠已在眼文章國運如連尻
不賴高呼有公等誰歟與世迴風騷試看江漢與常武即筆
召尹播管鼗功臣文苑非兩事山澤小儒焉敢叨今君勛業
日隆起拔突殊號承新褒小邦屈借寇子翼斯民疥癢煩勤
搔請公上馬往屠賊歸來釃酒血洗刀說詩聞以魯學近暇
與共詣王新桃 謹上

伯英太守先生嚴劄

部民鄭 珍拜稿

